

# المضيئة 13

الكتاب : المضيئة 13  
المؤلف : مروى جوهر  
تصميم الغلاف :  
تدقيق لغوي : سارة صلاح  
رقم الإيداع : 2014/21013  
الترقيم الدولي : 978-977-778-001-8  
الطبعة الأولى : 2015

20 عمارات منتصر – الهرم - الجيزة  
ت-011-27772007 02-35860372  
[Noon\\_publishing@yahoo.com](mailto:Noon_publishing@yahoo.com)  
جميع حقوق الطبع والتوزيع محفوظة للناشر



# المضيئة 13

مروى جوهر



obeikandi.com

## "اهداء الى"

روح "محمد عبد المنعم النوبى" الرقيقة التي تبتسم في هدوء  
وتحلق حولنا في سلام الى أن نلتقى جميعًا باذن الله.  
أسرتى الصغيرة التي تتحملنى دوما في أوقات جنونى وما أكثرها .  
ماريانا، دولا، دعاء، عواطف، ليزل: شيناز، كيم، تسيجيه،  
موموكو، صافية، هيبى يونج، بويونج، كاليانى، نيكالى.

"كل مضيفات ومضيفين الطيران في العالم"

obeikandi.com

## الحقيقة

اسمى "ياسمين"، بنت مصرية في العشرينات من عمري، كنت مضيضة جوية، لما قلت لأصحابي المضيفات فكرة الكتابة عن تجربتنا كان لهم جميعا طلب واحد بس: "إحكي للعالم الحقيقة.. قولى الوحش والحلو".

طلبهم خلاني أفكر في الوحش اللي نسيته لكن هم لأ؟ يا ترى الحلو أكثر؟ ولا خبوا حاجة جواهم ومتكلموش عنها قبل كده حتى مع بعض؟ هل حسوا انه فخ وقعوا فيه؟ هل فعلاً الوحش كان أكثر من الحلو؟ ولو الوحش أكثر ليه كملوا؟

قبل ما أشتغل "مضيضة جوية" مكنتش أعرف عنها حاجة غير أنى هلف العالم وأوزع ابتسامات رايحة جاية، في بنات كتير بييفكروا في الشغلة دي بنفس المبدأ، لما خلصت التجربة وكنت إحكي جزء منها لأى حد كان الرد المشترك "كل ده عشان تبقى مضيضة؟ ليه يعني هم بيعملوا ايه!"، من هنا جت فكرة الكتاب، للمعرفة.

سيداتي سادتي...

في يوم من الأيام كنت جزء من قصة تستحق تتحكي..

لكم الحُكم بعد الهبوط... وشكرًا.

# الحلم

عندي ايمان قوى ان الحلم أصل كل حقيقة، "المضيضة 13" حلم تحول لحقيقة علشان الناس تتخيل كواليس المضيضة الجوية، الناس دايمًا بتفكر في الظاهر: يعني مثلاً الممثلة بتلبس ايه وبتسافر فين وحياتها ازاى وبتاخذ كام! محدش بيفكر في معاناتها قبل الشهرة، اخترت مهنة الممثلة لأوجه الشبه الكتيرة بينها وبين المضيضة الجوية، الاثنين ممثلين! والاتنين (بصراحة) سمعتهم مش ولايد! والاتنين مش بياخدوا شهادتهم في المحاكم! من غير كسوف وعلى بلاطة خلينا نشوف نظرة مجتمعاتنا الشرقية للمضيضة الجوية:- (للأسف دي آراء ستات وبنات أعمار وفئات ومستويات مختلفة وآراء رجاله ممكن تتجوز صالوناتى حتى لو بتحب واحدة كانت بتشتغل مضيضة جوية!)

1 - المضيضة الجوية "صايعه" أو في مقولة ثانية "دايرة على حل شعرها"! بتسافر وحدها بلاد كتيرة بعيد عن أهلها.

(تناسوا ان البعد مش بالمسافة وان البنات بتعمل اللى هي عايزاه في أي حته في العالم حتى لو كان بيتها).

2 - وطالما معها فلوس - اللى هو مرتبها اللى شقيت بيه - تعمل وتجرب أي حاجة ما هو مفيش أهل!

تناسوا ان القاعدة بتقول "كل ما كان الشغل مخاطره أكبر كان الأجر أعلى".

### 3 - المضيفة الجوية متعددة العلاقات العاطفية!

(طبعًا ساعات بيكون حقيقة لأنها رحالة من بلد لبلد، ده بيكون سبب زهق الطرف التاني وأساسى لفشل علاقاتها الى هي شخصيا نفسها تتطور وتأخذ شكل سليم. وتناسوا كالعادة ان أي حد في أي شغلانة ممكن يكون متعدد العلاقات لأي سبب تاني زى التسرع مثلاً).

علشان أي بنت في العالم تقرر تشتغل مضيفة جوية فبى غالبًا واحدة من دول:

1 - عايزة تطور من مستواها المادي.

2 - نفسها تلف العالم ببلاش وتعيش مغامرات.

3 - بهرب من علاقة عاطفية فاشلة.

4 - كل الظروف اللي فاتت مجتمعة.

تحاول المضيفة الجوية دائما أن تتأقلم قدر استطاعتها مع أي موقف أو جنسية أو طقس، ولأن من أساسيات شغلها "البشاشة" فلازم تكون مبتسمة طول الوقت، عيانة أو مضايقة ولا قلقانة مش مسموح لها تبين مشاعرها قدام المسافرين، مش بس المسافرين على فكرة.. قدام كل الناس طالما انها بالزى الرسمي لخطوط الطيران اللي بتشتغل فيها، لازم

تظهر في أحسن مظهر لائق وهي لا بساه لأنها واجهة الشركة اللى بتخلى أي بنت في العالم تشوفها تحلم تكون مكانها، لازم تمثل انها في أحسن حالاتها قدام الناس، في معظم البلاد العربية طقم الضيافة مش بيتكرر في جدول الرحلات الا بعد مدة زمنية كبيرة وممكن جدًّا مايتكرر مش عشان كده بتتعرف على زميلها غالبًا لأول وآخر مرة. وفي الطائرة تستقبل بحفاوة ناس مايتخبروش عن زميلها، لكن لازم تصطنع الود والابتسام! المضيفة الجديدة بتعتبر نفسها محظوظة جدًّا لو زميلها القدام لطاف وبينصحوها في أوائل رحلاتها، أو مش عايزين يناموا من التعب عند الهبوط في اى بلد، ده معناه انها مش هتغلط كتير على الطائرة ومش هتكتشف البلد اللى راحوها لوحدها. طبعًا ده مش معناه ان كل المضيفات عندها اكتئاب، هي مسألة وقت وتعود، بعد مرحلة الانهيار لازم مرحلة القرار تعدي على كل المضيفات، هل ده اللى كنت عايزاه؟ مبسوة ولا لأ؟ هكمل ولا لأ؟

لو كان قرار الشغل في الهوا صعب فأكيد الرجوع عنه أصعب.

# كيف تصبحين مذييفة جوية؟

## "المقابلة والامتحان"

من الحاجات المضحكة ان في ناس لسه فاكرة ان المضييفة لازم يتوافر فيها عنصرين: شكل مقبول واجادة لغة أجنبية وبس! مش مهم أي حاجة تانية، هي هتعمل ايه غير انها تجر عربية الأكل في الكابينة وتقدمه للناس وترجع تلم صوانى الأكل الفاضية؟ " تن تن.. تن تن.." لو سمحتى كوابية مياة.. ممكن بطانية... مفيش دوا للصداع؟ الناس معذورة لأن هو ده اللى بتشوفه، طبعًا أنا كمان كنت فاكرة كده!

يوم المقابلة كان يوم جميل مشرق في فندق خمس نجوم، دخلت الفندق وكان واضح كم الولاد والبنتات اللى قدمت على الوظيفة! كان السؤال المنتشر يا ترى عايزين كام واحد وكام واحدة؟ على باب القاعة كان في تراييزة مستطيلة، قاعدين وراها بنتين، واحدة مصرية والتانية انجليزية، كانت البنات مرصوفة قدامهم في طابور والولاد في طابور موازى، والبنتين بيوزعوا أرقام نلزقها على الجاكيث في الناحية الشمال ونكتب اسمائنا في قائمة وقدامها رقمك، اللبس للجنسين لازم يكون رسمى، الولاد بدلة والبنتات تاير فوق الركبة بالظبط، الولاد شعرهم ودقهم مخلوقين والبنتات شعرها ديل حصان أو ملموم كحكة، مفيش حلقان طويلة أو كبيرة، ولازم يكون في حد أدنى للمكياج، السيرة الذاتية مع صورة صغيرة وصورة بالطول بنفس ذات التاير اللى هنعرضه المقابلة، لما سألت على موضوع الجيبة قالولى عشان يتأكدوا ان البنت

ماعندهاش كساح ☺، كله التزم بكل اللي اتقال في الإعلان الا حكاية فوق  
الركبة دي الصراحة!

وقفت في الطابور أراقب الوشوش، الكل متوتر وأنا كمان بدأت أتوتر  
وبعدين قلت لنفسى على ايه يعني؟ خليها على الله، جه دورى أخيرا قامت  
البننت المصرية في ثبات وابتسامة عريضة واديتى رقم "13" واستمارة  
بيانات أملاها! بصيت للرقم، مديت بوزى لقدام وبصيتها تاني بيأس...

البننت المصرية: في حاجة؟

أنا: 13.. مينفعش تغيرى لى الرقم؟

البننت المصرية: لأ ما ينفعش..

أنا: (ابتسامة بلهاء)

البننت المصرية دي ربنا صبرها عليا بالرغم من انها كانت حاسمة جداً مع  
باقي الناس.

البننت المصرية (بصوت واطى): 13 نحس مش كده؟

أنا: يعني..

البننت المصرية: لو اشتغلتى معانا هتعرفى ان كل حاجة في الدنيا مجرد  
رقم وبس، بقى تيجى وتستنى وتقضى طابور وتمشى عشان رقم؟ مش يمكن  
تنجى؟ ركزى وبلاش خرافات.

أنا: (نفس الابتسامة البلهاء)

اتصاحبت على كام بنت وولد من المتقدمين. وإحنا بنتكلم في واحد  
اتفزلك وقال ان اللى قدموا حوالي 1000 واحد وواحدة.

بنت من اللى متقدمين: هو إحنا هنبتدي الامتحانات امتى وهنخلص  
امتى، ده إحنا عددنا وصل 1000 تقريبا!

البنت المصرية: لغاية دلوقتى عدد المتقدمين 370، إحنا اكتفيننا خلاص،  
نص ساعة وهنبتدي الامتحانات.

بصيت بيأس للرقم اللى علقته على الجاكت...

صوتي العميق: 370! و 13 ينجح؟

البنت المصرية: Good luck

أنا: أهي تجربة.

غمزتلى المصرية بتشجيع وكملت توزيع باقى الأرقام وسابتى بفكر في  
الاستعداد.

بنت من المتقدمين: بصى م الآخر لو عايزة تبقى مضيفة جوية لازم يبقى  
فيكى الشروط دي:-

1 - اجادة لغة وياريت لو أكثر يبقى ليكى أولوية.

2 - صحتك كويسة وخالية من الأمراض وجسمك متناسق بعيد عن  
التخن طبعاً .

3 - أقل حاجة في الطول 160 سم.

- 4 - ثقة عمياء بنفسك. (مش عارفة ليه)
- 5 - لبقة وذهنك حاضر ورد فعلك سريع. (عشان حالات الطوارئ وغيرها)
- 6 - مرنة في حياتك وسهل تتأقلمى على أي حاجة جديدة. (تغيير الجو وتغيير الدم وغيرهم كتير)
- 7 - بتحبى الناس. (تحت أي ظروف)
- 8 - صبورة. (المسافرين هيقرفوكي أكيد)
- 9 - مش بتقرفى (لانك هتنضفى الحمامات)
- 10 - أعصابك جامدة (عشان المرضى والأموات والقنابل وغيرها)
- 11 - عندك هدف محدد من الشغلانة. (عشان تقدرى تكملى)
- 12 - عندك استعداد كامل تقطعى مع دنيتك لأيام متواصلة. (مش مهم تبقى لازقة في أهلك وأصحابك)
- 13 - وأخيراً وليس آخراً.. تكونى ممثلة جيدة جداً. (يبقى فيكى اللي مكفيكى وطول الوقت بمكياج كامل وفاتحة بقتك مبتسمة).

أنا: انتى كنتى مضيفة؟

البننت: لأ!

البننت الهندية: اتفضلوا يا جماعة كلكم هنا عندي لو سمحتم...

وبدأت الامتحانات، كانت اللجنة مكونة من الأخت المصرية والانجليزية وانضمت لهم الهندية، بناء على خبرات سابقة للعبدة لله، كانت شركات الطيران الكبيرة بتختبر المتقدمين للوظيفة في يوم كامل وشوية استراحات قصيرة في النص، اليوم يبدأ من الساعة التاسعة صباحا وحتى السادسة مساء! أول ساعة لامتحان اللغة اللى كان تقريباً 100 سؤال اختياري والورقة الأخيرة كلها كتابة، استراحة عشان يصححوا الورق اللى هاينادوا رقمه يبقى نجح ويستنى واللى ماسمعش الرقم يجرب تاني في الإعلان اللى جاى.

الامتحان اللى جاى وزن وطول وطول ذراع! وعلامة على الحيطه تمد ايدك عليها وانت واقف عادي وبعدين وانت شابب لفوق! عشان يشوف هاتطول مكان الشنط اللى فوق الكراسى في الطيارة ولا لأ؟ طبعا المقايسة دي للبنات من غير كعب على، اللى عدي ينادوا رقمه واللى ما عداش ماتحاولش تجرب تاني.

الامتحان التالى لباقه وذكاء اجتماعى وسرعة تصرف وقوة ملاحظة، دوائر كراسى وكل دايرة مجموعة، كل مجموعة ترأسها واحدة من لجنة التحكيم وتديلك موقف وتشوفك هاتتصرف ازاى مع زميلك، وهى واقفة تكتب الرقم اللى على جاكتتك وجنبه ملاحظاتها عليك، بما ان الشغلانة دي هاتشغلها مع مجموعة مش لوحدهم لازم تحطك في موقف مع مجموعة غريبة غير اللى انت بتتكلم معاهم من الصبح وتشوف رد فعلك ايه؟ عنيف؟ بطئ؟ مبلم؟ ذكى؟ قوى الملاحظة؟ سريع التصرف؟ بشوش

ولا قتم؟ وهكذا، وانتم عارفين الباقي.. استراحة وبعدها اللي هيتنادي اسمه يقعد واللى ماتناداش يمشى.. ويجرب تاني.

الامتحان التالى نفسى! ورق أسئلة مش فاكرة عددها كام، كل إجابة سؤال تنافى إجابة السؤال اللي بعده! يبقى انت عندك خلل في النفسية! لازم تبقى حريص جداً ودبلوماسى في أجوبتك، كمان لازم تتخلى عن الأنانية والعنصرية وضيق الأفق وعدم المرونة والكذب والتشاؤم وبلاش الصراحة م الآخر، استراحة.. اللي هايتنادي اسمه يقعد واللى فلسع يمشى ويجرب تاني، الامتحان اللي بعده واللى بعده واللى بعده لحد الساعة 6 مساء... مش فاكرهم بصراحة لأن ممكنش في حاجة ذات أهمية، الصعب عدي خلاص.

تجاربي مع شركة الطيران اللي فاتت تبعث علي عدم الراحة والإحباط المبدئى، تخيلوا لما أترفض عشان سقطت في الامتحان النفسى؟! يعني مثلاً يقولك في السؤال الأول "هل تعتبر اللون الأسود أم الأصفر أم البرتقالى من ألوان الموضة الشيك؟" انت ترد بمنتهى الصراحة: "الأسود" فتلاقى السؤال التاني: "هل ترتدي اللون الأسود أم اللون الأصفر أم البرتقالى في أيام حزنك؟" انت ترد بمنتهى الصراحة برضه "الأسود"! فترفض لانك شخص كئيب وعدوانى! وهكذا.

في الاستراحات الناس قريت من بعض أكثر، سؤال هنا إجابة هناك، فشر كثير، خبرات بتتناقل وكان في ناس متخصصة في التلصص والتصنت ومعرفة أخبار اللجنة المجتمعة جوه القاعة الكبيرة المقفولة على لجنة التحكيم اللي باهما الكبير كاتم للصوت! سبحان الله.

- "على فكرة هياخدوا المرة دي عدد كبير" ..

- "مين قالك؟" ..

- "هههه لأ باينة.. انتى أول مرة تقدمى؟"

في تمام الساعة الرابعة والنصف مساءً وأثناء احدي الاستراحات كان الصداق هو الناتج الأساسي المشترك لكل المتقدمين والمتنافسين، لكنى استسلمت في الآخر عملاً بكلام الأخت المصرية "مين عارف؟ الله وحده أعلم"، بصيت حواليا لقيت العدد قل جداً!

- هي الناس راحت فين؟

- سقطوا.. فاضل حوالي 10.

- كل دول سقطوا؟

في نهاية الامتحانات وأثناء احدي الاستراحات الطويلة اللي كانت تقريبا آخرهم، طلعت الأخت المصرية وابتسمت وقالت الجملة الشهيرة اللي حفظناها "إحنا بنشكركم جداً على اهتمامكم ومحاولاتكم، اللي مش معنا مش معناه انه غير مؤهل بس ممكن يكون حظه أحسن المرة الجاية.. في حاجات كتير انصحكم تشتغلوا فيها على نفسكم، اللي يسمع رقمه بيعي معايا واللى مسمعش رقمه يجرب تاني بعد 6 شهور أو في أقرب إعلان.. حظ سعيد... رقم 21... تاني وآخر رقم هو 13 !

أحد المتقدمين: ايه ده بس كده؟!

أنا: طيب يا جماعة.. فرصة سعيدة، كان يوم طويل ومبسوطة انى عرفتكم.. السلام عليكم.

البننت المصرية: رايحة فين؟ انتى مش رقم 13؟

أنا: أيوة صح! 13! يعني قبلت؟

البننت المصرية: مش قلتلك.

بصيت تانى حواليا فى القاعة لقيت اللجنة وأنا وبننت مصرية اسمها "دعاء" بس!

دعاء (بابتسامه): مبروك.

أنا: الله يبارك فيكي!.

أنا: أومال فين الناس؟

دعاء: متقبلوش.

أنا: وفيين بتاعة النصايح؟

دعاء: متقبلتش.

أنا: يعني أخذوا 2 من 370!

صوتي العميق: لأ كان باين فعلاً انهم هايخدوا ناس كتير!

دخلنا القاعة للمرة الأخيرة ...

البنيت الإنجليزية: إحنا سعداء بكم ومبروك.. اليوم كان طويل والحمد لله  
طلعنا ب 2.

أنا: 2 ده رقم؟

البنيت الهندية: ساعات بنطلع ب "صفر".. طبعًا 2 رقم.

البنيت الإنجليزية: وواحد كمان رقم.. المهم يكون الواحد ده مؤهل  
وامكانياته مناسبة للوظيفة.

البنيت المصرية: اتفضلوا الورق ده فيه كل الأوراق اللي المفروض  
تجهزوها قريب على قد ما تقدرؤا، وكل التقارير الطبية كمان من أشعة  
وتحاليل وشهادات تانية من الشغل لو فيه و...

أنا: كل دي أشعة وتحاليل؟

البنيت المصرية: كتيرة ومهمة، تحليل "فيروس سى" و"الايدز" من أهم  
التحاليل، لازم نتأكد انكم خالين من الأمراض وبعدين ده اجراء وقائى  
هتعملوه لما تشتغلوا كل 3 شهور عشان الأمان.

دعاء: هو السفر هيبقى امتى؟

البنيت المصرية: أول ماتكونوا جاهزين في أقرب وقت، الكارت ده فيه  
تليفونى والايميل وإحنا هانخاطبكم من خلال الايميلات، لو سمحتم  
تفتحوها يوميا للمتابعة... مبروك.

أنا ودعاء: أكيد.. شكرًا.

الهندية والانجليزية: مبروك يا بنات.

سلمت على دعاء ومشيت مبسوطة ومخضوضة! كنت رايحة بالعند في نفسى واعتبرتها تحدي بعد ما اترفضت مرتين ولما قبلت بجد مش عارفة أفرح ولا أزعل؟ المفروض أسيب مصر بعد شهر واحد؟ أسيب أهلى وأصحابى وشغلى وبلدى؟ مبسوطة؟ لأ مش مبسوطة! مش عارفة.

## السفر

بدأت رحلة تجهيز الأوراق المطلوبة والتحاليل والأشعة والتقارير الطبية لحد ما خلصت لكن الامتحانات هي اللى مخلصتش لغاية كده! الغربية ان أهلى لحد المرحلة دي مكانوش مصدقين انى فعلاً هسافر! بصراحة ولا أنا!

حزمت الشنط وشديت العزم وسط بكاء امى الحبيبة اللى يهد جبال ودعواتها ودعوات أبى الجميل وحزن أخويا اللى كان بيداربه ويمثل عليا انه جامد قوى، لكنها كانت مغامرة لايد منها زى ما ربنا كتب لى، طريقى "مطار القاهرة الدولى" كان مختلف مش زى كل مرة معرفش ليه، حسيت جمال البلد لأول مرة، صحيح أنا زى مصريين كثير مش راضية عن حاجات كثير في البلد لكن دلوقتى البلد احلوت في عيني ومش عايزة أسيها!

وأنا بخلص إجراءات السفر في المطار كانت عيني على أهلى لأخر فتقوتة فيهم، حطيت الشنط على السير ووزنتها واتجهت على gate أو بوابة الرحلة أستنى الأتوبيس اللى هيوصلنى للطيارة، حسيت انى بموت نفسي، البلد دي فيها فعلاً سحر "لا بحبك ولا أقدر على بُعدك" لكننا بنحبها وجدا كمان بكل الحلو والوجش اللى فيها.

أخيرا جه الأتوبيس بعد وقت طويل لأنى أنا اللى جاية بدرى، كنت حاسة انى ماشية زى "روبوت" في حد ماسك ريموت بيجركنى! أهلى هيوحشونى

قوى، ركبت الطائرة لثاني مرة في حياتي لكن لأول مرة كنت بحس الإحساس ده مع الإقلاع.. الفزع والخوف، الفرحة والحزن، التحدي والأمل، الحرية والتقييد، كلها أحاسيس ضد بعضها وتفكير مشتت وسؤال حائر جدًا: يا ترى الخطوة دي صح ولا غلط؟

بعد الهبوط وفي مطار البلد العربية كانت موظفة من إدارة الـ "Welfare Department" أو الإدارة المسئولة عن ترفيه المضيفات ونفسياتهم وكمان ارشادهم بما انهم مغتربين، الموظفة أسلوبها شيك زيها كأنها بتقابل مسئول في السلك الدبلوماسي، بنت عربية بشوشة تفتخر بها، بعد ما اخدت الشنط من السير لقيتها ماسكة يافطة عليها اسمى و3 أسماء كمان، زميلتي "دعاء" اللى كانت معايا على نفس الطائرة من غير ما آخذ بالى، "دولا" من لبنان و"ماريانا" من قبرص.

عرفتنا ببعض واديت لكل واحدة مننا ظرف فيه مبلغ هدية من الشركة يمشيها لحد آخر الشهر (على أساس ان اللى جاية تشتغل ممكن جدًا تكون مش معاها فلوس كفاية).

موظفة الترفيه: الـ "Welcome Bonus" ده غير مسترد حتى لو سبتى الشغل!

صوتي العميق: سبتى الشغل؟ ايه ده بقى؟

رغم القلق كان الاستقبال مشجع ومهر يخليك تقبل على الحياة، كانت البنات منطلقة وكأنهم رايجين رحلة أما العبدة لله كانت واخداها قفش وكأني هشتغل في المخبرات الحربية، في اللحظات دي عمرك ما هاتنسى

أهلك لكن هاتفتكرهدفك، كان واحد من أحلامي انى ألف الدنيا وأعتمد على نفسى بشكل كلى وأتعرف على ثقافات مختلفة والحمد لله ربنا اداى الفرصة بعد مرات فشل.

أخدنا شنتطنا وركبنا معاها العربية الشيك جداً لمكان سكن المضيفات، "كومبوندا" من ضمن كتير للمضيفات وزيمهم للمضيفين والطيارين، كان أغرب حاجة حصلت لنا أنا وماريانا ودولا ودعاء اننا اتكلمنا مع بعض من أول دقيقة كأننا أصحاب من سنين وكنا مسافرين ولسه راجعين مش العكس! كلام وضحك وضحك وضحك!

موظفة الترفيه: انتواا تعرفوا بعض قبل كده؟

دولا: كتير حلوين... ما هيك؟

"دولا" بنت لبنانية، جميلة، بيضاء، طويلة، مرحة جداً وجد جداً، من أسرة لبنانية جداً، هي كمان لبنانية حتى النخاع، عندها أخت وأخين، بتحب الحياة وتتحب الأكل وتعمل كل حاجة بمزاج، حكيمة زى جدتى رغم انها أصغر منى، حبوبة وجدعة الى أقصى درجة، بتنسى بسرعة جداً والكلمة المعتادة .. "ما انتهت".

موظفة الترفيه: يا رب تفضلوا كده على طول.

دعاء: ان شاء الله.

"دعاء" بنت مصرية شيك، خمرية، طويلة، جذابة جداً، دلوعة، أسرته مصرية من طبقة ميسورة، عندها أخت وأخ، حنينة وودودة وفيها طيبة

وجدعنة المصريين، لا تثق في الناس بسرعة، خوافة جداً ولا يمكن تبات في الشقة لوحدها، قوية ودقيقة الملاحظة وكتومة.

وصلنا احدي المدن السكنية الخاصة بالمضيفات المحاطة بالأسوار، كانت جميلة ونظيفة وشيك، تحس بأدميتك وانت داخل زي الباشا كده، وقفت العربية عند مبنى السكن، المبنى فخم وكبير وشيك، الأسنانسير.. الدور الثاني..

موظفة الترفيه: وصلنا يا بنات.. يا رب البيت يعجبكم.. الشقة، دولا ودعاء وياسمين هيسكنوا في الشقة دي.. 3 أوض و 3 حمامات و هتشتركوا في ريسبشن 3 قطع ومطبخ، لو السكن معجبش حد فيكم ممكن يغيره قبل شهر، لو عدي شهر اللي عاوزه تغير هتدفع 500 دولار.

أنا: وتغيره ليه؟

موظفة الترفيه: في بنات مش بترتاح مع بعض وفي أسباب تانية كتيرة وفي بنات بتدلع، عشان كده بنحط شرط الدفع لأنه مش سهل نغير السكن كل شوية.

دولا: إذا حايبين إحنا الثلاثة مثلاً في يوم نغير سكن؟ بيمشى الحال؟

موظفة الترفيه: في الحالة دي بنوزعكم تبع السكن المتاح، غالبًا بيكون صعب جداً نلاقى شقة 3 أوض في كومبوند فاضية، دايمًا بتفضى أوضة ومش شرط تكون بنفس الكومبوند.

موظفة الترفيه: عجبكم البيت؟

دولا: رزق الله.. كثير حلو.

من مدخل الشقة كان المطبخ على الشمال، مطبخ كبير مجهز 5 نجوم، حمام صغير على اليمين، ريسبشن 3 قطع بمساحة معقولة، أنتره وتيلفزيون وسفره ومكان كبير فاضى، الطريقة اللى فيها أوض النوم على يمين الريسبشن، كل واحدة اختارت أوضتها حسب ما ارتاحت، كيميا الأماكن لعبت دورها من غير ما نختلف، كانت أوضة دعاء هي أقرب واحدة للريسبشن على الشمال ووراها أوضة دولا على نفس الصنف وفيها حمامها الخاص، الحمام الكبير على اليمين، وأخيرا آخر أوضة في الطريقة في الوش أوضتى، كل أوضه فيها سرير وكومود ودولاب وتسريحة وسجادة وستاير وأبجورة ونجفة، كل دولاب فيه فرش كامل للسير، كل الأوض فيها سبت حوص كبير جواه "توست، مربي، جبنة، مياه، لبن، نسكافيه، شاي" وملفوف بمنتهى الشياكة بورق شفاف وشريطة حمراء معاها كارت "أهلا بك في خطوطنا الجوية"، المشهد ده مش قادرة أنساه الى هذه اللحظة، قدروا يهرونا بشياكة، جنب السبت ده رقم تليفون البيت ودليل جواه تليفونات أي حاجة ممكن تحتاجها ومعلومات كتيرة عن البلد وقوانينها، نصحتنا الموظفة بتاعة "الترفيه عن نفسية اللى خلفونا" اننا نقراه النهاردة أحسن، بكرة وبعده إجازة للتعارف ببعض وبعد بكرة هانبتدي التدريب.

ماريانا: وأنا؟

موظفة الترفيه: انتى في الدور التالت مع بنت مغربية جت امبارح.

ماريانا: إذا هتسهروا قولولى أنزل، إذا هتنامو برضه هنزل.. ها ها

"ماريانا" بنت قبرصية سورية، حلوة، طويلة، برونزية، كانت لازم تشتغل موديل، تتحدث اليونانية والانجليزية بطلاقة والعربية (السورية) بكثير من التركيز في نطقه وكأنها بتتعلمه، وشوية لغات ثانية بتمشى حالها فهم، عندها أربع أخوات صبيان، طيبة جدًا ومرحة جدًا، ذكية ولماحة، تحب تساعد أي حد ورقيقة المشاعر.. لو شافت حد غلبان ممكن تقعد تعيط، "ماريانا" كانت في الشقة اللي فوقنا لكن كانت تقريبا عايشة معنا لغاية ميعاد النوم، بعد ما بقينا أصحاب بقت تنام في أي أوضة عندنا، النضافة شيء مقدس عندها، أكثر حاجة كانت بتسلينا هي فقرة تعليم ماريانا عربي، زى مسرحية كوميدية جدًا.

دولا: ياللا ناظرينك..

موظفة الترفيه: بداية مبشرة... هسيبكم تترتاحوا وأروح أنا كمان،  
تصبحوا على خير.  
أنا: وانتي من أهله.

# السنيرة

وبدا أول أيام التدريب، نزلنا قبل الميعاد بخمس دقائق، كان أتوبيس الشركة موجود، البنات كلهم بملابس رسمية حسب التعليمات، أغلب البنات تحت مستنيتين قبلنا، الوشوش متحمسة ومبسوطة وخايفة.. مفيش حوار أكثر من "صباح الخير" وابتسامه وصمت وترقّب على أنغام موسيقى "بودا بار" اللى شغلها السواق!

وصلنا مقر الشركة، استقبلنا واحد حليوة وريحته ترد الروح ووصلنا لقاعة محاضرات كبيرة في احدي الأدوار العليا وكأنه بيت جحا المودرن، وأثناء رغي البنات وضحكاتهم المتواصلة دخل حليوة ثاني أسمر يجن، مبتسم جدًّا وفايق جدًّا جدًّا، على أثر ابتسامته كل البنات سبلت بضمير. 70 جنسية في خط الطيران و حوالي 15 جنسية في دفعتنا وأعمار من 20 الى 28، كل الديانات السماوية واللاسماوية مع اللادينيين.

الحليوة: "صباح الخير يا بنات.. أتمنى لكم يوم جميل في أول يوم لكم في خطوطنا الجوية.. نبتدي التعارف من الشمال لو سمحتم، الاسم والسن وكنتم بتشتغلوا ايه قبل كده والهواية المفضلة. بدأنا التعارف وكل بنت مفتخرة جدًّا بنفسها.. حلوه.

الحليوة: عاجبني الثقة وانكم فخورين باللى عملتوه في حياتكم، في سناك خفيف بره وكافيه.. قدامكم عشر دقائق بس وهنرجع نتعرف على بعض أكثر.

هيبى يونج: لأ إذا كانوا كلهم من العينة دي أنا عايزة أتدرب على طول.

"هيبى يونج من كوريا.. جميلة، بيضاء، قصيرة، أعبط وألذ واحدة في البنات، أحلى ابتسامة بريئة فينا، المجموعة كلها كانت بتعاملها على انها بنتنا، على طول بتتضحك ومن أجدع البنات اللى عرفتها، كريمة جداً، دمها خفيف جداً جداً، كانت اكثر واحدة بنضحك عليها وبتضحكنا في الكلاسات، في نفس الوقت كانت بتقول حكم تفكرنا ان لسه عندها مخ بيفكر".

بو يونج: مفيش فايده فيكى.

"بو يونج من كوريا.. لونها أبيض مصفر، طويلة، جذابة جداً، أذكى بنت في دفعة التخرج من وجهة نظرى، حادة الملاحظة، مجتهدة، البنات كلها كانت بترجع تسألها على حاجات في المحاضرات" اسأل بو يونج"، ظريفة جداً مع البنات، بخيلة حيتين، مقرطها بالبليدي".

كاليانى: الواد يهبل يا هيبى.

"كاليانى من تايلاند.. الشكل التايلاندي الأصلي، مرحة جداً وحبوية جداً جداً، وراها مأساة بتداريها دائماً بالضحك المستمر، حنينة جداً، وطموحة".

هيا يونج: شكك بتفهى وهنىقى أصحاب.

قمنا كلنا على القهوة عشان نبقى فايقيين زى الحليوة كده، كله التزم بالوقت ورجعنا تانى القاعة.

دخلت علينا سنيورة نضيصة وحلوة وشيك ومبتسمة وفايقة جدًا برضه...

السنيورة: صباح الخير يا بنات.. أهلا بكم فى خطوطنا الجوية.

البنات: أهلا بيكى.

السنيورة: شايفاكم كلكم مبسوطين ومتحمسين تطيروا؟

كل البنات: جدًا...

السنيورة (تضحك بسخرية): أشوفكم بعد كام شهر طيران وانتم أقصى أحلامكم تحضنوا السرير.. أى سرير.

كيم (لمارينا بصوت واطى): مش المفروض تحبطننا كده!

"كيم ومارينا من جنوب أفريقيا.. حلوين، ملونين زى ليزل، أصحاب جدًا ودايمًا مع بعض ونادرا ما كانوا يسيبوا بعض، دايمًا بيكلموا أفريكان، أقل البنات مشاركة فى حوارتنا لكن فى الخروج كانوا دايمًا حاضرين".

السنيورة (بابتسامة واسعة): مش مهم... دلوقتى هقولكم شوية معلومات وتعليمات وبعدين هناخد كلنا جولة فى البلد عشان تتعرفوا على أهم معالمها، كلكم شوفتوا تدقيقنا فى اختيار المضيفات طبقا لمعايرنا المتميزة

ومعايير الطيران العالمية، اخترناكم لأنكم أفضل الناس الى اتقدمت، لكن في حاجة مهمة جدًا لازم أقولها في أول دقائق لكم معنا، التحدي صعب مش سهل والشغلانة دي صعبة مش سهلة زي ما أغلبكم متخيل، الحقيقة لازم تكونى شخصية مسئولة وقوية وتقدر تتحكم في نفسها.. التدريب هيتأثر أكفئكم، يعني مش معنى انكم جيتم هنا ان كلكم هتشتغلوا؟ التدريب هيستغرق شهرين هتدرسوا فيه مانيوال مقسم لأجزاء أهمهم: الأمن والسلامة، الإسعافات الأولية، المواد الخطرة، علاقات العملاء CRM والخدمة أو حسن الضيافة، وفي فصول تعليمية تانية هتعرفوا كله في وقته.

هنا صحى صوتي العميق من غفلته الطويلة وقعد يولول، البنات كلها سهمت وتنحت والابتسامة العريضة ابدت تختفى تدريجيًا ، السنيورة بصتلنا بثقة وابتسامة عريضة وكملت:

السنيورة: هتتعرضوا ل 25 امتحان، 20 امتحان نظرى الحد الأدنى للنجاح نسبته 86% ، و 5 امتحانات عملى الحد الأدنى للنجاح نسبته 96%، أول 20 امتحان مفهمش إعادة، ال 5 الباقيين ممكن إعادة لو وافق المدرب اللي بيديكم المحاضرات وهم مختلفين على حسب المحاضرة طبقًا ، طقم التدريب من كل الجنسيات على أعلى مستوى مئى محترف كل واحد في تخصصه، طبقًا اللي بتنجح بتستمر واللى بتسقط بنرجعها بلدها مشكورة، بعد النجاح بندخل في إجراءات الأوراق الخاصة بالاقامة والبنك والتأمينات واللبس بتاعكم وغيرها كتير وكمان في أوراق كتير داخلية في الشركة أولها طبقًا العقد، البنات المخطوبة مينفعش

تتجاوز الا باذن من الإدارة، متخافوش.. عادي في مضيفات كثير طيارة وهي متجوزة ولو انه بيني وبينكم صعب جدًا على البنات، موضوع الحمل غير وارد بالمرّة وانتي مضيفة جوية وفي شرط في العقد بعدم الخلفة لعدد سنين محدد، بديهي طبعا الكلام ده.. عمرك شفتي مضيفة حامل؟  
البنات: لأ..

السنيرة: ده غير مخاطر الحمل في أول 3 شهور لو كنتي طيارة كمضيفة طبعا ، عشان كده في بنود في العقد بتوضح تفاصيل أكثر خاصة بالجزء ده، في واحدة هنا مخطوبة؟  
البنات (بصوا لبعضهم): لأ!

السنيرة: تمام، في حالة انك تعبتى من الطيران وعايضة شغل على الأرض في الشركة، في الحالة دي طبعا بيكون ليكي أولوية أول ما تكون الوظيفة المناسبة متاحة، لكن لازم يكون عدي عليكى سنتين كاملين كمضيفة جوية، في أسئلة لحد هنا؟ شفتكم مخضوضين؟  
البنات: لا مفيش أسئلة.

السنيرة (ابتسامة عريضة جدًا): بكرة تتجوزا وتخلفوا، متخافوش قوى كده.. الرجالة بره المبني ده كثير وأنواع وأصناف وألوان، اعملى لنفسك مستقبل انتى بس وبعدين على راحتك فكرى في الجواز، صدقونى عن خبرة.

البنات: (ابتسامة باهتة)

هيبى يونج (بصوت واطى): أنا مستقبلى مع اللى هحبه، الحب الأول طبعًا  
مش تقولى أكون نفسى؟ أنا مستقبلى كده ضاع.

بو يونج: اسكتى يا هيبى.

السنيرة: الحضور للتدريب بالزى الرسمي فقط، الجزمة سوداء  
ورسمية مش واطية خالص ومش كعب على جَدًّا. يعني من 3 الى 5 سم  
بالكتير، الحلق يكون "حمصة" ذهب أو لولى فقط، الخواتم الكبيرة غير  
مسموح بها، الا الدبلة ولازم تكون ذهب، أي اكسسوارات في الايد لازم  
تكون ذهب وموديلها بسيط جَدًّا ورسمى، الساعة لازم تكونى لابساها  
باستمرار ولازم تكون معدن أو جلد اسود فقط، أي حلق في الحواجب أو  
الأنف أو الشفايف أو اللسان غير مسموح به، الشعر الطويل لازم يكون  
ألمس ويكون ديل حصان أو كحكة أو شينيوه، الشعر القصير لازم يكون  
ألمس غير مجعد، الشعر المجعد (الكيرلى).. الرسته... السبايكي..ألوان  
الشعر الغير طبيعية الصارخة والغريبة... كل ده ممنوع، الشراب لازم  
يكون لون ايدك يعني لون بشرتك مش لون شاذ عن لون جسمك، الحد  
الأدنى للمكياج ماسكرا وبلاشر وروج مع كونسيلر، المانيكير أحمر أو نبيتى  
أو فرنش أبيض أو على الأقل في ملمع أظافر، التاتو ممنوع في أماكن  
الجسم الظاهرة والوش والرقبة طبعًا ، لازم تاخدي دوش قبل وبعد  
التدريب وتحطى "مزيل عرق" والكلام ده قبل وبعد كل رحلة لما تبدأ  
الطيران لى هيطير منكم! وطبعًا نظافة البنات اللى انتم عارفينها كلها  
مش محتاجة أقول تفاصيل دلوقتى، موضوع النظافة ده بالذات  
زميلاتنا في ال Grooming هيشرحوه باستفاضة في محاضرات

وهيتابعوكم فيه قبل كل رحلة وبيتهياًلى مش لطيفة لو واحدة اتوقفت  
عن الطيران عشان سبب زى ده؟

دفعه البنات أو زى ما كنا بنقول ال Batch كله مادد بوز غريب ولسه  
متنح والابتسامه اختفت خالص!

ليزل (بصوت واطى): هما مالهم ومال التاتو ولون الشعر والحلقان!

"ليزل.. جذابه وحلوه جداً، طويلة، بيضاء، عنيا زرقا، شعرها أحمر (على  
حسب الصبغة) مطرقة في شكلها وفي أفكارها، بتفكرنى بالبوب ستارز،  
منطلقة، مرحة، بتحب المزيكا والرقص والخروج".

نيكالى (بصوت واطى): الخطوط الجوية الأسبانية كمان كانت كده.

"نيكالى من أسبانيا... بيضا، طويلة، عنيا خضرا، شعرها أسود، هادية  
ومحترمة جداً، رزينة جداً، طيبة وكريمة لكن حريصة، بتحسب كل  
حاجة بالورقة والقلم، منظمة، شيك وراقية في كل حاجة".

السنيرة: بيتهياًلى انتو قريتوا أغلب الكلام ده في الايميل بتاعنا لكن أنا  
أحب أكد تاني للى مقراش كويس، وعموما هانوضح كل ده في ال  
Grooming زى ما قلت وفريق العمل هايعلمكم بعد كده ازاي تهتموا  
بنفسكم مع ضيق الوقت وسرعة التنقل من بلد لبلد واختلاف الطقس  
وازاي تستعدوا في نصف ساعة بس في حالة كنتم Stand By. البرفانات  
النفادة غير مرغوب فيها، التدريب بيبتيدي كل يوم الساعة 8 صباحا..  
خط سير أتوبيس الشركة ساعات بيكون فيه أكثر من دفعة، يعني  
هيعدي بالدور من 6 الصبح عشان يلحق يعدي على دورته في كل السكن

الخاص بالمضيفات، أعتقد انتم أول الناس الى هيعدي عليها تبع المناطق لأنكم أبعد كومبوند وبالتالي هتكونوا آخر ناس توصل السكن في آخر اليوم، التدريب بيخلص في الشركة الساعة 6 مساء يعني هتكونوا في البيت تقريبا 8 مساء، قدامكم حوالي 9 ساعات أو أقل عشان تاكلوا وتستحموا وتستريحوا وتذاكروا الى أخذتوه كويس جدًا وتناموا بدرى عشان مايفوتكوش الأتوبيس الساعة 6 صباحا! اعملى حساب زحمة الأسانسير وانزلى لميعاد أتوبيس الشركة قبلها ب 10 دقائق لأنه لو جه ميعادك والسواق ملقاكيش هايمشى ويسيبك، في أي استفسار لحد هنا؟

كلنا: (البوز وهز الوش يمين وشمال كانوا الإجابة)

السنيرة: في كل بناية أمن وكاميرات مراقبة، موظف الأمن بيسجل رقمك "الى الإدارة هاتديهولك النهاردة" وانتي نازلة وانتي طالعة والساعة كام نزلتي والساعة كام رجعتى، مصاحبة بملاحظاته لو في ملاحظات تذكر وده للأمان طبعا ، الزيارات ممنوعة الا باذن مسبق من الإدارة حتى لو الأهل، ممنوع معنا باتا الكلام في الدين والسياسة والكورة لو مهتمين، في تعليمات تانية كتيرة كل مدرب على حدة هيشرحها في وقت لاحق، بعد الاستراحة هانتعرف على كل المدربين مرة واحدة هتتعرفوا هتبتدوا مع مين وهنسلمكم المانيوال.

بالنسبة للسكن.. بلغتكم زميلتى في إدارة الترفيه ان قدامكم شهر عشان تقرروا تكملوا فيه ولا لأ، بعد كده الى هتطلب نقلها هتضطر تدفع مبلغ معين، كل واحدة فيكم معها مفتاحين واحد للشقة وواحد لأوضتها، كل المفاتيح دي عندنا منها نسخ للاطمئنان عليكم من فترة للتانية، السجاير

والشيشة والألكحول ممنوعة داخل السكن ولو الحاجات دي اتمسكت في أوضة بنطلب صاحبها للتحقيق، ساعات بنعمل اختبارات ألكحول مفاجئة قبل الرحلات، ويا ريت لو في فلوس أو مجوهرات نحطها في البنك أول مانخلصلكم أوراقه أو في صندوق مقفول بقفل عشان مفيش واحدة تقول مش لاقية حاجة.

السنيرة: التعامل مع ناس مختلفة من كل العالم مع تغيير الجو وزمايل الشغل كل يوم حاجة مش سهلة، لكن ممتعة، في المقابل افتكرو يا بنات ان بره المبني ده هنا وفي العالم كله في عدد كبير من البنات تتمنى تلبس جزمك؟ عشان كده لازم دايماً تحافظي على صحتك النفسية ومظهرك العام.

السنيرة: شكراً لانصاتكم.. على فكرة في قهوة وكيك بره لى عاوز.. في أي أسئلة؟

البنات: ...

السنيرة (بابتسامه): أشوفكم بعد استراحة 10 دقائق.. أول درس هنا "المحافظة على المواعيد" يا ريت محدش يتأخر.

ساد الصمت الرهيب القاعة بعد أصوات الضحك المتواصل.

أنا (بغنى بصوت عالي): حبيته لكن مبقولشى... اكمنى بحب ومبطلوشى..

صوتي العميق: لا حول ولا قوة الا بالله.. وبدأ التدريب.

# الأمن والسلامة

بدأنا التدريب في جو غريب منعش متفائل وقلق في نفس الوقت، بدأنا أول محاضرة في التدريب والسنيرة بتعرفنا بكل المدربين مرة واحدة، كلهم محترفين، شكلهم يفرح وبخض.

كان أقربهم لنا ديفيد من البرازيل (مدرب الأمن والسلامة)، شاب وسيم طويل، أسمر، مثقف وواثق من نفسه جداً، جد ويعرف امتي يهزر، مش عارفة ليه كان واصلنا إحساس انه قريبنا كلنا! كنت بحس البنات مش بتتكسف منه زى ما يكون متربى معنا!

مبنى باص الشركة بيعدى علينا حسب دور "الكومبونند" في الطريق 6:30 صباحا بالثانية، كانت البنات كلها ملتزمة جداً بالميعاد، بدأنا في الأول بصباح الخير بس، لكن التدريب كان بيقرينا من بعض تدريجيا لحد ما تحول الوقت اللي بنقضيه في الباص من البيت للشركة والعكس الى فقرات فكاهية وألعاب وغنى أورھانات وساعات اتفاق على كسر القاعدة والخروج بالليل بدل المذاكرة عشان نقدر نواصل، أكثر ناس كانت بتعانى من الموضوع ده هم السواقين اللي بنصعد دماغهم صباح ومسا.

البداية كانت دراسة الجزء الأول من المانيوال وهو "الأمن والسلامة" "Safety & Security"، كان التدريب مرهق وممتع وفيه تحدي كبير، لغة الطيران مختلفة والحفظ كثير ونسبة التركيز لازم تكون عالية وفي نفس

الوقت لازم تكونى حذرة مع البنات لأنك لسه مش مدية أمان! يعني تكون واحدة فيهم مش تمام، حرامية. مستغلة أو أي حاجة تانية.

التمرينات مسلية الحقيقة ويتطلب سرعة في الحركة وسرعة تفكير وتصرف، أحلى حاجة انها في الآخر بتقلب كوميديا، كان في تمرين عشان السكرانين لا مؤاخذه على الطيارة ميعربدوش علي مخاليق ربنا الفايقين، كل اتنين مع بعض واحدة سكرانة والتانية هتكلبشها وبعدين يبدلوا، التمرين على قد ما انا فاكرة كان ازاي تهوشه فتكعبله وتوقعه وتكلبشه! لما طيرت مشفتش واحدة من المضيفات عملت الحكاية دي على الطيارة لانها غالبًا بتبقى خايفة من السكران ذات نفسه، التدريب خلانا نحتاج بعض ونتكلم في الجزء الأول من التدريب الخاص بالأمن والسلامة أكثر حاجة صعبة شدتنا وخضيتنا هو الختام بحوادث الطيارات من أول ما اخترعوها لحد آخر حادثة في وقتنا، صعبة لأننا كنا بنتخيل نفسنا مكان اللى ماتوا! وشدتنا عشان فضولنا عالي فقط لا غير (مش المضيفة الجوية لازم يكون عندها فضول وقوية الملاحظة عشان تطبق تعليمات الأمن والسلامة)، كله كوم وأيام التدريب على تنفيذ تعليمات الطوارئ كوم تاني، التدريب على تطبيق التعليمات وسرعتنا في تطبيقها كمان، بعدها كان لازم نتفرج على كوكتيل حوادث طيران من جميع أنحاء العالم تاني.. المدرب الحقيقية مفوتش ولا حادثة، درسنا الحوادث كلها على الشاشة ودرسنا أسبابها ومين و ايه سبب الحادثة؟ الكابتين ولا المضيفة ولا غلط فنى من مهندسين الصيانة ولا الجو كان له دور؟ كل ده مش مهم.. المهم انك تقولى لو كنتى مكان المضيفة كان لازم تعملى ايه؟ هي

غلطت في ايه؟ هي غلطت لانها منفذتش تعاليم المانيوال؟ ولا لأنها مفكرتش بسرعة؟

ديفيد: اهم حاجة في الإقلاع والهبوط ال "Silent Review" أو "30 Seconds Review" متشغليش بالك بأى حاجة في الدنيا غير انك تفكرى في حالات الطوارئ هتعملى ايه، المخرج، اخلاء الكابينة، كل اللى اتعلمناه، أنا ممكن أعيده كله لو حد مش فاهم؟ أرجوكم قولوا...  
نعيمة (بتسبيل): ممكن تعيده؟

"نعيمة من المغرب... سمراء جذابة، طويلة جدًا، غامضة جدًا، قليلة الكلام، أوقات نظراتها حادة مرعبة لكنها شخصية لطيفة".  
ديفيد: بعد المحاضرة أعيد هولك عشان الوقت.

أنا: ديفيد... أنا فاهمة الكلام ده بطريقة نظرية لكن لو قلتلك انى هنفذه عملى أبقى بضحك عليك وعلى نفسى وعلى الشركة.. معرفش لو مكانها هعمل ايه؟

صافية (بصوت مسموع): واش بيها؟ غبية البننت أكيد.

"صافية من الجزائر.. بيضاء أمورة وأطول واحدة فينا، نرفوزة.. صعب ترسم شخصيتها بالظبط، مجتهدة جدًا، صعب تعرف حاجة عن حياتها الا بمزاجها في لحظة صفا، نادرا تشوفها بتضحك الا لو موقف يموت من الضحك".

نادية (بصوت واطى): ياسمين ونعيمة؟

نادية من تونس... غلبانة جدًا. أمورة، خمرية، متوسطة الطول، بنت  
نضيفة من جوه.

ديفيد: هتتفدى المانيوال وتستخدمى مخك! ذاكروا كويس يا بنات، قبل  
كل رحلة بيكون في اجتماع للطيار مع مساعديه وكل طاقم الضيافة،  
الكابتن لازم يتأكد ان اللى طاييرين معاه طقم قوى هيعرف يتعامل في  
حالة حدوث طوارئ. عشان كده قبل كل رحلة ببسأل كل واحد طالع  
الطيارة عن أي حاجة درستوها، أمن وسلامة.. اسعافات أولية.. آخر  
تحديثات المانيوال اللى بنبعتها لكم باستمرار، كل مضيافة على الطيارة  
بيكون لها دور بيتوزع بعد الأسئلة، على حسب دورها هي بتعرف هي  
مسئولة عن انهى مكان في الطيارة (من كرسى رقم كام لكرسى رقم كام)  
وفي الحالة دي بتعرف برضه هي مسئولة عن باب من أبواب الطيارة ولا  
لأ، الدور الوحيد المختلف هو في ال Galley أو مطبخ الطيارة، ده بيعمل  
عمل عظيم على فكرة، ممكن يضيع رحلة وكل حاجة تتأخر أو ممكن  
يسهلها على كل طقم الضيافة والركاب والكابتن هيكون مبسوط طبعًا  
لو كل حاجة خلصت بدرى في الكابينة، كفاية عليكم كده النهاردة..  
المحاضرة خلصت يا بنات، ما تنسوش تذاكروا....

فهمت نظرة عينيه ليا ونبرة صوته في آخر جملة قالها.. بدأت البنات تطلع  
بره القاعة وديفيد نادانى...

ديفيد: ياسمين...

أنا: نعم؟

ديفيد: الكلام اللى قلتيه في المحاضرة يتقال بينى وبينك مش قدام البنات.

أنا: ليه؟

ديفيد: عشان لو وافقتك قدامهم محدش هيتعلم حاجة ولا هياخدوا رخص الطيران ولا هيشغلوا. طالما انتى بتدرسى وفي الآخر مش عارفة هتعملى ايه في وقت الطوارئ يبقى بتدرسى ليه؟ وأنا هنا أصلا عشان ايه؟ وليه بنجح ناس وناس تانية بترجع بلدها؟ فكرى كويس.

أنا: عندك حق.

ديفيد: بصى... يمكن جزء منى يتفق مع صراحتك لكن في الآخر هي كده وهتفضل كده، كلى كويس عشان شكلك عيان و ذاكرى كويس بكرة هسأل.

أنا: حاضر.. باى.

ديفيد في المحاضرة اللى بعدها عرض فيديوهات حوادث لمضيفات جوه الطائرة، الغلطة بعاهة مستديمة!

ديفيد: ياسمين.. شفتى المضيفة دي... مين السبب في العاهة المستديمة؟

أنا: في حالة وجود مطبات هوائية بيعلن الكابتن للمضيفات يرجعوا أماكنهم حتى لو بيوزعوا الوجبات، في الحالة دي لازم المضيفة تقفل ال Lock بتاع cart (عربة) توزع الوجبات لو مفيش وقت وترجع مكانها.

ديفيد: شكرًا ياسمين.. زى ما زميلكتم قالت يا بنات، المضيضة فى الحادثة دي كان فاضلها صفيين مسافرين بس وتبقى خلصت توزيع الوجبات، طنشت اعلان الكابتن عشان المطبات.. لما جه مطب جامد طارت لفوق .. راسها خبطت فى سقف الطيارة ونزلت على الأرض والكراسى كذا مرة بقوة زى ما شفتوا كده، كأن لاعب كوره قدم بينطق الكورة فوق وتحت! والنتيجة انها فقدت عين للأسف!

انا: شكرًا ديفيد.

ديفيد: شكرًا ياسمين، تاني.. الموضوع مش هزار.. استراحة 10 دقائق ونرجع.. محدش يتأخر هقفل الباب ومش هفتحه، كاليانى وهيبى يونج؟ كاليانى: حاضر.

هيبى يونج: (ابتسامة بلهاء كالعادة ضحك على أثرها الأخ ديفيد ومعرفش يكمل جد)

وأنا رايحة الحمام فكرت ان عندهم حق فى حاجات كتير بالنسبة لحوادث المضيضات جوه الطيارة، جنب الحمام كان فى مضيضة تحت التدريب من دفعة تانية بتعيط ومضيضات من دفعتها بتطبط عليها..

مضيضة اللى بتعيط: كل شوية حاجة تختفى! حرام ده خاتم خطوبتى... اكيد هي حرامية.

صوتى العميق: سيادتكم مش داخله الحمام؟

أنا: الحمد لله ان البنات اللى معايا بنات ناس بجد.



## الإسعافات الأولية

عشان نوصل لجزء ال "First Aid" "الإسعافات الأولية" كنا إحنا شخصيا عايزين حد يسعفنا من كم القهوة والشاي والنسكافيه وال RED BULL اللي تعاطيناه عشان نواصل مذاكره مع المحاضرات. هنا معلومات كتير عن الأزمة القلبية والذبحة الصدرية والربو والصرع وازاي تتعامل مع كافة الأمراض الخطيرة والعادية من أدوية الصداع لحد ال CPR أو "عمل التنفس الصناعي" للمسافر لو لا قدر الله قطع النفس وملاحظة المسافرين والتبليغ لو في اشتباه في وباء أو مرض معدي، أكثر حاجة شيقة هنا ال CPR "الإنعاش القلبي الرئوي"، الحرمان والكوميديا.. البنات مسكت التمثال وهاتك يا CPR ..

دعاء: كاليانى سيبى أم الرجل مش هيمرب .. أنا دورى وراكى الله يقرفك..  
يا بنات حد معاه مناديل معقمة؟

شيناز: اكيد بتتخيله حبيبها وعائشة بقى... هي هي هي

"شيناز.. سمرا، أمورة، متوسطة الطول، صاحبة "ليزل" من الطفولة وزمها بتحب المزيكا والرقص والخروج، بتحب الضحك، جدعة جدًا، صريحة جدًا جدًا".

عواطف: ده لو حبيبها بجد مش هتعمل فيه كده.. هي هي هي

عواطف من تونس.. على قدر كبير من الجمال والعقل والغموض، بيضاء،  
متوسطة الطول، نشيطة، جدعة وطيبة.

كاليانى: ده لو هو بجد مش هسيبه... بس هو فييييين؟؟

تسيجيه: ده حبيينا كلنا دلوقتي يا حياتى .. لما نخلص حبيه براحتك.

"تسيجيه من أنثوييا.. سمرة جميلة، طويلة، جذابة، دماغها تساوى  
فلوس، معرفش ليه كنا بنعتبرها أمنا، لو بنت تعبت يبقى على طول "حد  
ينده تسيجيه" وصفاتها الطبية الطبيعية ب 100 دكتور، قوية البنيان  
زى ما بيقولوا، جد وضحكتها جميلة، عندها وعى وادراك على درجة  
كبيرة، حكمها على الأشخاص من أول مرة دايمًا بيبقى صح، مش سهل  
خداها".

المدرّب: دايمًا نفتكر في ال CPR ايه؟

بو يونج: (Airway Breathing Circulation) ABC

المدرّب: عايزكم تبصوا ليو وبلاش كاليانى!

ليزل: Oh my God ... ياللاه نسيمهولك في الآخر.

موموكو: أو تشتري لها واحد في البيت... هسههى..

"موموكو من اليابان.. أجن واحدة فينا، بيضا وشعرها أسود، متوسطة  
الطول، أمورة، تشتري لعب وتعمل مقالب، تضحك على أقل موقف  
بصوت عالٍ، تتعاطف مع أقل موقف عندك، منطلقة وتحب الحياة".

المدرّب: كاليانى....

كاليانى قامت أخيرا وعدلت هدمومها وكأنها كانت بتبوسه بجدا!

وهى بتعدي من جنبنا.. "هي هي هي .. مكنش قصدي أطول أنا كنت بتمرّن بس"

موموكو: الحرمان وحش.. هي هي هي

المدرّب: يا ريت نفتكر ان الرجل اللى مرمى على الأرض ده عروسة!

دعاء: اخص الله يكسفكوا فضحتونا.

عواطف: ياللا صافية أنا خلصت.

المدرّب: التدريب على استخدام أنبوبة الأكسجين هو التمرين اللى جاى.

شيناز (بصوت واطى): حاسة ان المدرّب كان نفسه يكون مكان العروسة... هي هي هي

كاليانى: تفتكرى؟ بس مش حلو، لا يا ختى أنا عايزة واد موز اتمرّن عليه..

دولا: كفاية كده يا بنات

المدرّب: استراحة الغدا يا بنات ومحدث يتاخر عشان عندنا حاجة مهمة جدًّا...

بو يونج: الجزء اللى جاى هو الولادة.

صافية: مطبوط.

أنا: عرفتموا منين؟

بو يونج: انتى مش بتذاكرى الا اللى بتاخدیه؟ اقرى قدام فى المانيوال  
عشان تعرفى انتى رايحة تاخدي ايه، كده مش باقى فى اليوم الا ساعتين،  
نص ساعة للغدا والباقي يفرجنا على فيديو الولادة الطبيعية.

خلصت استراحة الغدا، ودخلنا قاعة المحاضرات اللى اتحولت الى قاعة  
سينما مصغرة، وبدأ الفيديو.. الجزء اللى لا يمكن كنا نفكر اننا هنشوفه  
قبل ما نمربيه فى الحقيقة.. كان جزء الولادة، الأول تحضير الست  
للولادة وتمارينات النفس وعنها والصويت اشتغل، المدرب وطى الصوت  
مشكورا وقعد يشرح الصورة ببرود واحنا واحدة ورا الثانية على  
الحمام.

المدرب: وشكم احمر جداً ليه؟ لا انتوا أعصابكم مش جامدة زى اللى  
قبلكم، عموماً قربنا نخلص لأن للأسف مفيش تدريب عملى، يعني  
هتشوفوا الفيديو وتروحووا.

وشنا كان واخذ نفس تعبير الست اللى بتولد على الشاشة ومش مركزين  
مع المدرب.

عواطف: يا ربى... لازم أروح التويلت.

دولا: عواطف أكثر واحدة دخلت الحمام يا حرام.

أنا: أنا عندي إحساس غريب قوى..

دولا: الجوشوب

أنا: التكييف شغال.. انتى تعبانة؟

دولا: شفتى كيف بنتعب، من أول ما نبلغ الى ما شاء الله.

أنا: إحنا فعلاً قوارير وغلابة والله.

دعاء: بتشحتى على مين؟

قامت عواطف من مكانها تاني وخرجت من القاعة بسرعة.

المدرّب: ها ها ها.. مش فاهم ليه تعبائين قوى كده؟

دولا: ليكى الزلّة زنج وسئيل، شوفي كيف يبطلع على حالنا ومكيف! حل  
عنا بقى كرمال الله، بدنا نروح ناكل وننام.

المدرّب: كان لازم تشوفوا الفيديو كله على فكرة عشان تتعلموا، المشكلة  
ان الموقف ده على الطيارة نادر، لو حد محظوظ هيشوفه على الطيارة  
بيبقى جميل.

في اليوم ده وإحنا في الأنوبيس راجعين كانت تقريبا كل البنات بتفكر في  
منظر الولادة ومحدث بيتكلم، روحنا البيت.. نفس الروتين.. البنات كلها  
اعتذرت عن المذاكرة مع بعض لأنهم تعبائين.

دولا: أنا هظبط المنبه كمان ساعتين وهصحى أذاكروأطبق.

أنا: أطبق دي بتتعبنى، أنا هسهر شوية ولما تصحى هبقى انام.

دعاء: أنا كمان هنام.. ابقى صحينا انتى.

ماريانا: بدي انام.. ياللا طالعة، باى..

أنا: مش هتنامى هنا ليه؟

ماريانا: ما بعرف ياسمين، بدي أنام لحالى، باى

أنا: باى حبيبتي، أنا هاخذ دوش وأذاكر شوية وأعملكم عشا وعصير بدل ال Red Bull الى هرا معدتنا، لما تصحوا تلاقوه.

دعاء: حبيبتي انتى... مووووه

أنا: هو ده اللى باخده منكم... مووووه.. مووووه

دخلت البنات نامت وانا أخذت الدوش وأكلت وذاكرت، الساعة 2 صباحا وقبل ما يصحوا بشوية صغيرين كنت بحضر العصير والعشا، في المطبخ... سمعت صوت دولا بتتاوب في الريسبشن..

دولا: ياسميينيين... حبيبتي؟

أنا: دولا! مش عادتك يعني تصحى لوحدك؟

دولا: يا عيب الشوم عليكى.

أنا: جاياالك..

دولا: لأ.. كفى حالك، بلجتى بالأكل؟ كثير جوعانة.

أنا: قربت أخلص، السنديتشات جاهزة، عاوزه عصير موز ولا فراولة.

دولا: ....

أنا: دولا خالصيني...

دولا: فريز... ها ها ها.

أنا: صبحى دعاء.. بتضحكى على ايه؟

دولا: كثير مهضومة.

أنا: اتجننت دي ولا ايه؟ أمرى لله، أعمل أكل وأصحى.. ناقص أهشكم  
كمان؟ طيب افتح القرآن الله يخليكى.

خرجت من المطبخ بعدها بخمس دقائق ملقيتش دولا، رحت أوضة دعاء،  
فتحت النور (دعاء مستحيل تقفل باب أوضتها عشان بتخاف)

أنا: ياللا يا حلوة اصحى..

دعاء: دولا صحيت؟

أنا: من بدرررى.. قومى ياللا عشان نلحق نذاكرأى حاجة.

سيبتها ودخلت المطبخ أحضر الأطباق وهى راحت أوضة دولا.. بعد  
دقيقتين جاتلى دعاء المطبخ..

دعاء: دولا فى سابع نومة.

أنا: مش معقول لحقت تنام؟ دي من دقائق بس كان مش جايلها نوم  
وقاعدة بره فى الريسبشن صوتها فايق!

دعاء: انتى عارفة دولا والنوم... أنا هاخذ دوش وانتى صحبها.



أنا: لسه كنتى بتكلمينى من شوية صغيرين وطلبتى عصير فراولة، كان صوتك صاحى لحقتى تنامى يا دولا؟ شفيلك حل في موضوع النوم ده.. أنا فعلاً مش مصدقة!

دولا: تقبرينى هلا أول مرة أفيق من وقت ما نمت!

أنا: دولا... انتى لسه كنتى بتكلمينى من دقائق!

دولا: وحياء الله أبداً، كنت عم باكل رز مع الملايكة من دقائق.

أنا: قلتيلى عندك أرق مش جايلك نوم!

دولا: يا حبيبتي أنا نمت بعمق من أول لحظة! انتى بتعرفى عنى هيك؟ أنا بحط راسى بروح.. خلاص.

أنا: دولا.. اوعى يكون مقلب؟ الموضوع جد!

دولا: ياسمين شو صاير معك حبيبتي؟

أنا: الله أكبر... لأ... كده لأ.

حكيت لدولا كل اللى حصل من ساعة ما نامت ودعاء لسه في الحمام.

دولا: ياسمين.. كنت بحلم براجل ختیار بالبيت بيقول انه ساكن معنا هون، ما بعرف؟ أنا بدي أترفلك بسر.

أنا: خير؟

دولا: بتتذكري وقت ما فينتوني وقت ما نمت 24 ساعة وكل البناية كانت عندي بالغرفة؟

أنا: ودي حاجة تتنسى؟

دولا: كنت سامعة كل شيء بالغرفة، كل شيء حكيتوه.

أنا: وليه مصحتيش؟ دي تسيجه وشيناز وليزل وعواطف عملوا كل حاجة ممكن تفوقك، وموموكو عيطت وكانت هيصة! ازاي مصحتيش؟

دولا: بعرف، وحياة الله كان في شيء ثقيل كابس على نفسى ولسانى وعيوني، حسيت ما فيني أتحرك! ياسمين.. بتعرفيني بحكى جد.

أنا: تقصدي حد كان مكتفك؟

دولا: هيدا أقرب وصف، بس ما كان فيني إحكي للبنات هيك حكي لأنى ماني مأكده شو صار! بتفهمي علي؟ دعاء ممكن تترك البيت إذا خبرتها.

أنا: دولا.. الموضوع كده خطر ودعاء لازم تعرف عشان تاخذ بالها ولازم تواجه معنا.

دخلت دعاء علينا...

دعاء: مالكم وشكم أصفركده ليه؟

دولا: دعاء.. بدي إحكي معك.

دعاء: في حد حصله حاجة؟

أنا: هيحصل لو منفذتوش الكلام اللى هقوله ده، وعلى فكرة كده كده مفيش حاجة هتتغير لو نقلنا السكن، أنا سمعت عن بنات حصلها حاجات في كومبوند تاني وشفت بيعتي قصة البنت اللى العفاريت بياخدوا حاجاتها.

دعاء (برعب): عفاريت؟

أنا: دلوقتي الشقة دي تقريبا مسكونة، فيها حاجات مش تمام.

دعاء وشها اصفر في لحظة والدموع بدأت تتجمع ونظرات هلع ...

أنا: دعاء يا حبيبتى اسمعى أحسن لأن الخوف مش هيحل الموقف، فاكرين موظفة إدارة الترفيه قالت ايه على النقل لو طلبناه؟

دولا: ايه أكيد، ممكن يوزعونا منفصلين على الشقق.

أنا: لو قدما إحنا التلاتة على تغيير أكيد مش هنكون مع بعض تاني، طظ في الفلوس، القصة اننا مش هنكون مع بعض، وطبعًا هنبعد عن ماريانا.

دولا: مطبوط.

أنا: الحل من وجهة نظرى كالاتى: كلنا بنصلى والحمد لله.. كل واحدة فينا توزع صلواتها كل صلاة في ركن من الأركان، القرآن سيبوه شغال على طول في الشقة والبخور على قد ما نقدر، وإحنا نفسنا لازم نحصن نفسنا الصبح وبالليل بالأدعية والذكر.

دعاء: (بتعيط)

أنا: القرآن؟ أآآآآه عشان كده لما قتلها شغلى القرآن مرديتش ومشيت!  
وازاى عديت موضوع الدولاب؟

دعاء: هي مين دي يا ياسمين؟ وايه حكاية الدولاب كمان؟

دولا: دعاء حبيبتى... لازم تكونى قوية.. كثير مهم.

أنا: دعاء حبيبتى... ياسمين حبيبتى..... نفس لغة الكلام.

دولا فهمت ان اللى كنت بتكلم معاها أو معاه بنفس النبوة وطريقة الكلام  
والا كان الموقف هيختلف تماما.

دولا: الله أكبر.. الله أكبر... الله أكبر.. "فالله خير حافظا وهو أرحم  
الراحمين"

## علاقات العملاء والخدمة

كنت فاكراه أسهل جزء لكن البروتوكول في التقديم والكلام والوقفة ومعرفة كل وجبات الرحلة تبعا لعدد ساعاتها مكثش سهل على الأقل في الأول، لكن كان تدريب العملى في الجزء ده فعلاً أسهلهم وأكثرهم متعة لنا كلنا.

بعد كلام كتير من المدرب وفيديوهات و presentations....

كاليانى: ما يجيبولنا الأكل اللى في الفيديوهات ده نجربيه؟ هموت من الجوع..

المدرب: كده فهمنا قد ايه الطيارة بتكون مليانة جنسيات وأشكال وألوان وديانات وعقائد وعادات مختلفة تماما عننا، انتم حوالي 23 واحدة و15 جنسية! شوفوا ازاي انتم مختلفين في كل حاجة؟ انتم مثال صغير فكروا فيه، الطيارة كده بالضبط، لازم نحترم أي حاجة مختلفة عننا لأن ده دليل قوى على تحضر بلدك انتى شخصيا، افتكرى دائماً انتى سفيرة بلدك لكل الناس اللى متعرفش عنها حاجة غير الأخبار في التلفزيون.  
البنات: (صمت).

المدرب: شكلكم جعانين؟ معلش استحملوا شوية معايا وبعدين نتغدى.

هيبى يونج: أنا فعلاً جعانة..

المدرّب: يا بنات..كلنا عارفين لما نوطى لحد نكلمه أو نجيب حاجة وقعت على الأرض هنوطى ازاي؟

بدأ يقلد مضيفة بتوطى لمسافر أو بتجيب حاجة من على الأرض، الضهبر مستقيم ونزل ببطئ والرجلين مضمومة طبعًا .

المدرّب: ده الشكل الصحيح..

وبدأ يقلد شكل مضيفة بتوطى لقدام رجلها مستقيمة وظهرها محنى لقدام....

المدرّب: ده الشكل المستفز.. تخيلي مسافر بيتفرج عليكي من ورا ومبسوط قوى؟ فاهمين طبعًا ؟ الا إذا كنتي قصداها؟؟ في الحالة دي يبقى جيتي المكان الغلط!

البنات: ها ها ها ها...

ليزل: كاليانى وهيى يونج مش فاهمين... ها ها ها

دولا: يا عيب الشوم عليكن...

هيى يونج: متعقدوش الدنيا قوى كده! عشان يبقى في اثاره في الرحلة.. أو مال هتجوز ازاي؟

صافية: مخبولة....

أنا: صلى على النبى أنا هعرفها غلطها..

عواطف: هاهاهاها..



أنا: أيوة... كلمة كويسة.

دعاء: ياسمين.. متعلميش حد عربي تاني.

ماريانا: كويسة.. Good.. باليونانى "كالا"..

أنا: كالا.. حبيبتى..

ماريانا: "أغايى مو" .. حبيبتى..

أنا: كالا أغايى مو

شيناز: أنا تعلمت.. "ياللا حبيبي" "خلاص" "معلش"

أنا: لحقتى تتعلمى "معلش"؟!

دولا: بالبيت اتعلموا لغات.. انتبهوا Please..

ماريانا: Sorry ... كثير جد ها البننت.

أنا: ماريانا.. هعلمك مصري وانتي علميني يونانى... اوك؟

ماريانا: Ok baby..

شيناز: وأنا اعلمكم أفريكان وتعلمونى؟

ماريانا: ايه حبيبتى أكيد، ياسمين.. شو قصة العفريت بالبيت؟ دعاء

ضلت تبكى...

شيناز: عفريت؟؟

أنا: خلونا نسمع بيقول ايه عشان دولا هتقوم علينا بالحزام!

## “Grooming” / بالعربي "تبرج"!

الجزء ده من التدريب علم جنسيات كتير في الشركة معنى كلمة النظافة على حسب ما سمعت! وكانت تعليمات المدربة صارمة عليها، التدريب ده كان بيعلمنا نتأقلم كبنات مع طبيعة الشغل الجديدة، نشرب كل نص ساعة كوباية مياه على الطيارة عشان الجفاف لأننا مش مسافرين إحنا كل يوم على الطيارة بنشتغل، ازاي نتعامل مع الدوالى اللى هتملى رجلنا من كتر الوقفة، ازاي نتعامل مع جسمنا اللى هيبوظ عند بنات كتير مننا، يا اما بالأكل عشان نفسيتنا في الأول بعيد عن أهلنا وبلدنا بتتعب أو هيبوظ بفعل عدد ساعات الطيران الكثير (في بعض الأجسام)، التدريب ده بيعلمنا ان الأكل على الطيارة ب 3 أضعاف على الأرض!

المدربة: هناخد استراحة ربع ساعة ونرجع تاني، ممكن تاخدو "سناك" خفيف ومتاكلوش كتير..

بدأنا نخرج قبل ما تكمل كلامها عشان كان دماغنا وجعنا...

كاليانى: يعني هي تخينة وتقولك خلوا بالكوا على وزنكم!

شيناز: مش مقنعة.

دولا: يا جماعة أنا سمعت ان الطيران الكثير لسنين بيتخن غصب عنك.



ديمي: انتي كمان أخذوا منك حاجات؟

أنا: لأ ... كلموني بس.

ديمي: وأنا كمان كلموني!

أنا: زى الفل!

ديمي: أووووووووووه... طيب أنا لازم أمشى وخلي بالك على نفسك، باى.

أنا: وانتى كمان.. باى.

رجعنا التدريب تاني، كان في حاجات في التدريب ده بالذات البنات مصدقوا قفشوا فيها، كل الحاجات المتعلقة بالدايت والوزن والشد والماكياج والشعر والضوافر والعناية بالبشرة.

ليزل: يعني الطبق في الهوا ب 3 من الأرض؟

المدرية: أيوة.

شيناز: أنا عمري ما هديها على الطائرة أنا بتخن بسرعة جدًّا.

بو يونج: كلنا كده بس كل واحدة بتزيد من مناطق معينة حسب الجينات.

اتعلمنا ازاي نواجه تقلبات الجو لو جاية من لندن البرد وبالليل رايحة الهند الحر؟ ازاي نحضر الشنطة الكبيرة والمتوسطة وشنطة الايد، ايه البلاد اللي لازم نخلي بالننا فيها جدًّا، نعمل ايه في البلاد اللي فيها حروب وحروب أهليه وأوبئة والبلاد الفقيرة والبلاد اللي فيها نسبة جريمة عالية والبلاد اللي الجو فيها لا يحتمل فيها زى موسكو في البرد مثلاً ؟

المدرية علمتنا ازاي نحافظ على فلوسنا، ازاي نسترخى وندلع نفسنا وقت اللزوم عشان الشغل مليان ضغط عصبي ومرهق بدنيا ومحتاج تركيز في نفس الوقت، فن الماكياج، الاعتناء بالبشرة، المشية، كل تفصيلة صغيرة بنعملها وإحنا لابسين اليونيفورم لأنك بتمثلي الخطوط الجوية، التفاصيل كانت مرهقة، كل واحدة التفتت للى عايزة تسمعه وبس زى حصة الرسم في المدرسة زمان كده، اللى بيحب الرسم بس هو اللى كان بينتبه.

وبدأت فترات التعب الحقيقية مع بداية الامتحانات في الشهر الثاني، وعرفت ليه لما كنت بقابل مضيفات قدام ويقول أنا مرهقة منمتش بقالى يومين كانوا بيضحكوا.. دلوقتى أنا منمتش من يوم ما جيت! الا ان كل ده كان كوم واللى بيحصلنا على فترات كوم ثاني خالص.

كنت في يوم قاعدة بتفرج على التليفزيون، مارانا نايمة في أوضة دعاء، دولا ودعاء بيسرحوا شعر بعض بالسشوار في أوضة دولا، في الوقت ده كان اعتمادنا على التليفون الأرضي لأننا لسه ما اشتريناش خطوط موبايل، دولا بتكلم أهلها في لبنان والتليفون في أوضتها من ساعة تقريبا (اشترينا سلك طويل للتليفون عشان يوصل للأوض حفاظا على الخصوصية)، في اليوم ده كان سلك التليفون متعقد كالعادة، حاولنا نسلكه معرفناش فكان الحل ان دولا شدته من جوه جامد واتعقد اكرت، فضلت دولا تشد السلك بعنف لحد ما كان هيتقطع!

أنا: دولا... السلك هيتقطع.

دولا: هحكي مع أمى وأرجعه.



طلعت بره بحاول أنسى اللى حصل، بقلب في التلفزيون لقيت عادل امام وسعيد صالح في فيلم قديم، انشكحت قوى لأن الثنائي ده حسنى انى في بيتنا في مصر، ونسيت السلك.

يظهر ان دولا خلصت شعر دعاء وجت وقفت ورايا بتتفرج على الفيلم بقالها ربع ساعة، بقول يظهر لأنى كنت متنحة جدًا على التلفزيون وكأن حد شد وشى في اتجاه معين غصب عنى.. لمحت خيالها بطرف عيني وشميت ريحتها ومش عارفة ليه كانت بتتنفس بصوت عالى في قفايا؟

أنا: هاهاهاها.. يا ولاد اللعيبة...ثنائى مجرم.

دولا: (نفس بينهج)...

كانت دولا بتنهج بطريقة غريبة، بصيت لورا أشوف مالها..

أنا: ما تقعدى يا بنتى مالك.....

دولا: .....

أنا: .....

بصيت على دولا فجأة...يا نهار ملحوس، مفيش دولا... بصيت في جميع أركان الريسبشن...مفيش دولا؟! جريت على أوضتها لقيتها قاعدة نفس القعدة مع دعاء بيعملوا سشوار!! من منظرى ونظرتى لهم دولا فهمت ان في حاجة مريبة حصلت لكن دعاء كدبت نفسها لأنه مينفعش يكون غير كده بالنسبة لها... ممكن تطفش مننا ومن البلد كلها. بصراحة أنا كنت مرعوبة وبحاول أخبى عليهم، السلك والنفس والخيال، وقعدت أفكر اننا

تقريباً كل يوم واحدة فينا بتفك السلك ونصحى نلاقيه معقداً! وكنا بنفتكر ان واحدة فينا هي اللى عقدته تاني ده طبعاً غير اللى حصل قبل كده!

المهم أنا قررت أطنش الموضوع خالص وأرميه ورا ضهري ومفكرش كثير، أنا عاوزة أنجح في الامتحانات.

وبدأت الامتحانات!



أنا: يا ستى مش بعرف والله وكمان عندي فوبيا مرتفعات.

كيم ومارينا: متخافيش...

اتكلموا مع بعض أفريكان كتير أعتقد انهم بيحاولوا يحلولى مشكلتى..

كيم: حد ينط قبلها ويستقبلها..

دولا (بانشكاح): ياسمين.. أنا كتير بحب المياة.

أنا: يا ستى ده وقته؟ ركزى معايا هنا الله يسترک، بقولك ميعرفش أعوم.

صافية: أحسن سباحة فينا هيى يونج..

هيى يونج: بصى أنا هنط قبلك وأمثل ان رجلى فيها تشنج، هقعد شوية تحت المياها وشوية فوق لحد ما تنطى، بس انتى نطى بعدي على طول أحسن يطلعونى وننكشف.. "ليزل" و "كيم" و "مارينا" أول ما أنط زقوا ياسمين بعدي أحسن شكلها خايف قوى، متخافيش خلاص هيزوكى..

أنا: هيزقونى؟

ليزل: متخافيش... مش هتحسى بحاجة خالص.

أنا: هيى يونج لو ما متش ليكى عندي هدية.. انتى بس اطلبى.

هيى يونج: لما نروح علمونى الرقص الشرقى.

أنا: مين؟

الى يوم التخرج

## وأخيرا بقيت "مضيفة جوية"

أخذت دوش ودخلت أوضتي، لقيت على السرير الآتي: طقم اليونيفورم كامل جاهز! الشراب الى هلبسه! الجزمة اتلمّعت! علبة الماكياج ومزبل العرق والبرفان! المشكلة ان على حسب ما أنا فاكرة لو ذاكرتى مضربتش وجالى فيروس فى مخى على فجأة. أنا مطلعتش حاجة ولا لمعت الجزمة؟ ولا ماكياج ولا شراب ولا أي حاجة! يمكن أي حد من البنات؟ ماريانا بتلبس فوق، دخلت أوضة دولا..

أنا: بتحطى ماكياج؟ ممممم.. حلوقوى، بقولك.. شفتى الشراب بتاعى؟

دولا: لا حياتى إذا بدك معى بالخزان هونيك، شوفى لون بيلبلك.

يبقى مش دولا؟ دعاء بتاخذ دوش ومطلعتش لبسها أصلا! مين الى بيساعدنى وبيحتفل بيا؟ قررت أطنش على الآخر لأنى تعبانة ومش ناقصة ارهاق ولأن جه اليوم الى شفتنى وأنا ناجحة بجد، اليوم ده كنت فرحانة أكثر من أي شهادة خدتها فى حياتى، عشان تعبت بجد، النهاردة يوم التخرج واستلام رخصة الطيران الدولية والتحضير لاستلام أوراق كثير من الشركة.. البنات كانت مبسوطة وعندها شغف وفضول للطيران ودخول عالم جديد كله أسرار وحواديت ووجوه جديدة كل يوم... كل يوم جديد.. مفيش كده أبداً.. باى باى ملل، التفاؤل والقلق هما السمة المشتركة النهاردة، لبسنا "اليونيفورم" بشكل مختلف او شفناه بشكل مختلف والماكياج كان أثقل شوية والجزم والشنط اتلمعت أكثر والبرفان

كان أعلى وأكثر، شهيقي وزفير، النهاردة هنشوف ال CEO بشحمه ولحمه  
يا ناس..

الأتوبيس قبل ميعاده تحت وكل الدفعة قبل ميعادها برضه تحت، المبنى  
كله ساكت! محدش بيتكلم ولا يضحك ولا يهزر، ضحك السواق الهندي  
وقالنا " النهاردة حفلة التخرج؟" ردت عليه كاليانى " أيوة"، ضحك  
السواق كأنه عارف باقى السيناريو! وصلنا الشركة. كله نزل فى هدوء،  
أسانسير للدور الرابع، غرف المحاضرات منظمة بطريقة مختلفة، مظاهر  
احتفال واضحة، منصة لل CEO ورؤساء أقسام التدريب والمدربين اللى  
طلعنا عندهم وزينة فى المكان، بعد كلمة ال CEO وتسليم الشهادات  
ورخص الطيران، كان الجو مهيب واحساسنا بالتعب راح أو احساسنا  
بالزهو أو الغرور تملك مننا شوية أو تملك كتير، ناس كتير بره المبنى ده  
تتمنى تكون مكانى (زى ما كانوا بيقولو لنا دائماً ) دي حقيقة أزيلىة من  
يوم ما اخترعوا الطيران. الجميل فى كل ده انى كانت نايمة من أول  
الحفلة تقريبا والبنات كانت شغالة زغد وضرب فىا لحد ما ال CEO  
بشحمه ولحمه نده عليا..

ال CEO: البنات اللى فى النص، إذا سمحتى انتى صاحية؟

معرفش ازاي صحيت؟ يظهر كذا بنت قرصتى فى نفس الوقت وانتهت..

أنا: أيوة طبعا .. أنا بس كنت بابص تحت.

ال CEO: أعتقد أحسنلك تبصى فوق.

نظرة الرجل وكلمته حسستى إحساس مخيف مش لطيف فوقت على  
أثره ومعرفتش أنام تاني من يومها لحد دلوقتى....وبدأت الرحلات.





والاسعافات الأولية والخدمة. ودولا كانت الناحية الثانية مع مضيئة ايطالية.

أول ما المسافرين طلّعوا الطائرة حسيت باحساس "Julia Robert" لو مشيت على رجلها في وسط البلد بالقاهرة! إحساس منعش ومرهق يا جماعة، الركاب كلهم عايزين يتصوروا معايا! المضيفات كلهم كمان "Julia Robert" والمضيفين "Johny Depp" أما الطيار بقى كان "Al Pacino"! اتنين ورا اتنين اتنين يتصوروا معايا ومبسوطين جدًّا، وبعدين بقى صورة جماعية لطقم الضيافة مع المسافرين!

أنا: دولا... هو في ايه؟

دولا(برقت ومدت شفتها التحتانية لقدام): ما بعرف بس بيعقدوا!

أنا: ايجور.. هما بيعملوا كده ليه؟

ايجور (بثقة وحبّة غرور عدل ياقّة القميص): هما بيعاملونا دايمًا في كولومبو على اننا ستارز... مثلى أنك نجمة، مش بطل برضه..

صوت الكابتن: السيدات والسادة: لقد تحولت علامة ربط حزام الأمان، يرجى اتخاذ مقعدك وربط حزام الأمان وإبقاء مقعد ظهرك في وضع رأسي. إذا كنت جالسًا بجوار احدي مخارج الطوارئ يرجى قراءة بطاقة التعليمات الخاصة بمقعدك بعناية، رجاء غلق التليفونات المحمولة وأجهزة استدعاء وأجهزة الراديو وألعاب التحكم عن بعد وذلك طوال مدة الرحلة، حيث أن هذه البنود قد تتداخل مع أجهزة الملاحة الخاصة بهذه الطائرة، نذكركم بأنه يمنع منعًا باتًا التدخين على متن رحلتنا

الجوية، إذا كان لديك أي أسئلة من فضلك لا تتردد في طلب مساعدة احدي طاقم الضيافة وشكراً لكم. أتمنى لكم رحلة سعيدة.

"Cabin Crew take your seats for take off" طاقم الضيافة الرجاء اتخاذ أماكنكم استعدادا للاقلاع"

قعدت على الكرسي المخصص ليا تبع وظيفتي الى اتوزعت في الاجتماع الى قبل الرحلة.

ايجور: مش عارفة تربطى الحزام عشان مختلف عن المسافرين..

واتعلمت من ايجور أبسط شيء وهو ربط حزام أمان الخاص بالمضيافة، أنا ودولا عملنا البدع عشان نكون واثقين من نفسنا لكن الحقيقة ان أنا تحديدا من غير ايجور كنت هارجع التدريب تاني، فضل الراجل مشكورا ينصح وينصح وينصح من غير يأس.

"تن تن.. تن تن" ..

ايجور: إشارة فك الحزام معناها لازم نسخن الأكل ونحضر عربيات الوجبات حالا بعدد الكراسى الى انتى مسئولة عنها، ونطلع الكابينة في أسرع وقت ممكن .

بعد شوية..

ايجور: أنا وزعت أغلب الوجبات وسبتلك الشاي والقهوة، أنا عاوزك تسرعى شوية، وهبقى أقولك انتى غلطى في ايه في إجراءات السلامة.

طبعًا بطئ السنين، جرى ايجور عليا يساعدنى عشان كله خلص الا أنا  
وإحنا المفروض فريق عمل واحد عشان أنا لسه جديدة.

أنا: أنا آسفة.

ايجور: على ايه؟

أنا: بطيئة جدًا.

ايجور: عادي، كلنا كنا كده في أول رحلة.

أنا: طب سيبني دلوقتى وأنا هاسرع عشان عايزة أتعلم.

ايجور: زى ما تحبى.

رجعت أبص للناس الطيبة دي اللى عمالة تبتسملنا من غير سبب.

أنا: Tea or coffe?

الناس تبصلى وبتتسموا!

أنا (أكرر): شاي ولا قهوة؟

الناس ابتسامتها وسعت أكثر وبشئى من البلاهة مش عارفه ليه!

أنا: مياه؟

بدأت رأسهم تتهز يمين وشمال، يا فرج الله.. على الأقل هز الراس علامة

برضه.. بس على ايه ياترى؟

أنا: عصير؟

راسهم تميل يمين وطبعاً بنفس ذات الالبتسامة..

أنا: يبقى قهوة؟

راسهم تروح شمال والالبتسامة توسع أكثر على وشوشهم!

أنا: يبقى شاي؟

الهمز شغال بسرعة أزيد وكأنهم عاوزين يقولولى حاجة؟ راسهم راحت يمين وشمال بحركة فجائية وبصوا لبعض وضحكوا بصوت عالٍ! يكونش بيشتغلونى؟ دولا بتكلم زميلتنا وداخلين ال "Galley" (المطبخ اللى فى آخر الطائرة بلغة الطيران). يعنى مش هينفع أسألها، ايجور كان يراقبنى من بعيد.. جرى عليا وهو بيضحك..

ايجور: بدلى اماكنا وشوفي هعمل ايه؟

وفجأة لقيته بيعدل فى هدومه وكأنه هيفتح عكا..

ايجور: شاي ولا قهوة؟

صوتي العميق: هز الراس اشتغل يمين وشمال.. قابل بقى يا معلم.

ايجور: شوفتى هزو راسهم ازاي؟

أنا: شفت!

ايجور: الحل بسيط، فى الموقف ده انتى ماسكة الشاي بايدك اليمين والقهوة بايدك الشمال.. اللى أتقل صبيهم منه وريحى دماغك!

أنا: يا رايى ارجل؟

ايجور: بس خدي بالك.. الكلام ده هنا بس مش في أي بلد تعملى كده.

وفعلًا قدم قهوة لباقي المسافرين لان كل اللي سبقوهم أخذوا شاي وخلصوه فكان الحل ان يبادلهم نفس الابتسامة والهز ويحطلمهم قهوة فيرجعوا تاني يبصوله ويتسموا ومهزوا راسهم! وخلص... فين المشكلة؟ خلصنا في 5 دقائق ورجعنا لوقت الراحة بتاعنا اللي قرب يخلص.

أنا: انت متعود تساعد زميلك الجدد كده؟ أصلى سمعت ان أغلب ال crew القديم قتم!

ايجور: بساعدك لله.

أنا: لله؟!!

ايجور: مش إحنا في كل رحلة بنتغير واحتمالات اننا نتقابل تاني ضعيفة؟

أنا: آه.

ايجور: يبقى لله، لا بعاكس ولا بارسم ولا عايز منك حاجة ولا متراقب وهاخد مكافأة علشان ساعدتك، باقولك ايه مش عاوزه تاكلى حاجة؟

أنا: لا ماليش نفس، بس انت قولى بقى لله الناس دي كده ازاي؟ أنا كنت هموت من الضحك في الكابينة وانت بتقولى اللي أتقل صبيلم منه!

ايجور(وهو بياكل): بصى يا ستى.. الناس اللي في الدرجة الأولى اللي من أهل البلد متعلمين وبيتكلموا لغات وغالبًا معاهم فلوس واللى في درجة رجال الأعمال شرحه أو ممكن يكونوا موظفين في مستوى كويس، أغلب

الى في الدرجة الاقتصادية دول عاديين. ده في كل البلاد. لكن هنا الى في الدرجة الاقتصادية أغلبهم عمال وغلابة وفقراء جدًا بيشتغلوا في بلاد تانية. مايعرفوش غير لغتهم وكام كلمة انجليزى يمشوا بيها حالهم فغالبًا آخرهم شاي ولا قهوة الى فاهمينها منك.

أنا: طيب يبقى فاهمين أهه؟

ايجور: هما فاهمينك طبعًا وبيردوا عليكى.. انتى الى ما فهمتيش!

أنا: أنا؟

هنا شفت مسافر من الى هرونى هز راس وابتسام جاى على الحمام. دخل لكن ما قفلش الباب عليه من جوه!

ايجور: هز الراس يمين وشمال ده معناه الموافقة على الى معاكى ومش فارق معاهم شاي ولا قهوة، هما مش بيقعدوا في أماكن وحد يخدم عليهم، كانوا مبسوطين طبعًا ، ناس زينا كانوا لسه بيتصوروا معاهم من شوية عشان يورو الصور لأهلهم رايعين لحد عندهم بمنتهى الذوق نقولهم شاي ولا قهوة!

أنا: (اتأثرت بكلامه وأكيد بان عليا)

ايجور: ما تتأثرينش قوى كده. لسه ياما هاتشوفي، دي حكمة ربنا على الأرض، عشان تفهمى لازم توصلى لجزء من حكمة الخلق من الأساس.

أنا: ده كلام كبير قوى...

ولسه هادخل في حوار عميق كان المسافر الى في الحمام فتح الباب فقابلتنا ريحة أعمق، انتفضنا على أثرها نجيب معطر، معطر مين بقى.. هي كده اتشمعت، دخلت الحمام عشان أنضفه (الناس اللي متعرفش ان المضيفة الجميلة مع كل الشياكة والعنتظة دي لازم تنضف الحمام كل 15 دقيقة على فكرة)، المهم الحمام كان انتهى والحمد لله فعملنا له Block وده معناه ان وظيفة الحمام ده انتهت لأخر الرحلة عشان نجيب م الاخر. بعد ما قفلنا الحمام، كان لازم نستعد للوجبة الثانية وهى وجبة خفيفة غير الوجبة الأساسية اللي فاتت، وبمجرد ما بدأنا لقيت كل الناس وأنا في الكابينة بتشاورلى بصباح أيديها الصغير! صباح الخنصر بيتلوى بسرعة لجوه الايد وبراهها في نص دايرة! كل ما أمشى شوية ألقى نفس الابتسامة إياها والصباح شغال! حاجة عيب دي ولا ايه؟ ولا يمكن اتضايقوا متى عشان ما فهمتمش ساعة الشاي والقهوة؟

ايجور: أنا وزعت خلاص قدام روى انتى شوفي اللي خلص أكل لى منه وأنا باوزع ورا عشان الوقت.

صوتي العميق: الناس صباها ماوقفش وعددهم بيزيد! يا ترى الرجل ولا الست اللي يراقبوكى برضه بيلعبوا بصباهم كده؟

ايجور: إحنا وقتنا كده ضيق، خلى بالك من الوقت.

خلصنا ورجعنا لأن في حاجات تانية نعملها، الصوابع شغالة وسرعتها بتزيد!

أنا: باقولك ايه؟ في كذا مسافر بيوصل بيصاعه كده (قلدت حركة الصباغ) بس والله أعلم كده شكلهم مش مبسوطين زى ما كانوا بهزوا دماغهم!

ايجور: عرفتي منين؟

أنا: أصل ماكانوش بيضحكوا كالعادة وملامحهم متغيرة شوية؟

ايجور: وانتي قلتهم ايه؟

أنا: ولا حاجة.. ابتسمت.

ايجور (يضحك): روى هزيلهم راسك زى ماعملوا معاكى في الشاي والقهوة .. دول عايزين يدخلوا الحمام! ملامحهم اتغيرت عشان مزنوقين لا مؤاخذة..

أنا: بيستأذنوا عشان يدخلوا الحمام؟

ايجور: هما اتعودوا يستأذنوا في أي حاجة، فبيستأذنوا عشان يروحوا الحمام.

ايجور: روى الحقيهم بقى قبل ما يعملوها بره.

أنا: لا والنبي.. بره ايه ده إحنا مشغلين ال economy دلوقتي بفردة حمام واحدة .

جريت على الناس هزيتهم راسى راحوا قايمين كلهم مرة واحدة وطواير على الحمام! والباقي أكيد عارفينه 😊. وبالتالي ماقدرتش أكل أي حاجة في الطائرة.



رجعت لنفس التنريحة لبطل محلى يبرقص ويعيط ازاي معرفش!

أنا: أنا بدى؟ هاتسبيني لوحدي كده أول يوم؟ كده يا.....

نامت دولا كالعادة وفي ايدها الريموت، وخرجت من الأوضة على تحت  
أسأل موظف الاستقبال اللى قابلنى بابتسامة عريضة الحقيقة.

أنا: لو سمحت.. المطعم فين؟

الموظف: المطعم اللى في الفندق؟

أنا: أيوون.

الموظف (ببرود وابتسامة واسعة): قفل.

أنا: قفل؟

الموظف: من نص ساعة.

أنا: يادي الحظ! هو مفيش غير مطعم واحد في الفندق؟

الموظف: للأسف.

أنا: طب خدمة الغرف؟

الموظف: بيروحوا بدرى.

أنا: طيب أكل فين؟

الموظف: في مطعم وسوبر ماركت قريبين من هنا.









## إلى كراتشي

"عاصمة باكستان – عند نهر السند"

عدت ال Observation Flight الأولى "رحلة المراقبة" على خير طالما انى مرجعتش للتدريب تاني والحمد لله، فاضل زلطة أو رحلة يعني وماطلعش بره، في الرحلة الثانية كانت معايا "ماريانا".

قبل كل رحلة بيتعمل اجتماع لكل طقم الضيافة مع الطيار ومساعدينه، عبارة عن ملخص للرحلة عبارة عن معلومات عن الرحلة نفسها زى هنتطير على ارتفاع قد ايه، الرحلة فيها مطبات هوائية ولا سكتها سالكة، معانا مرضى وأموات على الطائرة ولا لأ؟ شوية معلومات عن البلد الى رايجنها من عينة ما تخرجوش لوحيدكم وماتلبسوش ذهب وماتاخدوش كل الفلوس أحسن يطلع عليكم حد يموتكم ولا البلد أمان؟ معانا حد مطلوب القبض عليه في بلد تانية ومترحل ولا كله سليم؟ تنتهى القعدة دي بشوية أسئلة في المانيوال عشان الطيار يتأكد ان الناس بتوعه هايتصرفوا مظبوط في حالات الطوارئ! يوزع الكابتن الأدوار على الطائرة وبعد ما يخلص ينادي على ال Grooming Check Team (اللى هو يعني اتنين بيعجوا يتأكدوا ان طقم الضيافة كلوا نضيف.. مستحمي وريحته حلوة ومش مخل بقوانين الشركة المظهرية).. كل دول قربوا يخلصوا، بس لاحظت ان زمايلنا النهاردة كارهين نفسهم شوية في ال economy اللى هو الجزء اللى يشتغل فيه، كانت المضيفات كالاتى: المصرية والقبرصية

ومضيفة تالته أسبانية وولد هندي وبنث ماليزية وولد من جزر سيشل ومديرة الليلة باكستانية.

بدأت الرحلة بثئ من الثقة مقارنة بأول رحلة، يظهر "ايجور" عنده حق.. أكيد هتعود؟ وبدأت كل ال checks اللي بتعملها المضيفات قبل الرحلة، أنا شخصيا كنت في منتهى السعادة.. ماريانا مش بتحب النوم زى دولا، باكستان برضه ثقافة جديدة خالص علينا وإحنا الاتنين بنحب المغامرات هبل.

بعد ما خلصت كل إجراءات ال security Checks أو التفتيش الأمني، اترصينا زى النمل كالعادة عشان نستقبل الناس بتحية "Welcome on Board" وبدأت الناس تهل علينا واحد ورا الثاني، أول واحد عدي.. أنا وماريانا بصينا لبعض بصة إحنا الاتنين فاهمينها كويس.. "يا رب ما يكون في ال zone بتاعتي... ياااااااا رب! الراجل دخل الطائرة وهبو طس وشوشنا، "افففف"، كان عيب جدًا ونترقد فيها لو مسكنا مناخيرنا طبعًا ، ماريانا عطست وأختكم وراها على طول، ويظهر كده ان العطس كان عليه وهو داخل؟ بصت لنا ال Cabin Senior (أو الست المديرية زى ما كنت باسمهم) بصة معينة كده برضه إحنا عارفينها، ودي غالبًا بيصوها للناس الجديدة بمعنى "لموا نفسكوا"، قلت لماريانا بعيني "لازم نتحمل".

دخل تاني واحد، نفس الهبو الأولاني! ابتسامتنا خفت شوية...  
"Welcome on Board" !! كح كح كح "

تالت واحد... هبو أنأح من اللى فاتوا!!! الهبو غير مكان راسنا لورا  
وفضلت أجسامنا مكانها قدام! لأ بقى؟ هما مستقصدنا ولا ايه؟ مالت  
عليا "ماريانا" وقالتلى بصوت واطى:

ماريانا: شكلمهم كلهم هيك؟

أنا: يا لهوى!

رجعت ال Cabin Senior أو الست المديرية زغرتلنا زغرة المرة دي بانذار  
غير صريح.

رجعنا راسنا مكانها لقدام أنا وماريانا... "Welcome On Board" ، الرابع  
والخامس الى آخر "الأنفار" كانوا على نفس درجة الرائحة المهيبة. بدأنا  
نساعد المسافرين في ترتيب شنطهم ونقفل مكان الشنط اللى فوق  
كراسى المسافرين، الريحة كده خلاص لبست الكابينة كلها... لا مفر،  
نستحمل بقى الكام ساعة دول ولنا الله وإحنا رايجين وإحنا راجعين  
طبعًا .

الكابتن: "cabin crew prepare for departure" "طاقم الضيافة  
..الرجاء الاستعداد للاقلاع"

شوية والأبواب اتقفلت، وبدأنا نتأكد ان هؤلاء الناس المحترمين في  
الوضع الصح والأحزمة مربوطة ومفيش أي شنط ممكن تكعبل الناس في  
حالة اخلاء الطائرة لو في طوارئ لا سمح الله.



الست المديرة: طب اتفضلى روى بقى ساعديهم ورا عشان تطلعوا ال  
"Hot Towel" (القوط السخنة لتنظيف الايدين قبل الأكل).

أنا: OK.

جريت ورا زى ماقالتلى صحيح بس مش عشان القوط، لأن كان نفسى في  
شوية كالونيا، في الوقت ده كان كل طموحى انى أتنفس بس، بضرب  
بعينى يمين شفت ماريانا بتعمل نفس اللى هاعمله..

ماريانا: شو قالتلك اللى حمارة المديرة؟ شفتها كثير معصبة.. ما هيك؟

أنا: كويس انك مشيتى، بصى.. دول بلدياتها برضه، عادي بقى.

ماريانا: ياللا نساعدهم عشان ال "Hot Towel" تطلع.

في هذه الأثناء كانت الريحه تحورت وتمحورت شوية، مش راحت لا قدر  
الله، تحورت بس، المضيفات كلهم رشوا كالونيا فتفاعلت مع ريحة  
الكابينة فبقت حاجة تالته خالص، جهزنا كل حاجة وطلعنا على الناس  
الى بره أنا وماريانا نقدم القوط، توزيع القوط يبتدي من قدام لورا  
وتقدم في صينية، المضيضة بتكون لابسة جوانتى مؤقتة في ايديها وتقدم  
القوطة بملقاط كبير عشان مينفعش ايدها تلمس القوطة! القوطة  
معقمة عشان المسافرين يسمح ايده فيها قبل الوجبة، ايده بس يا جماعة!  
وكذلك لم القوط تاني من قدام لورا وبيكون في صندوق صغير بنفس  
الملقاط والجوانتى.. تمام كده، حسوكة مالهاش مثيل أهو عشان  
النضافة!

من قُدام لورا بالتوازي أنا وماريانا كنا بنقدم الفوط والريحة مبهففة مع تكيف الطيارة، لمحت زمايلنا القدام وهما بيجهزوا الوجبات ورا باصين علينا وبيضحكوا ضحك مفرط! خلصنا ورجعنا ورا تاني، كان المانيوال بيقول ان اتنين يوزعوا واتنين تانيين يلموا، المضيفات القدام اللذاذ مشغولين بانهماك مفتعل في الشغل واعتدروا انهم بيعملوا حاجات تانية كثير!

المضيفة الماليزية: انتو لسه بالجوانتى والعدة كلها، ياللا روحوا لموا الفوط بسرعة عشان نقدم الأكل.

بصيت لماريانا بصة شك لمحيتها المضيفة القديمة قامت واخذانا في دوكة.

المضيفة الماليزية: ياللا ياللا بسرعة عشان الست المديرية بتشاور من ال Business Class (رجال الأعمال) أهو عشان ننجز؟

أنا: ماشى.

غمزت لنا المضيفة الأسبانية وقالت: على فكرة يا بنات الحمام ده Blocked (مغلق)... ماشى؟

لا أنا ولا ماريانا فهمنا إيه لازمة الغمز يعني؟ رجعنا من الأول عشان نلم الفوط، هنا كانت الريحة استفحلت وتوحشت وتوغلت ودخلت في بلعومنا مش عارفة إزاي؟

أول واحد أخذت منه الفوطة ماقدرتش أصدق عونيا الدوز.. وفجأة سمعت عطسة على الشمال.. كانت من ماريانا على وش المسافر اللي

بتأخذ منه الفوطة! بصيت على ال crew اللطيف اللي ورا، كان عندهم كبريزة ضحك! جالى إحساس ان ده برنامج "الكاميرا الخفية"! لا يمكن كل اللي بيحصل ده حقيقى! الفوطة في بادئ الأمر كانت بيضاء ناصعة البياض، تحولت بقدره قادر الى سواد فاحم! لثوانى خيالى البرئى مقدرش يتخيل ازاي؟ لدرجة انى تخليت المسافر بيدينى حاجة تانية! بعدها بثوانى معدودة بابص على الراجل اللي ادانى الفوطة بنظرة فاحصة شاملة جامعة لقيته قالع الجزمة، بابص على كل الكابينة لقيت الناس كلها قالعة الجزم والشباشب والفوطة سارحة في كل حته في جسمهم! الأول أيديهم عشان الحق يقال وبعدين كأنك بتتوضأ بالظبط.. مسحة من الرسغين الى الكوعين وبعدين الوجه الكريم والأذن التنظيفة والقفا الجميل ومسحة على الشعر وأخيرا الرجلين متخللين الأصابع! وابتسامه عريضة كلها امتنان وسعادة وانتعاش وهما بيدونا الفوط وكأنهم استحموا! كان لازم نلم الفوط بسرعة، ماريانا على شمالى كانت بتلم الفوط بسرعة وبعصبية ومناخيرها ووشها وودانها قلبوا أحمر فاقع.

بعد ما لمينا الفوط رجعنا على المطبخ نوديمها في السلة المقفولة بتاعتهم، آثار الضحك المमित على وش البنات.. بصيتلهم بصة حاقدة وعقلى الباطن بيتوعد "هاطلعوا على جتتكوا لو صدف وقابلت واحدة فيكم في رحلة تانية.. بس مش النهاردة عشان ماتنفخش"

المضيقة المالبزية (بلؤم): انبسطوا؟

ماريانا كانت تهم بفرش الملاية القبرصية لكنى غمزتها انه فوّتي مش وقته..  
خلينا ناكل عيش، ماريانا بصيتها نفس البصة بتاعتي اللى فاتت ومشيت  
ناحية الكابينة.

المضيفة الماليزية: شكلكوا انبسطوا.. ياللا بقى عشان توزعوا الوجبة؟  
رجعت ماريانا تاني لما سمعت كلامها ولسه هترد كانت الملاية المصرية  
خلاص اتفرشت..

أنا: نفععععععم.. مين اللى هيوزع الوجبات؟  
المضيفة القديمة (بتحدي): ال cabin Senior هي اللى قالت كده...  
عشان تتعلموا.. أصلكوا لسه جدّاد!!

أنا وماريانا كتمنا نفسنا بغیظ والبت القديمة دي حاطلنا ايدها في  
وسطها وعنينا بتضحك عشان عارفه اننا جدّاد بقى ولسه في فترة  
المراقبة بمعنى آخر قابلين للمرمطة وأخرنا بصات الغیظ دي وشكرًا،  
فعلاً "ان كيدهن عظیم" صدق الله العظیم.

أخذنا ال Meal Cards أو العربة اللى فيها الوجبات وفوقها مياه وجميع  
أنواع المشروبات عشان المسافرين ياكلوا ويشربوا ويشبعوا وينبسطوا  
وخرجنا بيها على الكابينة، وبدأت رحلة العذاب في توزيع الوجبات لأنها ما  
ينفعش تكون بسرعة ولا بعصبية زى فقرة الفوط، ده أكل سخن  
ومشروبات ممكن تدلق عليهم وعلينا وعلى اللى بيراقبنا ومش بعيد الست  
المديرة ترمينا من الطائرة لو حصل كده.

بابص على شمالي عشان أظمن على ماريانا، شفت أغرب وأطرف مشهد ممكن تشوفه وأراهن أنه لم ولن يتكرر في أي خطوط طيران، كانت لابسة ماسك! الماسك اللى بنبلسه في حالات الإسعافات الأولية، جابته منين؟ يعني ازاي فتحت شنطة الإسعافات الأولية كده من غير حالة مرضية واحدة على الطائرة! ولا ده كان بره كده ولا ايه؟ قامت المضيفة القديمة اللذيمة فتنت للست المديرة في ال Business Class في درجة رجال الأعمال في تليفون الطائرة، بسرعة البرق كانت الست المديرة فوق راس ماريانا بتزعقلها بصوت واطى عشان تقلع الماسك، قلعت ماريانا الماسك وابتدينا في توزيع الوجبات، لما وصلنا لنص الكابينة كنت خلاص اتعميت وبدأت أكح وباموت، ماريانا حطت مشبك فوق مناخيرها! المرة دي بقى ضحكت بصوت عالى، وطبعًا لقيت الست المديرة فوق راسى أنا المرة دي، بس الحمد لله مش هاتقدر تشوف وش ماريانا..

الست المديرة: ممكن أعرف بتضحكى على ايه؟

تجاهلت انى أبص على على ماريانا اللى سبقتنى بصفين في اتجاه آخر الطائرة، يعني قربت تخلص ال zone بتاعتها، وركزت عنيا على المسافر اللى قدامى اللى فهم الموقف وطلع شهم (البنات مش بتحط ايدها في وسطها الا في ثلاث حالات: اما اعتراض أو تواعد أو الاتنين سوا)، المسافر قرا لغة الجسد سريعاً وكلمها بلغتهم ويظهر قالها انه هو اللى بيضحكنى! كانت لطيفة جدًا معاه وبتوظ على عشان تسمعه وايد بتطبطب عليه والايدي الثانية قال يعني لسه سائدة عليا بيها ومش قصدها وزغدتنى زغدة قوية!

أنا: أأأى..

الست المديرية: خلى بالك من شغلك وبلاش الضحك المتواصل ده.

بصيتها بزغرة أكثر من الزغدة اللى زغدهاالى وقلتها وأنا بجز على سناني  
"حأااااضر"، المسافر الباكستاني الشهم احنى راسه لتحت "العفو" ..  
فقلته بتلقائية "أنا متشكرة"، ابتسم وأخيرا أتكلم

المسافر الباكستاني: خلى بالك على نفسك وماتخدش بالك من غيرة  
الناس.. التحيز والعنصرية شيء فطرى بين البشر.  
صوتي العميق: صحيح الناس مش بشكلها.

أنا: حضرتك في رحلة عمل؟

الراجل الباكستاني: بشتغل عامل بناء.

أنا: ورايح باكستان أجازة.

الراجل الباكستاني: أيوة.

أنا: بس ازاي فهمت انها كانت بتزعقلى وصوتها مش واصلك؟

الراجل الباكستاني: أنا ملاحظك انتى وصاحبتك من بدرى، ومقدر اللى  
انتو حاسين بيه وفاهمه كويس، وزميلتك الباكستانية متعصبة لأهل  
بلدها طبعًا .. طبيعى.

صوتي العميق: يعني ازاي الراجل هايقول على نفسه أنا معفن وانتي عندك حق تترفي! أكيد هو نضيف؟ ايه يعني عامل بناء؟ النضافة مش بالمستوى الاجتماعي أبدًا.

شكرت الراجل من كل جوارحي اللي لسه شغالة ومشيت وأنا لسه تحت تأثير كلام الراجل ده وطريقة تفكيره، يا سلام لو كلمة "تعصب" دي تتلغى من القاموس! دخلت الحمام اللي اكتشفت ان المضيفة الأسبانية قفلاه من الأول قال يعني بايظ عشان فعلاً ماييوظش! (زي رحلة سريلانكا كده)، تقريبا استحميت واتكاليبت وحطيت قطرة وأي حاجة ممكن تعطر الجو حطيتها، كانت ماريانا قاعدة في ال Galley بتتكلّم مع البنّت الأسبانية وأول ماشافتني كأنها طفلة تايهة لقت مامتها..

ماريانا: حبيبتى.. كيفك؟

أنا: الحمد لله ..انتي كويسة؟

ماريانا: يا الله... مابصدق الريحه؟

أنا: انتي موتيتي م الضحك، جبتي منين المشبك اللي كان في مناخيرك؟

قامت ماريانا تمثل ازاي كانت ماشية في الكابينة زي المساطيل من الريحه وهي بتضحك: كنت ماشية هيك (ومسكت مناخيرها من فوق) وكل شوى اشيله عشان الأوكسجين وألبسه تاني! هادي البنّت الأسبانية عطيتهاولى وقالت انها بس بتعرف انها رايحة على هون بتجيبيه معها!

أنا: طلّعوا كلهم عارفين عشان كده خلونا نعمل حاجات كتير.

فجأة لقيت أم قردان على راسي، والبنيت الماليزية جاية من الكابينة بكوابيات مياة وعصير على صينية وعاززة تدخل من بيني وبين الست المديرية، شيطاني لعب بيا وقالى أهي جاتلك الفرصة لحد عندك، كعبلت نفسى على الماليزية اللي اتكعبلت على الست المديرية فغرقوا هما الاتنين مياها وعصير يا حرام، وفجأة وأخيرا تجرأت وتشجعت وتبجحت..

أنا: أظن مينفعش تقولى بتضحكى هنا ليه؟ أنا في وقت راحة وخلصت ومش في وسط المسافرين ومش باضحك في وشهم من غير سبب وقربنا نعمل Landing؟ بالنسبة للمياها والعصير sorry... أصل أنا لسه جديده!

الكابتن: السيدات والسادة.. لقد بدأنا في الهبوط التدريجي، يرجى اتخاذ مقعدك وربط مقعد ظهرك وربط حزام الأمان في وضع رأسى كما يرجى اغلاق الصوانى القابلة للطي أمامكم وحفظ أمتعتكم تحت المقعد الأمامى أو في الصناديق العلوية المخصصة لذلك، الرجاء اغلاق جميع الهواتف المحمولة وجميع الأجهزة الالكترونية الأخرى حيث أنها قد تتداخل مع أجهزة الملاحة والاتصالات الخاصة بهذه الطائرة وشكرًا.

زغرت لى المديرية زغرة نسائية واتكلت على الله، وهى ماشية افتكرت ان كلها أقل من 3 أيام ونرجع لنفس الرحلة، وهنا غمزت لى المضيفة الأسبانية وهمست في ودني.. ولا يهملك هابقى أديكى مشبك مطاط بلون الجلد عشان ماحدث يشوفه من بعيد! أما موضوع المياها والعصير ده

بقى.. Good Luck

## الى مانيلا

"عاصمة الفلبين - خليج مانيلا"

في الشنطة الكبيرة لأغلب المضيفات هتلاقي: بنطلون جينز واحد وكذا بدى وجاكيت واحد ثقيل لزوم تقلبات الجو النص كم، كوتشى وشرايات وجزمة وشنطة ايد وبيجاما وكل لوازم البنات الخاصة في أي حنة في العالم، حبة تفاح وعلب تونة وشوية عيش عشان الأكل في المطاعم هناك مش ولابد بالنسبة لى وكمان بسكويت.

الشنطة المتوسطة: قميص يونيفورم اضافى، "صديري - فست" يونيفورم الخدمة، سبراى معطر للجسم، مزبل عرق، سبراى تاني خالص منعش ومرطب للوجه (مش للمنظرة ده علشان الجفاف الى بيشقق وش المضيفات من كتر ساعات الطيران)، مشط، توكة، ماكياج، أدوات خياطة (عشان لو أي زرار قل بأصله)، مانيكير ومعاها مبرد أظافر وأسيتون وقطن للطوارئ، كشاف نور لو الرحلة ليلية (عشان هنطفى النور بالليل.. الركاب تنام وتشخر وإحنا مش هنزعجهم لو اتكعبلنا ووقعنا على راسنا في ممر الطائرة في حالة حد فهم نده علينا في الضلعة)، مطهر لليد، ملمع أحذية، أدوات من نوعية ملقاط حواجب وقصافة ومقص، وأكيد ولازم ولابد.. "المانيوال"، (حسب معلوماتى المتواضعة المانيوال ده كلامه مقدس لأى مضيفة أو طيار على خطوط طيران محترمة، لازم يكون محفوظ في القلب عن ظهر قلب، وباسلام لو في تعديلات حصلت في المانيوال وأى مضيفة محفظتهاش، سهل قوى تتنفخ من مديرها أو

الطيار أثناء هذا الاجتماع الذى يسبق الرحلة مباشرة والذى يسمى Briefing اللى يتهمى فيه أسئلة، أو تنفخ برضه من أي حد من ال crew (طاقم الطائرة) اللى معها لو غلظت أثناء الرحلة.. على حسب درجة النفسنة.

وأخيرا شنطة اليد: الباسبور، مراية صغيرة، كريم، روج، كحل، بلاشر، ماسكرا، ملمع أظافر، مبرد أظافر، زبدة كاكاو، توكة إضافية، ("آيات قرآنية" على حسب الديانة ان وجدت)، مفتاح الأوضة في السكن، ID الشركة، المحفظة اللى فيها: ATM و رخصة الطيران الدولية، كارت التأمين الصحى، أوراق كثيرة مهمة وأوراق أكثر ملهاش أي 30 لازمة، وصور الأب والأم والأخوة وبعض الأقارب والأحباء.

السر اللى محدش يعرفه، انى في أغلب الأوقات مش بتعب في ترتيب شنطى الكبيرة خالص! بعد ما اتعلمت أخذ تونة وتفاح احتياطي معايا، كنت بانزل قبل الرحلة بشوية أجيب حاجتى، أرجع البيت، أفتح الأوضة ألاقى الشنطة متوضبة! زى يوم التخرج كده بالضبط!

مين اللى وضهها ودولا ودعاء طابرين ومفيش في الشقة الا العبدة لله؟ الله أعلم، كنت بخاف في الأول، بعد كده اتعودت، يعني الناس ظراف ومش بيعملوا حاجة تضايقنى بالعكس دول بيوضبوا الشنطة، صيفى أو شتوى على حسب جدول الرحلات! يا سلام لو يسيبوا فلوس وكده؟ أو مثلاً يعملولى أكل؟ لو كانت دعاء عرفت كانت سابتلنا البلد كلها مش البيت بس.

على الطائرة الرحلة جميلة ولطيفة ومافهاش أي مسافر خنيق لحد دلوقتى، عدت الرحلة زى الفل ووصلنا مانيفلا (عاصمة الفلبين) بأمان، بمجرد ما دخلت الفندق صوتي العميق علاصوته عليا:

صوتي العميق: أنا محتاج أرتاااح، خمسمية من نفسى، أنا نفسى آخذ السرير بالحضن ومش هاسيبه طول الثلاث أيام دول، كمان مش كل مرة أروح يدوكى أوضة مش باين لها وش من قفا، أول ما نوصل الفندق المرة دي اطلبيلى أوضة على الجنيينة أو على حمام السباحة، إحنا مش أقل من أي طيار! مش كل مرة يستكردوكى، مش عشان أنتى لسه جديدة أتعامل أنا المعاملة دي؟ مش كفاية مستحمل بلاوى.

أنا: خلاص خلاص.. يا ساتر عليك.

دخلنا الفندق وقعدنا شوية في اللوبى نستنى تسكين أطقم ضيافة شركات وصلت قبلنا، وجه دورنا، هجم زمايلى عليه وأنا واقفة بعيد.

موظف الاستقبال: حضرتك واقفة بعيد ليه كده؟ مش عاوزه الأوضة؟ ( مع ابتسامة أنا عارف أنتى عاوزه ايه يا خلبوصة)

أنا: أنا مش هتكلم بقى! شايفاك وزعت الأوض كالعادة وأنا هعمل معاك مشكلة المرة دي.

موظف الاستقبال (بهدهووو ووا احترام): أنا عارف انك عاوزه أوضة بتطل على الجنيينة أو حمام السباحة بس المشكلة دي فعلاً مالهاش حل دلوقتى، عدد الطيارين من كذا شركة طيران ملا كل الأوض دي و...



كلمة واحدة طالعة من بق الناس اللى قدروا ينطقوها وهم بييجروا....  
كلمة كده خير اللهم اجعله خير ORM...!!

اتسمرت مكانى والناس بتجرى على يمينى وشمالى ومن فوقى وتحتى..  
يكونش قصدهم Storm؟؟ اللى هي "عاصفة"؟ يا حالولى، هي ناقصة  
كمان عواصف! مفيش فايده.. المنحوس منحوس ولو دلدلوا من راسه  
فانوس، لما أحب ادلع نفسى شوية تقوم عاصفة؟ طب أتعامل ازاي؟  
الناس بتجرى على روحها وبطولها! وقفت في النص أبص في كل  
الاتجاهات، أرجع الأوضة أخذ الباسبور والشنط وألبس ولا أجرى  
وخلص؟ مش عارفه ليه فلاش باك الزلزال جالى في الوقت المنيل ده!!  
أكبر خالص وأرجع أنام في أوضتى زى الباشا زى أبويا ماعمل أيامها؟ والله  
أبويا ده برنس، العمارة فضلت تترقص والناس نازلة تصوت وهو راح  
طالع بالعيش و الجبنة اللى جايبهم، عمل ساندويتشات وكوباية الشاي  
وفتح التلفيزيون يتفرج على الناس واللى بيحصل!

صوتي العميق: لأ ماعتقدش ده الوقت المناسب اللى تقلدي فيه السيد  
الوالد خالص، انتى مش سامعة صريخ الناس بيعلى ازاي!

أرجع أحسن أغير هدومي بما أن الحيطان مابتترقصش وأنزل أشوف باقى  
طقم الضيافة فين، ثلاث دقايق وكنت تحت بادور عليهم انى الألقى حد؟  
هما راحوفين دول؟

الناس كلها بتجرى في اتجاه معين ليه؟ ناحية الأوض اللى بتطل على  
الجنيئة و حمام السباحة!! لما أجرى معاهم أشوف كده، فضلت أجرى  
في الممر الطويل ده مع الناس وبعد ما أخذت لى كام كوع في مناطق

متفرقة من الوجه على الماشى من الناس الى بتجرى، لقيت نفسى دخلت أوضة لا اراديا بقوة الدفع، ودي كانت أول أوضة في الممر، لقيت الراجل اللى فيها شعره واقف وأبيض بفعل التراب أو بفعل الخضة، وعينه مبرقة على الآخر وهدومه طالعة منه، ضهره للحيطة وايديه الاثنين مكلبشين عليها زى ما تكون الحيطة هاتطير!! أول ما شفته افتكرت أفلام الرعب لما حد يكون بيقترب على حد عشان يموته وزانقه في الحيطة، الناس كانت مذهولة من منظر الأوضة ومنظره والصرخ وقف وكله بيظمن على كله.

بعد كده عرفت ان الرجل ده كان واخد أوضة على الجنينة وراح جايب مشروبه المفضل وقعد في البلكونة يريح أعصابه وفجأة قامت العاصفة شالت الشجر من جذوره وفروعها طارت في الهواء و عماويد النور و أي حاجة في الأرض بقت تطير تخبط في الناس وفي الشبابتك تكسرهما وبالمره قامت في طريقها واخدة البلكونات اللى بتطل على الجنينة و حمام السباحة في سكتها!

البلكونات دي كلها طارت عشان كانت خشب، والرجل ده كان جوه واحدة منها، واللى أنقذه انه شاف البلكونات اللى قدامه وهى بتطير قدام عينه قام فجأة بمنتهى التلقائية جرى على جوه الأوضة! وفضل لازق في الحيطة وملزوق فيها لدرجة انه ماكانش قادر يسيبها بعد مادخلنا عليه من كتر الخضة!

الحمد لله مفيش حد مات والاصابات مش خطيرة، لان كل البلكونات كانت فاضية الا الرجل أبو مزاج عالى ده هو اللى جاله هلع فكان محتاج

تأهيل نفسى، بعد اللى شفته وفهمته، رجعت أوضتى الجميلة الوديعه اللى من غير بلكونه ولا أي view أتوضأ وأصلى ركعتين شكر لربنا انى ماخدتهاش! "وعسى أن تكرهوا شيئاً وهو خير لكم" صدق الله العظيم.

والرجل ده فضلوا يدوروله على أوضة زى بتاعتى 😊 حبة حلوين من الزمن لانهم كلهم مشغولين، بعد ما استوعبت الموقف واسترجعت ملامح الراجل الغلبان ده عرفت انه الطيار بتاعنا واللى بيجروا دول كانوا زمائلى وموظفين الفندق وشوية من نزلاء الفندق اللى سمعوا صرخ الرجل ده وبقوا يصرخوا هم كمان!

الراجل صاحبنا موظف الفندق فضل ينق عليا من ساعتها لحد ما بطلت أظير أصلا، وكل ما يشوف خلقتى يبتسم ابتسامه مستفزة ويقول: "اوعى تكونى زعلانة انك مسكنتيش فى أوضة على الجينية أو حمام السباحة؟؟ شفتى حصل ايه؟ انتى محظوظة".

## إلى كاتماندو

"عاصمة نيبال - بين الهند والصين عند جبال الهمالايا بأسيا"

لما كنت أشوف في جدول الرحلات بلاد أوروبية مكنتش بفرح زى باقى المضيفات، كانوا بيقولوا عليا فقيرة! أوروبا ممتعة مفيش كلام لكن أنا شخصيا بكره جوها البرد جدًّا وساعات كان يتهيألى ان الناس هناك باردة زى جوهم، أغلب بلاد افريقيا وآسيا لهم معزة اكثر عندي، رغم الفقر لكن حضارتهم واضحة في شوارعهم وطقوسهم وأكلهم وعاداتهم الغربية، أما جبال الهمالايا دي من أطول الجبال في العالم، وفي مكان واحد غريب ومحدد جدًّا بتصطدم عنده طيارات كتير، تعمل "crash" باختصار، تقع الطائرة فتافيت والناس برضه فتافيت وابقى قابلنى لو عرفوا يجيبوا دراع أو حتى صباع! في ختام فترة التدريب اللى هي شهرين وشوية قعدوا يفرجوننا على جميع حوادث الطيران في جميع أنحاء العالم زى ما انتم عارفين وقال ايه هتصرفوا ازاي وقتها؟! لو وقعت في البر؟ أو وقعت في البحر؟ أكيد فاكرين.

طبعًا (زى ما انتم عارفين برضه) أنا سمعت وذاكرت وامتحنت ونجحت وأخذت رخصة الطيران الدولية وطيرت، وما زلت غير مؤمنة بكلام الناس المجانين دول وعمري ماقتنعت بحكاية والطيارة بتقع تعملى ايه دي؟ هاعمل ايه يعني؟ هو العمر بعزقه؟ هتشاهد طبعًا ، ولو فعلاً في فرصة انى أنجو بنفسى على حساب حد تاني هاعمل كده مش هانهتس على

بعضينا، وانت سيب الكتاب من ايدك لحظة كده وادخل جوه طياره  
بتقع وخليك صريح وقول بصوت عالي هتعمل ايه؟

وعشان نسبة كبيرة من الحوادث دي حصلت في مكان معين في جبال  
الهملايا.. كانت النتيجة ان الأساطير طلعت وتشعبت حول هذا المكان  
الغامض المليء بالأسرار والأرواح أيضا على حسب ما سمعت!

طعم الضيافة هنا كانت المصرية والنيبالية والفرنسى والإيطالية والماليزية  
والهندية والست المديرية أو ال Cabin Senior وهى لبنانية وكان الطيار  
أسبانى، بعد ال Briefing (ملخص الرحلة اللى قبل كل رحلة) ما خلص،  
بص لى الطيار بنص عين وابتسم من غير سبب واضح! بعد ما طلعتنا  
الطيارة بدأنا نعمل إجراءات الأمن (security checks) كالعادة وبعد  
ماخلصنا وهنبتدي نحضر حاجات تانية، نادي الأخ الطيار على الست  
المديرة وقالها هاتلى المضيفة المصرية، جت تجرى عليا مبرقة قوى! أول  
ما شفتها كده ما طمنتش الحقيقة..

الست المديرية اللبنانية: الكابتن عايزك بسرعة قبل الاقلاع!

أنا: خير اللهم اجعله خير.. فيه حاجة؟

الست المديرية: ما بعرف... شو عملتى؟

أنا: والله ما عملت حاجة يا ست المديرية..

الست المديرية: لمحته وهو بيضحكك ضحكة غريبة في ال Briefing  
(الاجتماع اللى قبل الرحلة)؟

أنا: صح؟ يعني مكنش بيتهيألى؟

الست المديرية: طب ياللا بسرعة روحى عشان الوقت.

أنا: حاضر..

رحت للرجال الطيار وفضولى أكلنى وقلبى بيتنفض من القلق يا ترى عملت ايه أنا غلط دلوقتى؟ أول مرة طيار ينادينى قبل الإقلاع! لما قربت منه كان قاعد مستكنيص قوى وبيشرب قهوة وبيكلم المساعد بتاعه اللى جنبه.

أنا: حضرك طلبتى؟

الطيار: أيوة.. ازيك؟

أنا: كويسة.

الطيار: كنت لسه باتكلم عنك امبارح ولقيتك النهاردة.

أنا: !!!!!!!!!!!!!

الطيار كان محبوب قوى الحقيقة، استمتع بتعبيرات وشى البلهاء وكأنى بنت غبية واقفة قدام علامة زمانه وبص للمساعد وقال..

الطيار: امبارح كنت فى لندن وكنت بتناقش مع كاتب هناك عن ان أغلب الناس فى البلاد العربية بتؤمن بموضوع القدر أكثر بكثير من ايمانها بالعلم.

أنا (نفس حالة البلاهة): !!!!!

صوتي العميق: يخربيبيتك.. انت منهم؟ لأ وجأى في رحلة الى يخش في الجبل يسقف؟ والنبي ياعم ركز في الرحلة مش عايزين نرشق الله يسترك!

الطيار: لو انتى مسافرة بعريبتك وفجأة اتعطلت في مكان مقطوع وانتي رايحة مقابلة مهمه جداً، لو فاتتك تبقى فقدتى وظيفة العمر؟ تقولى ده نصيب ولا ده نتيجة اهمالك في صيانة العربية؟

أنا: اهمالى في صيانة العربية سبب لتحقيق القدر المقدرلى مسبقا، لأن الوظيفة دي رزق والرزق مقدر من الله وحده.

الطيار (بص للمساعد بتفاخر): شفت؟ مش قلتلك؟

أنا: لو الوظيفة دي مقدره ليا، ممكن برضه العربية تعطل والمقابلة تفوتنى بس يحددولى ميعاد تاني مثلاً؟ لو مش متقدره ليا من الأول كان ممكن جداً أكون عاملة صيانة لعريبتى وبرضه تعطل ويفوتنى المقابلة؟ أو ممكن أروح في ميعادي وماتقبلش؟

الطيار (بجدة): تعطل ازاي من غير سبب واضح؟ كل حاجة في الدنيا بسبب، على العموم أنا حبيت بس أثبت وجهة نظرى، اتفضللى انتى شكراً  
عشان ال take off time.

أنا: أكيد فيه دقيقة أو اتنين تقولى ليه أنا بالذات ومش مديرتى اللبناينة الى اخترتها عشان تثبت وجهة نظرك؟

الطيار: وانا بسألك في حالات الطوارئ بنعمل ايه جاوبتى صح.. بس باستهزاء، ماتسألنيش ازاي حسيته رغم انك بتحاولى تسيطر على



أنا (بصوت عالي): عفاريت؟

المضيف الفرنسي: ماتصديش الخزعبلات دي، ما بيحصلش حاجة هناك.. رحى مليون مرة.

المضيفة الإيطالية: لأبس أنا حصلى هناك حاجات ومكنتش بصدق لحد ماحصلتلى؟

المضيفة الإيطالية دي كانت رزينه على عكس عموم الإيطاليين اللى قابلتهم، لما قالت البق ده بثقة قلقت!

المضيفة الهندية: أنا جايبة معايا بخور وحافضة حاجات همشهم من أوضتى.

المضيفة الماليزية: تمشهم انتى ويجوا علينا إحنا؟

أنا: يا جماعة هو فى ايه بيحصل؟ ده واضح ان كلكم جربتوا؟

المضيف الفرنسي: الا أنا محصليش حاجة، نصيحة منى حاولوا تشغلوا وقتكم، الفضى وحش، سيبك منهم دول مجانين.

المضيفة الإيطالية: احكيلها شوية مواقف لأن شكلها مش مصدقة.

المضيفة الماليزية: اسمعنى.. الناس بتقول ان الفندق ده ملعون وهو سبب الحوادث اللى بتحصل للطيارات هنا فى المكان المحدد فى جبال الهمالايا لأنه أقرب مكان مسكون منه جغرافيا، هحكلك عشان تقتنعى أكثر ولو انى مش بحب إحكى لما آجى هنا، مرة كنت نايمة والدنيا برد جداً،

أنا طبيعة نومي مش بتقلب يعني الغطا مش بيتحرك أصلاً! كل شوية أصحى من البرد ألاقى الغطا متشال! أتغطى وأنا.. أصحى بعدها بنفس الطريقة! غير انى حسيت ان فى حد فى الأوضة معايا! قلت أعمل نفسى نايمة وأشوف، اتغطيت وبعد دقائق لقيت الغطا بيترفع من عليا بالراحة جدًّا كأن حد بيثيله! حسيت انى هيجيلى أزمة قلبية واتسمرت مكانى لكن كان فى نفس منتظم وسخونة بيقربوا منى قمت صرخت ونزلت الفندق تحت، ملقيتش مخلوق، كنت هموت من الخوف، حسيت بحركة غريبة من تمثال معين فى الاستقبال، صرخت بعلو صوتي لحد ما الموظف جالى بمنتهى البرود وكأنه متعود على كده وغيرلى الأوضة، لكن كل البنات حصلها حاجات مختلفة، فى اتنين مضيفات واحدة مصرية والثانية يونانية كانوا بايتين فى أوضة واحدة يومها.. تخيلى انهم كانوا يسمعون أصواتهم بره الباب بتخبط عليهم وبيقولولهم يفتحوا عشان عايزين يباتوا معاهم؟ فى مضيضة ثانية إيرانية كانت فاتحة اللاب توب فى اوضتها وشافت واحدة ثانية بتبصلها فى الشاشة من وراها! كانت ليلة مرعبة، بصعوبة اتلمينا ونمنا كلنا فى أوضة واحدة، حتى الكابتن والمساعدين اللى معانا ناموا عند حمام السباحة لما نزلنا الصبح شقناهم! صحيناهم عشان يطلعوا أوضهم يناموا مرضيوش، قالوا هنا أحسن ولا طلوعوا الأوض ولا قالوا حصل ايه!

أنا: الله.

المضيضة الإيطالية: أنا كمان حصلى حاجات غريبة..

أنا: زى ايه؟

المضييفة الإيطالية: يعني.. الأباجرة عليت من مكانها فجأة! والتليفون  
اتحرك من مكانه! يا ربى مش عاوزه أفكر الباقي!

المضييفة الهندية: أنا عملت Report Sick (تقرير مرضى) مرتين للرحلة دي  
قبل كده بس الرحلة دي ماعرفتش.

أنا: للدرجة دي؟

المضييفة الهندية: كان في دم بينقط في الأوضة كلها وفي الحمام، كأن حد  
بيتمشى وهو ببيزف! ومش عايزة أقول على الحاجات الأكبر من كده..

غمضت عنيا وقالت كلام مش مفهوم بصوت واطى وهى ضامة ايديها  
على بعض....

المضيف الفرنسي: متصدقيش الكلام ده؟

بدأ يمشى ناحية الكابينة وراح باصص وراه ليا وشاور عليهم بايده بحركة  
مشهورة جنب راسه انهم كلهم مجانين.

صوتي العميق: يا ريت يطلعوا مجانين انما مش باين كده والله أعلم؟

سرحت في الكلام وانا ببص في الجو من شباك الباب القريب منى، قامت  
المضييفة النيبالية متفزلكة على أساس انها تعرف جغرافية بلدها من  
فوق ومن تحت، بصت شوية وقعدت تبحلق وبصتلنا وهى شاردة كأنها  
اكتشفت قارة جديدة...

المضييفة النيبالية: الضباب مالى الجو!

أنا: بقولك ايه.. نغير سيرة العفاريث دي شوية ..

المضيفة النيبالية: (لا تعليق)..

أنا: سمعت ان في قبائل في نيبال بتتجوز فيها البنت كذا واحد مع بعض!  
ده بجد؟

المضيفة النيبالية: أه بجد.. ممكن البنت تتجوز 2..3.. أو أربع اخوات لو  
قدرت.

أنا: ده ايه العز اللى انتوا فيه ده يا ولاد المحظوظة؟

المضيفة النيبالية: مش كلنا كده..

أنا: طيب واللى كده لا مؤاخذة تعيش معاهم ازاي وتخلف ازاي؟

المضيفة النيبالية: بيعيشوا كلهم مع بعض في بيت واحد، والطفل اللى  
بيتولد بيبقى ابنهم كلهم وكلهم بيربوه.

أنا: ومش بيغيروا من بعض؟

المضيفة النيبالية: دي قبائل معينة، وبعدين خلى بالك نيبال معزولة عن  
العالم غصب عنها بسبب موقعها والجبال، الناس دي أول مرة تسمع ان  
الست تتجوز واحد بس.

أنا: مانجة والله.. طب وده في الديانات عندكم مش حرام؟

المضيفة النيبالية: الهندوس أكثر حاجة وبوذيين ومسلمين قليلين جدًا  
ومسحيين أقل دول مش بيعملوا كده، بس في ديانات ومعتقدات تانية

والعادات دي عند قبائل مزارعين معزولة وعمرهم ما سمعوا ان الست تتجوز واحد أو ان الرجل يتجوز كذا واحدة زى المسلمين مثلاً ، والناس الى ذى متعلمين ولفوا بلاد بره نيبال يمكن نسبتهم 1% مثلاً .

المضيفة الهندية: شكلك نفسك تعيشى هنا ... ها ها ها

أنا: هو إحنا لاقيين واحد يوحد ربنا لما هنتجوز أربعة... وبعدين..

المضيف الفرنسي جاى بسرعة علينا وشكله قلقان..

المضيف الفرنسي: شوفتوا.. مش طلع فيه ضباب؟ يعني هو ده المكان الى الطيارات بتطرق فيه؟

أنا: مش بتقول جيت مليون مرة؟ أنا الى أول مرة آجى!

المضيفة الهندية: هو لازم يحصل حاجة في البلد دي أنا عارفة.

الست المديرة: واقفين كده ليه ملمومين مع بعض.. الناس بتسأل ميعاد الهبوط اتأخر ليه.. اطلعوا طمنوهم.

صوتي العميق: مش لما نظمن إحنا الأول!

المضيفة الإيطالية (بهدهوء): بس هو في ايه الأول عشان نكون إحنا فاهمين ونظمن الناس..

الست المديرة: الجو أوحش من التوقعات لكن كله هيبقى تمام.. انتوبس اطلعوا للناس في الكابينة.

أنا: المشكلة دي بسبب الضباب؟

الست المديرة: تقريبا..

طلعنا بره كلنا للناس نلم كوبايات.. أطباق.. بطاطين.. حاجة ساقعة بببس.. أي حاجة، نبتسم في وش الناس، المسافرين كلهم قلقانين "ميعاد الهبوط أتأخر ليبييييه؟" ... سؤال وجيه جدًا بس والله ماعرف!

أنا: لا يا فندم ماتأخرش ولا حاجة.. اطمنى خالص.

الست المسافرة: ازاي ما تأخرش؟ أتأخر طبعًا؟

في هذه الأثناء التي لا تنسى كانت المطبات الهوائية بتلعب بنا كلنا كرة شراب مصرية أصيلة.

أنا: ما فيش أي داعي للقلق.. لازم الطيار يأمن الهبوط عشان في ضباب.. حضرتك اطمنى خالص.

وجريت من قدام الست المسافرة اللي مكنتش عارفة أقولها ايه وشكلى هاعك الدنيا؟

صوتي العميق: الا هما كانوا دربوكي على الموقف ده قبل كده؟

أنا: هههههههه... مش فاكرة!

كل طقم الضيافة كان على آخره زيمهم زى المسافرين بالظبط! يا خسارة الشهرين تدريب وكراتين ال "Red Bull" لزوم السهر والمذاكرة، أشوفه بقى دلوقتي؟ نفسى أشوفه؟ عارفين مين ولا لأ؟ بتاع الإهمال والقدر.. نفسى أزق الباب عليه وأسأله وأخرجه وأقوله...

الطيار: Cabin crew take your seats for landing (طقم الضيافة الرجاء الالتزام بمقاعدكم للهبوط).

الست المديرية: الحمد لله، خيرهم لزمائلك خلاص هانعمل Landing .

في طريقنا للفندق، حسيت انى داخله فيلم أسطورى! زى أساطير الصين والأساطير الآسيوية، تقريبا زى فندق البارون في مصر، حواليه قصص رعب كتيرة، الفندق فوق قمة جبل مش على قوى، لوحده تماما، مفيش حواليه أي حاجة، طريق الفندق في صعود.. كل ما تطلع العربية بتشوف معالم الفندق تدريجيا وهو عبارة عن قصر قديم جدًا محاط بتمائيل بوذا ورسومات تانية كتير، لونه رمادي تقريبا أو بنى على بيج.. لون غريب مش مدهون ولا مترمم، غالبًا ده لون الحجارة. المدخل واسع جدًا ومليان تمائيل، والقصر الفخم ده أثائه بسيط جدًا! دخلنا الفندق هلكانين، تعاملت الست المديرية الله يكرمها مع الفندق وجابتلنا لحد عندنا مفاتيح الأوض..

المضييفة النيبالية (وهي منسكحة): طيب هاسيبكوا أنا بقى.. هاروح لأهلى.. وانتو استمتعوا بوقتكم..

المضييفة الماليزية: طبعًا مانتي مش هاتشوفي حاجة.

المضييفة النيبالية (تضحك بصوت عالى): خلوا بالكوا على بعض.. بااااا

المضييفة الماليزية: روحى حطى شنطتك وغيرى وتعالى هنتجمع في أوضة أو اتنين بالكثير قوى.

أنا: لا يا ستي أنا عاوزه أناام..

المضيفة الإيطالية: هتنامى لوحدك؟

أنا: يا ستي.. الواحد ركيه سابت من الهبوط والله، بس انتوا جمدوا شوية وكله هيبقى تمام.

المضيفة الهندية: زى ما تحبى.. سيبوها براحتها.. هي هتيجى بنفسها..

مركزتش معاهم، كان موقف الضباب والهبوط مسيطر عليا جدًّا.. حقيقى مواجهة الموت فجأة رعب أقوى وأشد من أي رعب! طلعت الأوضة في ثقة أحسد عليها.. دش متين.. اللاب توب على قرآن... ودي آخر لقطه شوقتها، نمت وشويتين وحلمت خير اللهم اجعله خييير.. " عياط بصوت عالى وناس بتجرى وناس بتصرخ! ودبدبة جامدة جدًّا! وصوت أكرة الباب وحد بيحاول يفتحه! وأخيرا حد بيثيل الغطا من عليا!!؟ وياريتها جت على شيل الغطا ويس؟ ده اللي شال الغطا اتضايق ليه أنا مهتمتش؟ راح زاغدنى زغدة قوية في كتفى.. وهنا اتفزعت من النوم ماسكة كتفى..

أنا: أأأأأى.... انتم مين وعاوزين ايه؟

عيني لسه مش قادرة تفتح، بحاول أفتحها شفت خيالات ناس شكلهم غريب ملمومين حوالين السرير في دايرة، حاولت أفتح عنيا معرفتش مش عارفه ليه؟ وهنا افتكرت القرآن وضربات قلبى بقت أسرع.. هو مين قفل اللاب توب؟ هو أنا بحلم ولا ده بجد؟



المضيضة المالمزفة: شوفتوا.. أكفد خوفوها قبل ما ندخل؟

المضفب الفرنسف: بقالك 24 ساعة لوحدك فف الأوضة! معقول كل ده نائمة!

الست المذفرة: مثل أهل الكهف!

أنا: 24 ساعة!! لا فمكن! أنا نائمة بقالى ساعتفن بس!

المضفب الفرنسف: ساعتفن بسسسسس!!! هما دول اللف انف حسفئ بفهم بس؟ طب والباقف كنئف ففن؟ وحسفئ بابه؟

المضففة الهنففة ماسكة بخور وبئقول كلام غربب

أنا: بس بس فا ست انف هانئضرفهم ولا افه؟ مفن طفف القرآن؟

الست المذفرة (ئضحك): لا دانئف تمام .. أو مال افه اللف حصلك والله أكبر وانصرفوا؟

أنا: أكفد كان حلم. بس صئفب انئوا دخلئوا ازاف؟

الست المذفرة: ها فدا كابوس حفائف. المضففة الهنففة طفف القرآن وقعدئ تقول كلام مرئب.

أنا (بالعربف): الله فحرقها .. هف ناقصة؟

المضففة المالمزفة: انئف بقالك فوم بحاله مش بئرءف على حد. سألنا المئعم وخدمة الغرف قالوا انك منزلفئش! وحاطة فافطة ممنوع الازعاج. وإحنا بقالنا ساعات سامعفن صوفب جامد وصرفب ناس كئفر جاف من

أوضتك، وتخبيط ودبدبة جامدة، كلمناكى كثير مش بتردى! وفى الآخر السماعة كانت بتترفع ونسمع أصوات بتزوم وصويت وتتقفل تانى! قلنا لأ مابدهاش بقى أحسن تموتى ولا حاجة، كان مشهد ولا السينما.. أخيرا جرينا كلنا جبنا المفتاح الاحتياطي من خدمة العملاء وحاولنا كثير نفتح الباب!

المضيضة الهندية: الباب كأن حد كان ماسكه من جوه ومش عايز يدخلنا! وفجأة غمضت عنمها وقالت بصوت مش مسموع كلام غريب تاناانى... وعنمها بتترعش!

الست المديرة: خلاص هى كده كويسة بس سييوها لوحدها عشان ترتاح...

أنا: لالالالالالالالال. لوحدي ايه وأرتاح ايه؟ تخبيط ودبدبة وصويت وناس بتزوم ماسكة الباب من جوه!! انتى فى حد ساكن معاكى؟ قصدي من البنات يعنى؟ مش من اللهم احفظنا..

الست المديرة (باندهاش): المضيضة الإيطالية بس؟

أنا: فل.. فل.. الصحبة كده فل.. أنا جاية معاكى.. رجلى على رجلكوا.. هو أنا ليا غيركم.. ثوانى أتحزم.. قصدي أغير وأجيلكوا.

المضيض الفرنسى: طب وأنا هتسيبونى لوحدي؟

أنا: يا عم دول مجانين سييك منهم... وأنا أبقى مجنونة لو سمعت كلامك تانى.



## إلى صنعاء

"عاصمة اليمن - قارة آسيا"

"خلى بالك يا فندم... حاسى حاسى... يا مدام خلى بالك... حضرتك مش شايفه ال ... طرأاااااااااا... يا جماعة الحقوا في واحدة وقعت من على سلم الطائرة... آههههه,,, يا خبر... حصل خير هاتي ايدك... آه آه مش قادرة.. معلىش تلاقيها شوية كدمات حصل خير... آآآه مش قادرة ... رجلى!"

دي كانت احدي البدايات السعيدة لرحلة أسعد وإحنا رايجين اليمن الشقيقة، طلعت الست متسندة على اتنين واحد جوزها والثاني زميلنا "مضيف عراقى"، اترصينا كالعادة زى النمل " أهلا وسهلا.. Welcome On board " ... الناس كلها طلعت الطائرة ... الأبواب اتقفلت.

الست المديرة أو ال Cabin Senior: يا جماعة دقيقة واحدة بس كلكم عندي هنا ورا لو سمحتم؟ أومال فين المضيف العراقي؟  
أنا: قدام في الكابينة وجاى على طول.

بصتلى بصة عميقة خبيثة طريفة ذات معنى: انتى في ال zone بتاعتك شوية مرضى.. عاوزاكى تاخدي بالك منهم شويتين؟

صوتي العميق: يالهوى.. شويه!! شووووية مرضى؟ شوية مرة واحدة.. هم لب؟ ده لما بيكون واحد عيان بتبقى عيني في وسط راسى.. طب ما توزعوهم على الطائرة اشمعنى كلهم اتجمعوا عندي أنا؟

الست المديرة: يعني مسمعتش صوتك؟

أنا: أكيد طبعا ...

الست المديرة: في بنت صغيرة عندها ربو وبتجيلها نوبات اختناق تنفس عاوزاكي مستعدة بأنبوبة الأكسجين في أي لحظة، اتأكدتى انها شغالة؟

أنا: طبعا .

الست المديرة: في مسافر تاني عنده مشاكل في القلب وبيجيله أزمات، وفي مسافره بيجيلها نوبات صرع، في وا...

المضيف العراقي: الحقوا...

أنا: في حد تاني وقع؟

المضيف العراقي: لأ.. بس تقريبا كده والله أعلم المسافرة اللى وقعت وهى طالعة رجلها اتكسرت وبتصرخ!!

صوتي العميق المفزوع: دي هاتبقى رحلة زى الفل ان شاء الله!

الست المديرة: على فكرة المسافرة أم رجل مكسورة دي عندك برضه! شدي حيلك بقى..

الصوت العميق المتلخبط: يالهوتنتنتى.. هي ناقصاها هي كمان؟ يعني جنب كل الشغل ده كم المرضى ده؟ يا رب سهلها..

تن تن... تن تن... بصيت على رقم الكرسي.. آه هو ليا أنا.. حاضر جاية والله حالا.. كانت الست رجلها واردة وبتعيط ومطلعها بره ناحية الممر

وطبعًا ده عرضة لأي حد معدي من الناس اللي بتنام وتصحى مش شايقة تروح الحمام انه يقوم مديها شلوت محترم يكسرهما كسر مضاعف.. ربنا يستر.

أنا: ألف سلامة عليكى يا فندم.. رجلك لسه واجعاكى؟

المسافرة المكسورة: أه أه أه ... اهئ اهئ ... تقريبا كده اتكسرت؟

جوز المسافرة المكسورة: هو مفيش هنا دكتور؟

أنا: لأ يا فندم الطيارة ماعلمهاش دكاترة بس إحنا بنعمل الإسعافات الأولية طول وقت الرحلة لحد ماتوصلوا ويشوفها متخصص.. ان شاء الله سليمة، ثوانى أجيب تلج.

جريت بسرعة بسرعة.. كم كبير من التلج وقطن وشاش..

أنا: معلش حضرتك حاولى تمدي رجلك لبره شوية؟

أم رجل مكسورة: أه أه مش قادرة خالص... أه..

أنا: شوية صغيرين بس.. أيوه كده..

التلج جوه الشاش ورحت لفاه حوالين القدم وفوق شوية، يا رب ماحدث يخبطها، هاعدي على واحد واحد أقوله فى المنطقة أو ال zone بتاعى على الحالة وأبلغ زمايلى يقولوا لركابهم.

الحمد لله خلصت المهمة أقوم بقى أشوف شغلى...

أنا: أستاذن حضرتك ترفع الكرسى لقدام عشان معاد الإقلاع؟

المسافر: أنا؟

أنا: لو سمحت؟

المسافر: من عونيا الاتنين.. أعمل ايه كمان؟ انتى تؤمرى؟

صوتي العميق الدفين: متخليش حد يستفزك... افتكرى التدريب.

حوالين المسافر السنيل أصدقائه الأستل منه بيصولى وكأنهم بيحبوا  
اختراع جديد وبقيهم مفتوح على آخره من فرط الانبساط، بيكلم المضيضة  
بقي... وكمان هبقى عشرة بعد كام ساعة.. نسيت أقولكم ان الحليوة ده  
في المنطقه بتاعتي ان شاء الله! كده بقى عندي مرضى مشكلين بدنى  
ونفسى ان شاء الله ولا حول ولا قوة الا بالله.

أنا: ( أصفر ابتسامه ممكنة): شكراً، حافظ على وضع الكرسي ده في  
الإقلاع والهبوط لو سمحت؟

المسافر السنيل: أحافظ عليه وأحافظ على اللي تقولى عليه؟ انتى قولى  
بس.. قولتى ايه بقى؟

المضيضة التونسية: البنيت الصغيرة جالها ضيق تنفس.. هاتى الأوكسجين  
بسرعة.. بسرعة..

جريت على مكان أنبوبة الأوكسجين وعديت مع كل طقوس فتحها وجريت  
على البنيت الصغيرة، شكلها تعبان، أمها باردة ولا على بالها!! أمها دي ولا  
مرات أبوها؟ أبوها يا حرام هايتجنن.. صعب عليا أكثر من البنيت نفسها،  
بصيت لزميلتى في قلق..

المضيقة التونسية (في ودي): ماتلقيش.. انتي اديها جرعة الأوكسجين بتاعتها هاتبقى كويسة ولو حصل أي حاجة تانية تبقى خليتي مسؤليتك.. فاهمة؟

على خلفية المشهد... "آه آه آه يا رجلى ... كانت رحلة منيلة من الأول.. يعني كان لازم أروح أشوف أمك ما تروح انت.. آه.. اهئ اهئ اهئ" ...

أنا (لوالد الطفلة): حضرتك معاك الدوا بتاعها؟

الوالد: اديها أكسجين بس وهتها.

أنا: بس ازاي يا فندم؟ ده ال..

الوالد: أرجوكي حطيلها الجهاز هي بتهدا بعدها..

أنا: حاضر.. ركزي في عيني يا حبيبتى... ماتخافيش، أيوة.. شطوررررة... انتي كويسة خالص أهو.. برافو عليكى.

وفجأة شالت البنت الأكسجين من على وشها وحطيتهاولى على وشى..

البنت الصغيرة: شطوررررة.. انتي كويسة خالص أهو.. برافو عليكى!

أنا: !!!!!!!

والد البنت الصغيرة: انتي كويسة يا حبيبتى؟

البنت الصغير: مش عايزة تاني.

أم البنت الصغيرة: قلتك زى القردة مش بتسمع كلامي؟ خليك بقى مدلعا كده؟

صوتي العميق "يا ساتر.. ايه الست دي؟ لأ دي أكيد مش مامتها.. لا يمكن!"

الكابتن: "Cabin Crew take your seats for take off please"...

والد البنت الصغيرة: متشكر جداً..

أنا: العفويا فندم.

المايك: سيداتي سادتي، معكم كبيرة المضيفات ماري، نيابة عن الكابتن وطاقم الضيافة أرحب بكم على متن خطوطنا الجوية رحلة رقم 607 ، خدمة بدون توقف الى العاصمة صنعاء، زمن الرحلة 3 ساعات و30 دقيقة، سوف نطير على ارتفاع 36000 قدم بسرعة 108 ميلا في الساعة.

أخيرا الطائرة تطلع (وقت الإقلاع هو أسعد لحظات حياتي على الإطلاق في أي رحلة ما عرفش ليه!) وحواجب البنت الصغيرة وهى بتلعب مفارقتش خيالي! أنا كده هبدأ أقلق على نفسى، بس البنت مكحتش أبداً وفي حالتها المفروض تكون بتكح زى ما المانيوال بيقول! هي دي الأعراض، يمكن ماخذتش بالي؟ الا حواجيبها دي كمان؟ بس لأ.. الى شد انتباهي مش حواجيبها؟ الى شد انتباهي نظرة عينها.. فكرتني بنفسى زمان لما كنت أعمل حاجة غلط بالعند في ماما و بابا وأنا عارفه انها غلط وهاتضايقهم وبعدين أعلبهم حواجيب وأبصلهم نفس البصة دي!

"تن..تن"، المرة دي مش مسافر عاوزنى، المرة دي يعني الحزام فكوه وده إشارة تانية للمضيفات ان قوموا فزوا اجرؤا على الأكل سخنوه ووضبوا عربيات الأكل بسرعة..

صوتي العميق: الحمد لله انى مش فى ال Galley (المطبخ بلغة الطيرن) انه بارده كان زمانى اتنفخت...

فى الخلفية: أه..أه..رجللى... الحقونا...الحقونا هنا... لو سمحتوا.. جريت بسرعة لقيت مسافر طووووويل وضخم واقف فى المر عند المسافرة المكسورة.. الرجل ده لو داس على رجلها هيفرمها!

المسافر: أسف والله ماشفتش رجلها.. ماتخيلتش حد يحط رجله المكسورة كده فى وسط الممر.. عموما حقك عليها..

جوز أم رجل مكسورة: انت أعمى مش شايف؟ بلاش مش شايف؟ مش سامع عياطها الى صدعنا من الصبح؟ رجلها مكسورة يا أختى؟

المسافر: والله ماخذت بالى.. أعمل ايه يعنى؟ اتأسفت وخلص؟

أنا: خلاص يا جماعة حصل خير.. حضرتك رايح الحمام؟

المسافر: ده ايه الغباء ده..

أنا: أنا أسفة يا فنديم معلىش.

جوز أم رجل مكسورة: انتى كمان بتتأسفيله.

أنا: أنا آسفه يا فندم... يا جماعة حصل خير هو ماكنش قصده.. حضرتك رايح الحمام؟

المسافر: أيوة.

أنا: خلاص اتفضل دلوقتي... سلامتك يا فندم.. هاجيبك تلج تاني..

أم رجل مكسورة: كان في وجع والتلج هون شوية دلوقتي هاموت من الوجع.. اهئ اهئ... منه لله الأعمى ده..

أنا: هجيبك كمان مسكن بس هاجيبك الأول حاجة بسيطة تاكلمها قبل المسكن..

أم رجل مكسورة: اهئ اهئ اهئ.. هي أمك قرفتها نحس، كل ما أروحها تحصلى حاجة.

جوز أم رجل مكسورة: من أعمالكم سلط عليكم.

وأنا باحضر التلج والشاش ورا في مطبخ الطيارة، لقيت البنت الصغيرة وأبوها واقفين مستننين الحمام يفضى، البنت بتلعبلى حواجبها! تكنش البنت دي مريضة أعصاب؟

صوتي العميق: ايه الاستهتار اللي انتى فيه ده؟ حواجب ايه وفشل ايه؟ ركزى الست النحس عمالة تعيط بره!

أنا: اتفضلى يا فندم كلى الكرواسون ده الأول وبعدين خدي المسكن ده... حاولى تجيبى رجلك كمان عليا.. شوية بس.. أيوة كده.

أم رجل مكسورة: اهئ اهئ اهئ... أه ياني.. كانت رحلة قطران ومنيلة..

المضيفة التونسية: الحقى بسرعة؟

أنا: ايه تاني .. البننت رجعتها النوية؟

المضيفة التونسية: لأ ده واحد عندك يرجع.. الكابينة باظت خالص!  
هانطلع الأكل ازاي دلوقتي؟ الرجل شكله تعبان جدًا.

لبست الماسك والجوانتى وجبت كمية من المناديل والأكياس والديتول  
والمياه وبدأت أنضف...

أم رجل مكسورة: اففففففففففف... ريحة ترجيع دي ولا ايه؟ اهئ اهئ  
اهئ.. ايه الريحة دي؟ اففففففففففففف

أنا: ألف سلامة على حضرتك..

المسافر العيان: مش عارف ايه اللي حصل لى، أنا آسف مالحقتش أروح  
الحمام، كنت كويس لحد قبل ما أكل.. بعد ما كلت معدتى قلبت.

أنا: بس إحنا لسه ماقدمناش الغدا !!

المسافر العيان: أكلت في مطعم غريب كده.. أول وآخر مرة أكل فيه..

أنا: سلامتك يا فندم.. اتفضل اشرب مياه.

البننت الصغيرة (بتخبط على ايدي): يا بتاعة الأنبوبة، أنا جعانة، مش  
هانجيبى الأكل؟

نزلت لمستوى طولها وطلعت بسكويت من جيبي اللى دايمًا بيبقى مليون  
منه احتياطي عشان لو حد طلبه مع المشروبات واديتهاولها..

أنا: طبعاً هانجيب الأكل.. خدي ده دلوقتى، انتى كويسة يا حبيبتي؟

بصت لى نفس البصة الخبيثة وهزت راسها لتحت عدة مرات انها  
كويسة..

أنا: باقولك ايه؟

البنيت الصغيرة(عنها لمعت وقربت منى): نعم؟

المسافر العيان: أه.. معدتى مش قادر..

الست المديرة: انتى بتعملى ايه؟

أنا: باجييله عصير... أجب لحضرتك عصير؟

المسافر العيان: لأ شكرًا.. مش قادر

الست المديرة (فى ودنى): طيب بطلى لعب مع العيال وشوفي وراكي ايه..

الكابينة بقت مستشفى...

مشيت الست المديرة وهى قرفانة من الرحلة واللى عليها.. بصت البنيت

الصغيرة بسرعة على باباها ومراته وحوالها وقربت من ودنى!

البنيت الصغيرة: أقولك على سر؟

أنا: قولى بس بسرعة...



بدأنا الخدمة وفجأة.. المضيضة التونسية وشها جاب ألوان وجريت على الحمام وطولت شويتين! وأنا شغالة وجبات ومشاريب وتلج للمسافرة المكسورة ومدادية لباقي المسافرين، رجعت المضيضة وشها أصفرررر

أنا: مالك؟

المضيضة التونسية: يظهر جالى تسمم!

في الخلفية: " كانت رحلة منيلة.. اهئ اهئ ..هى أم الطيارة دي هاتوصل امتى بقى؟"

أنا: طب ارجعى حالا خدي دوا وأقعدي.

المضيضة التونسية: وانتي هاتشيلي مكانى ومكانك لوحدك؟

أنا: هي رحلة منيلة ومهيببة من أولها.. اهئ اهئ اهئ!

وأنا باوزع الأكل والمشاريب جئنى صوت مألوف يصرخ من بعيد..

الست المديرة: عندنا حالة طوارئ..

مسافررخم: لو سمحتى عاوز كان بيبسى.

أنا: أأى.. (ايدي تعورت ازاى ماعرفش) اتفضل البيبسى، مين الطوارئ؟ قصدي فين؟ هي رحلة منيلة بستين نيلة!

الست المديرة: المسافرة اللى بيجيلها نوبات صرع.. يظهر الحالة جت.

كنت ساعتها وزعت الأكل كله تقريبا فاضل المشروبات لشوية مسافرين.

أنا (للمسافرين): هاستأذنكم دقائق وراجعة، في حالة طوارئ..

عملت Lock لعربية الأكل وأخيرا جاتلى مساعدة من المضيف العراقي  
عشان أنا أصلا مكنتش هاقدر على الست الى عندها صرع دي اطلاقا.

"اهى اهى اهى اهى... دي كانت رحلة من...."

صوى العميق: والنبى مانتي مكملة، كفاية قوى لحد كده، هاتودينا فين  
تاني؟!

"رحلة منيلة ومهبية.. اهى اهى اهى.."

أنا: أه.. أه.. أه.. شكلى أنا كمان عندي تسمم!

المضيف العراقي: ازاي وانتي مكلتيش أصلا؟!

أنا: هي رحلة مهبية و zone منيلة! "اهى..اهى.. اهى.."

## إلى كوالا لمبور

"كوالا لمبور عاصمة ماليزيا"

في غرفة من غرف الاجتماعات بالمطار قبل الرحلة...

الطيار: أنا كده خلصت أسئلتى وكل المعلومات اللى عندي، أول ما أعلن ان في مطبات هوائية تسيبوا اللى في اديكم وترجعوا أماكنكم على طول، النهاردة الجو مش كويس.

طق طق طق.. دخلوا الناس بتوع ال Grooming ( زى ما عرفنا في الأول انهم موظفين مسئولين عن التأكد ان طقم الضيافة في صورة لائقة جدًا جدًا من أول ريحتنا لحد لون الشراب اللى لازم يكون لون البشرة واننا غير مخالفين لقوانين الشركة حتى في طريقة لم شعرنا والماكياج والخاتم أو الحلق اللى لابسينه وغيره كثير، لو واحدة عليها ملاحظات مش هتطير ويطلبوا حد مكانها من ال Stand By)

الطيار (لست المديرية): عاوزه تقولى حاجة؟

الست المديرية: كلنا حافظين علامات الذبحة الصدرية والأزمة القلبية، لو اشتبهنا في حد مش طبيعى على الطائرة عارفين نعمل ايه؟ أرجوكم نكون مصححين جدًا النهاردة، والخدمة عاوزينها سريعة جدًا عشان المطبات الهوائية.

الطيار: أسيبكم مع ال Grooming وبعدين نطلع على الطيارة، الرحلة هادئة ومفيش حد مصاب ولا عيان ولا حاجة النهاردة الحمد لله.

صوتي العميق: الحمد لله..

بعد دقائق..

موظفة ال Grooming: كلهم تمام معايا.. تقدرروا تفضلوا.

تفضلنا كلنا الى الطيارة، إجراءات الأمن والأمان أحسن يكون في جسم غريب على الطيارة مثلاً ، أقفال الأبواب تمام،التأكد من ان كل الإسعافات الأولية موجودة وشغالة، استلام الأكل والتأكد من عدد الوجبات ووجبات طقم الضيافة وبيزادة، كل المشروبات تغطى عدد المسافرين وبيزادة؟

أنا (للمضيفة الى بعدي ترفع الابهام): تمام.

المضيفة الى بعدي (للبعدها ترفع الابهام): تمام.

المضيفة الى بعدها (للمست المديرة ترفع الابهام) تمام.

وأخيرا الست المديرة (للطيار ترفع الابهام): تمام كله عندي.

ترتيننا من ورا لقدام زى مانتو شافين كده، بعد اعلان الكابتن بيكون فيه اعلان من أى مضيفة على حسب مكانها على الطيارة، هتقول كل تعليمات الأمن والسلامة وعلى صوتها المضيفات في الكابينة يعملوا الحركات اللى هي إرشادات للتعامل في حالة الطوارئ، فين الأكسجين اللى

فوق كرسيك وفين جاكت النجاة وكل الكلام الحلو ده.. بعدها هينادي الطيار..

الطيار: "Cabin Crew take your seats for take off please"

أثناء الإقلاع كل المضيفات مش بيكونوا قاعدين زى التماثيل كده وخلص، من أهم المهام في الإقلاع والهبوط هو ال "Silent Review" ، يعني المضيضة بتركز دقيقة في كل حالات الطوارئ هتعمل ايه ومخارج الطوارئ حسب موديل الطائرة وتعليمات المانيوال لان نسبة كبيرة جداً من حوادث الطيارات بتحصل في الإقلاع أو في الهبوط زى ما تعلمنا.

صوتي العميق: الطائرة مش مليانة قوى الحمد لله، صحيح مصائب قوم عند قوم فوائد! ياللا رحلة من نفسك.. مش الرحلة اللي فاتت كانت مستشفى طيارة!

بعد الإقلاع بتنطفى علامة ربط الأحزمة، ساعتها نبدأ في تجهيز الأكل على طول، المرة دي في هدوء وروقان شديد، وإحنا بنقدم الوجبة كانت مسافرة آسيوية سفيفة جداً لدرجة اني كنت فاكرها في الأول طفلة! الحلوة بتبصلى بمنتهى الاعجاب! ابتسمتها..عادي يعني مفهاش حاجة.. الاعجاب زايد حبتين! خلاص مش هبصلها تاني بقى، خلاص اديتها أكلها وشربها.

رجعت ورا مع زمايلى، مالهم النهاردة كلهم مخاصمين بعض كده ليه؟ أصل ال crew ده بيبقى حظوظ، رحلة تلاقهم متعاونين ورحلة يطلعوا مسخرة وتفضل تضحك طول الوقت، أو ممكن يجيبولك اكتئاب، أو جد

زيادة عن اللزوم أو متفزلكين شوية. باختصار انت وحظك، وأنا حظي النهاردة كله عامل نفسه مهم، أحسن برضه، خليني أتفرج على المسافرين شوية، مسافرين شكلهم رايعين في شغل ومسافرين شكلهم رايعين بلدهم يمكن في إجازة أو كانوا في إجازة؟

تن تن.. تن تن...

صوتي العميق: المسافرة دي منزلتس عينها من عليكي!

المسافرة المعجبة: انتي مشغولة دلوقتي؟

أنا: حضرتك عايزة حاجة؟

المسافرة المعجبة: أصلى مسافرة لوحدي وحاسة بملل!

صوتي العميق: حد قال لحضرتك انها شغالة مسلواتية؟

أنا: أجيبلك مجلة؟

المسافرة المعجبة: عندي في جيب الكرسي بس ماليش نفس أقرأ.. عايزة أتكلم مع حد.

الصوت العميق: مممممم ... ياترى وراكي ايه انتي كمان؟ أنا عارفكوا كويس اطلعى منهم وهاتي م الاخر؟

أنا: انا معاكي 3 دقائق بالكثير عشان ورايا حاجات أعملها.. اتفضللي.

المسافرة المعجبة: أووووووه.. 3 دقائق بس؟ انتو فعلاً بتتعبوا جدًّا، أنا  
باتفرج عليكم دايماً وبلاحظ انكم بتعملوا حاجات كتير قوى على الطائرة  
قبل وأثناء وبعد الرحلة.

أنا: طيب أثناء دي عارفاها، قبل وبعد دي انتي متخيلاها ولا عارفاها؟  
المسافرة المعجبة: لأ عارفاها.. أصل صاحبتى الأنتميم كانت مضييفة وكانت  
بتحكيلى.. كنت بحبها قوى.

أنا: كانت ليه هي راحت فين؟

المسافرة المعجبة (دللت راسها لتحت وردت بتأثر): اتجوزت.  
أنا: مmmmmmmmm....

المسافرة المعجبة: بس واضح انى هايبقى لى صاحبة تانية اهو,, (وراحت  
مشاورة عليا!!)

صوتي العميق: عندي إحساس مش لطيف.

أنا (ابتسامة بلهاء): على فكرة أنا كمان هتجوز قريب.

المسافرة المعجبة: يا خسارة.. طيب ينفع أبقى أشوفك قبل ما تنشغلى مع  
عريسك؟

أنا: إذا سمحت الظروف ان شاء الله.

المسافرة المعجبة: اسمك ايه؟

فجأة لقيت حد بيتكلم جوه ودنى من ورايا..

الست المديرية: حاولى تبيلعلها حاجة من السوق الحرة.. شكلها معجب بيكى قوى..

صوتي الأعمق: هي بقت كده؟ طب مش بايعة حاجة.

المسافرة المعجبة: انتى منين؟

أنا: من مصر.

المسافرة المعجبة: شكلك لبنانى.. أنا بحب البنات اللبانية جداًااا.

أنا: ممممم.. أنا كمان بحب لبنان.

المسافرة المعجبة: البنات هناك واخدة بالها من نفسها على طول.. في أي وقت تلاقيها مظبطة.

أنا: صحيح...

المسافرة المعجبة: البنت اللبانية لو مش حلوة بتحلّى نفسها، لكن المصرية.. متزعليش منى يعني نسبة الجمال قليلة فيهم..

أنا: الفكرة دي غلط على فكرة، أغلب البنات المصريات على درجة كبيرة من الجمال والجاذبية وبرضه مهتمين بنفسهم.

المسافرة المعجبة: لا خلاص ما أنا عرفت أهو..

أنا: احم..

المسافرة المعجبة: موضوع الجمال ده نسي جداً، انتى عارفة ان كل جنس معين دلوقتى متمرد على جيناته وشكله الى بيميزه؟

أنا: ازاي؟

المسافرة المعجبة: البنات الصينية دلوقتى بيعملوا عمليات توسع عينهم! والفلبينيات مثلاً شغالين نفخ ونحت في كل حته! وقيسى على كده في كل بلد، كل واحدة عارفه عيوبها عايزة تدارمها عشان تبقى مثيرة بدون ماتفكر هيبقى شكلها الجديد حلو ولا لأ؟ البنات اتجننت، كل واحدة عايزة تغير شكلها الأصلي عشان تبقى شبه واحدة تانية مشهورة، في الآخر كتر العمليات بيخلهم مسوخ، للأسف الميديا حددت الجمال في شكل ومقاييس معينة والناس المتخلفة مشيت وراهم، كله بزنس.

أنا: إحنا في مصر شغالين شفط وقص وتدييس معدة أكثر حاجة بس دلوقتى بقى الشفط والنفخ على درجة واحدة، مع زيادة العرض في البنات وقلة الطلب في الجواز، البنات ممكن تعمل أي حاجة عشان تبص في المرآة هي نفسها تنهر.

المسافرة المعجبة: مبقاش فيه رجالة عايزة تلتزم كله عايزم يهلس..

ضحكنا إحنا الاتنين ضحكة عالية، جت على أثرها الست المديرية وغمزت لى بعنهما ووشوشتنى..

الست المديرية: ميصحش هنا التعارف وكمان عشان سمعتك بين زميلك، لومش عارفة تبيعى حاجة خدي رقم تليفونها وخلصى!

أنا: والله أنا مش...

الست المديرية: خلاص بقى.. انجزى..

أنا: يا ستى انتى فاهمانى غلط... ده هي..

مشيت وسابتنى الست المديرية بعد ما اتشبهت كده رسمى خلاص، بصيت للمسافرة بذهول وغيظ، لقيتها بصالى قوى وركزت في عيني وهي حاطة اديها على بطنها في وضع مش مظبوط خالص مالص وكأنها عاوزانى أبص على مكان اديها!

هنا بقى قررت أمشى وأنفضلها تماما عشان أشيل التهمة عنى..

أنا: انا مضطرة أسيبك لأنى معنديش وقت لأخر الرحلة و...

المسافرة المعجبة: أAAAAAAAAAAAAAAAAAAAAه..... أAAAAAAAAه..

أنا: في ايه؟

المسافرة المعجبة: يظهر يا ولد!

أنا: ايه؟ مين اللى بيولد؟

المسافرة المعجبة: أنا.

أنا: تولدي ازاي يعني؟

المسافرة المعجبة (تصرخ): أAAAAAAAAAAAAAAAAAAAAAAAAAAAAAAAAAAAAه...

أنا: هو انتى حامل أصلا؟



وفجأة سمعنا صوت شبه صوت الحنفية ولقينا الأرض من حوالينا مياه!  
بصيت تحتى في ذهول كده وشاورت على الأرض..

أنا: ايه ده؟

الست المديرية: دي شكلها بتولد بجد؟! خدوها على ورا بسرعة..وانتى  
روحى هاتى شنطة الإسعافات الأولية كلها..

أنا: انتى ولدتى قبل كده؟

الست المديرية: أيوة ولدت لكن ماولدتش حد!! روحى هاتى الشنطة  
بسرعة..

المسافرة المعجبة:

أنا: حاضره..

المسافرة المعجبة: بسرعة يا مجانين.. مش شايفين بطنى من الأول؟ يا  
أغبياء.

صوتي العميق المرعوب: فين بطنك دي مش فاهمة يعني، ده لو أي بنت  
أكلت رغيقين كبده وحواوشى هتبقى بطنها أكبر منك! يانهار مدوحس..  
بتولد ايه! دنا لما شفت منظر الولادة في فيديو التدريب رجعت، هاشوفه  
دلوقتى على الهوا مباشرة..لأ وحصرى كمان ... يالهوتنتتى.. لأ لأ اجمدي..

التدريب حاجة والحقيقة حاجة تانية، دي روح إحنا كلنا مسئولين عنها دلوقتى..

جريت ورا لقيتهم فارشين بطانية على المطبخ بعد ما شالوا كل حاجة وبقت الدنيا فعلاً فإاااضيبية.. المسافرة المعجبة نايمة على الأرض في وضع الولادة بجد وتعمل أصوات غريبة! والست المديرة قاعدة على ركبها قدامها بالظبط، بس نفسى أعرف فين بطنها؟ والعيل اللى جوه ده حجمه في حجم ايه بالظبط؟

أول ماشفت المشهد ده دوخت وعرقت وسقعت واترعشت وجريت على الحمام، البنات عاملين فيها برم بس حالهم مايتخيرش عنى..

الست المديرة: اجرى اندهيلى زمايلك الولاد من قدام بسرعة...

جريت على قدام، بابص على الركاب لقيتهم مذعورين وواحدة مسكت في ايدي وأنا بجرى...

المسافرة: المسافرة اللى بتولد جوه دي كويسة ولا موتوها؟

اضطريت أكلهم بالعربي بلا تردد "قال الله ولا فالك يا ست انتى .. اوعى سيبى ايدي"

أنا: الحقونا في واحدة بتولد..

مضيف ياباني: بس مكنش في حد في القائمة حامل؟





المضيف الياباني: بنت... مبروك مبروك... بنت

المسافرة المعجبة في قمة الإرهاق تبتسم ابتسامة جميلة جداً وهي بتبص  
على المولودة..

المولودة: .....

أنا: هي مش بتواء واء ليه؟

المضيف الياباني: اصبرى شوية..

المولودة: واء واء واء..

الست المديرة: مبروك وحمد الله على سلامتكم.

كل ال crew أول ما سمعوا صوت البيبي ابتسموا لأول مرة من أول  
الرحلة.. ودخلوا "مبروك.. مبروك" وفي واحدة لما شافت المنظر جريت على  
الحمام.. هعهمعهمع .. عارفين ليه طبعاً .. تلاقها مشافتش فيديو  
التدريب

المضيف الياباني: هتسميها ايه؟

المسافرة المعجبة (وهي بتبصلي): انتى اسمك ايه؟

أنا: أنا تاني؟؟

المسافرة المعجبة: أيوة انتى.. أنا كان نفسى تطلع شيهك وكنت عاوزه  
أقولك من الأول اسمك ايه؟

أنا: يا سلام.. مش كنتى تقولى كده من الأول يا شيخة، لخبطينى وشهيتينى.. وجاية تتوحى وانتي بتولدى؟ المهم الحمد لله انك بخير.. اسمى ياسمين.

المسافرة المعجبة: مش حلو.. بس هخلى أول حرف "٧"

الست المديرة: سيبكوا من الاسم دلوقتى.. البيى يا ترى هاتبقى جنسيتها ايه؟

أنا: صحيح هاتبقى جنسيتها ايه؟

المضيف الياباني: إحنا طايرين فوق أنهى بلد دلوقتى؟

أنا: هاروح اسأل الطيار...

المسافرة المعجبة: مش مهم جنسيتها ايه.. المهم انها تطلع حلوة زينكوا كده..

أنا: أهم حاجة ان التهمة اللى كانت لازقة فيا راحت وظهر الحق والحمد لله.

المسافرة المعجبة: تهمة ايه دي؟

## إلى جزر المالديف

"مجموعة جزر صغيرة في المحيط الهندي بقارة آسيا"

ينده المايك بصوت الطيار "Cabin Crew take your seats for take off"  
، كل المضيفات في أماكنهم للإقلاع.. الرحلة جميلة والجو جميل جداً..  
بصيت من الشباك والطيارة بتعلى في تفاعل.. وفجأة...

طق.....ويعدين حسيت بمياه جوه ودنى! وشوية شوية الضغط على  
ودنى ببعلى ويعلى ويعلى والطيارة لسه في مرحلة الإقلاع!  
أنا (بصراخ): أAAAAAAAAAAAAه... الحقونى..

المضيفة الجزائرية: مالك؟

أنا (بصراخ أشد): أAAAAAAAAAAAAه.. ودنى.... أAAAAAAAAAAAAه

كل المسافرين بصوا ورا ناحية الصوت... جريت الست المديرية من قدام  
لورا بسرعة من شدة الصوت، بعض المسافرين يوقفوها "هو في حاجة؟"  
ترد "يظهر واحدة من المضيفات تعبانة شوية!"

المضيفة التايلاندية: أووووو... بيتهياً كده ودنها اتخرمت؟

أنا: اتتنتتت... ايه؟

المضيفة اليابانية: اتخرمتتتتت!

أنا: مش سامعة؟ ضغط عالي في ودنى.. آآآه يا ودنى.... اهئ اهئ ... الوجع هايموتنى..

الست المديرية: ايه اللى حصلها؟

المضيفة الأسبانية: ودهنا باظت!

الست المديرية: من ايه؟

المضيفة التايلاندية: اتخرمت!

أنا: مش فاهمة حاجة؟ بتقولوا ايه؟ اهئ اهئ..

المياه اللى في ودنى كترت مرة واحدة ونزلت سرحت على خدي! فجأة لقيت زمائلي كلهم بيبرقوا وهما بيصولى وتعبيرات وشهم اتغيرت! حبيت أستكشف وأحط ايدي علي خدي مسكت المضيفة الأسبانية ايدي بسرعة والمضيفة التايلاندية نشفت المياه دي بمنديل ورق!

الست المديرية: انتى كان عندك برد مكتوم؟

أنا : ..... علوا صوتكو شوية يا جماعة.. بتتوشوشوا كده ليه؟!

المضيفة الجزائرية (بصوت عالي): بتقووووولك... كان عندك برد مكتوووووم؟

أنا: لأ ما عنديش الشهرده الخرطوم..

المضيفة التايلاندية: هي هي هي هي...

المضييفة الأسبانية: هي شكل ودنها باظت فعلاً ...

الست المديرية: طب قعدوها كمسافرة واعملولى إجراءات التقرير الطبي بتاعها لحد ما نشوف الدكتور في المالديف هايقول ايه؟  
المضييفة اليابانية: حاضر.

الست المديرية: وانجزونى بقى في الوقت عشان هانشتغل ناقصين واحدة! وده كان آخر طشاش حاولت أسمعها واتحكالى بتفاصيله بعد كده فاكرين الست بتاعة "رحلة اليمن"؟ عملت زيه بالظبط... اهئ اهئ لآخر الرحلة! فعلاً محدش بيحس بحد الا لو كان مكانه! أكيد حد من المسافرين أو المضييفات هيقول عليا فقرية زى ما قلت على الست بتاعة اليمن! الله يسترها المضييفة الجزائرية جابتلى شوية قطن و شاش وربطتلى ودنى في راسى، كان شكلى "ياى" ، فاتتنى صورة للذكرى، وده برضه كان آخر مشهد أشوفه، يظهر من شدة الألم أغمن عليا، لكنى صحيت غصب عنى من الوجع في الهبوط الى كان له نفس وجع الإقلاع بالظبط.

المسافة من المطار للفندق قريبة والحمد لله. وصلنا الفندق بدرى والجو مشمس جميل، قعدت على كنبه في استقبال الفندق وقعدوا البنات حواليا في دايرة. راحت الست المديرية لموظفين الفندق ورجعت وزعت مفاتيح الأوض على كل البنات الا أنا!

الست المديرية: أنا كلمت الدكتور خلاص، لو عيانة قوى ممكن أرجعك في نفس الطائرة أحسن لك، بدل ماتقعدي هنا 6 أيام لوحدك؟



قده! الراجل فك الشاش والقطن وقد يبص جوه في ودنى اللى فقدت  
الإحساس خالص بيها وشفته بيبرق وباصص للست المديرية!

الدكتور: لا لا لا ... دي مينفعش تطير النهاردة خالص..

الست المديرية: بكرة يعني؟

الدكتور: مش قبل 10 أيام على الأقل..

الست المديرية: ايه؟ دا حنا مسافرين بعد 6 أيام!

أنا: هو فيه ايه؟؟

الدكتور: أقل حاجة 10 أيام.. وبعد كده أشوفها وأقول تسافر ولا نمذ  
كمان 5 أيام؟

أنا (باصة على شفايفهم وملامح وشهم بتركيز): ..... بتقولوا ايه؟

الست المديرية: استنى انتى شوية.. حالتها صعبة كده؟

الدكتور: حالتها حساسة ولازم تتعالج بعناية.. نزلت دم كثير..

الست المديرية: طب ممكن تقرير عشان أبعته للإدارة؟

أنا: استنى ياعم انت هنا.. أنا بيتيألى قلت دم؟!

الدكتور: طبعاً ممكن...هاكتبه حالا.

أنا: هو في ايه يا دكتور.. هاموت ولا ايه؟

الست المديرية: يعني كل الدوشة دي ومش سامعانا؟ أو مال لو كنتي سامعانا؟

أنا: بتقولى ايه؟؟

المضيفة التايلاندية: هي هي هي هي هي

الست المديرية: بطلى ضحك انتى كمان، أنا حاسة انى معايا عيال فى مدرسة مش مضيفات!

أنا: هو الدكتور كان بيقول دم؟!

المضيفة الأسبانية (للست المديرية): ممكن تروحي انتى على أوضتك وأنا هتابع مع الدكتور.

الدكتور: هاتمضى بدالها؟

المضيفة الأسبانية: أمضى؟ لأ هي تمضى..

الدكتور: دقيقتين والتقرير يبقى جاهز..

الست المديرية: أنا مستنياك..

المضيفة التايلاندية: هي هي هي .. كله الا الامضا.. هي هي

أنا: بتقولوا ايه؟ وانتى مسخسخة على نفسك من الصبح على ايه؟

المضيفة التايلاندية: عليكى..

أنا: ايه؟؟؟



الجو استوائى، تبقى قاعد على الشط والشمس طالعة على آخرها وفجأة الدنيا تغمم والمطره تديها وفجأة الشمس تطلع تاني! الحقيقة كنت مستمتعة جداً ومستحليهاها، الصبح بدرى أنزل أفطرو على الظهر يجيلى الدكتور الصغنى ويوم عن يوم كان بيتهألى من ملامح وشه انى باتحسن، أنزل أقعد على الشط معايا كتاب واللاب توب والكاميرا، أزهب من حاجة أمسك الثانية، زمايلى الحقيقة ماسابونيش وبقينا أصحاب، ولما بدأت أسمع شوية ضحكونى عليا.. ايه اللى عملته ده؟ ييجى ميعاد الغدا، أنزل المطعم.. يا مكرونة يا بيتزا بالخضار يا خضار، فى الغالب العشاء بيبقى فاكهة قدام التليفزيون وخبخبخبخ.

خلصوا الأيام الستة وزمايلى روحوا وانا باستقبل طقم الضيافة الجديد اللى ماعرفهوش وهما ميعرفوش عنى الا ودنى اللى فرقت فى الجو، بس قاعدين معايا فى نفس الفندق وخلص!

وفى اليوم التاسع اللى قبل الأخير وانا رايحة المطعم عشان أتغدى، دار هذا الحوار النادر بينى وبين موظف المطعم أو ال Waiter.. (إحنا بقينا عشرة وكمان كل الفندق عارف ان ودنى مخرومة لا مؤاخذه فكانوا تقريبا يزعقوا وهما بيتكلموا معايا عشان الطرش بعيد عنكوا مما أدي الى كثير من المواقف الكوميديا بينى وبين الموظفين)

أنا: مساء الخير.. ازيك؟

موظف المطعم: أهلا.. ازيك انهاردة.. ودنك أحسن؟

أنا: الحمد لله أحسن، بافكر أنزل المياه شوية قبل الغدا.. بس ودنى؟

موظف المطعم: الجو جميل والمياه على طول دافية.. هاتستمعي جدًّا.

أنا (بسعادة): شكل المياه تحفة... أنا هانزل المياه الأول..

الراجل ماكملش جملته كانت ركبي بتلمس المياه.. جرى ورايا شوية وقال بصوت عالي..

موظف المطعم: نص ساعة بس، الساعة دلوقتي داخله على 4 يدوب تلحقي تنزلي المياه!

أنا: عشان معاد المطعم؟

موظف المطعم: لأ عشان معاد القرش!

صوتي العميق: هو أنا سمعت قرش؟ اكيد حاجة تانية مانتي ودنك بايظة.. ولا أتأكد أحسن برضه؟

أنا: قرش مين يا بن عمي؟

موظف المطعم: أصل في شوية قروش صغيرين بيعجوا هنا كل يوم الساعة 5 مساءً تقريبا.. يلعبوا شوية ويمشوا تاني..

أنا: ده بجد بقي؟!

كده يبقى ودني اتصلحت.. وهنا أعزائي القراء في كل مكان أخذت ديلي في سناني وطلعت باحترامى أحسن ما يبقى ديلي في سنان القرش!

موظف المطعم: هما صحيح صغيرين بس مفترسين برضه.. هو النوع ده حجمه مش بيكبر عن كده.

أنا: طيب أنا باقول أتغدي أحسن.

موظف المطعم: برضه مكرونة او بيتزا؟

أنا: لو سمحت..

موظف المطعم: هو حضرتك نباتية؟

أنا: لأ.. ليه؟

موظف المطعم: عشان بقالك كتير معانا عمرك ما طلبتي لحمة ولا فراخ  
ولا سمك؟

أنا: سمك؟ ازاي مجاش على بالي السمك؟!

موظف المطعم: يعني حضرتك مش نباتية؟

أنا: يا سيدي لأ.. أنا بس لازم أكل على الطريقة الإسلامية. الديج حلال  
يعني.

هنا تحول الرجل من اللون الأسمر الى الأحمر! وبرق لي ورجع مارشيدير!!

أنا (بقلق):.. في حاجة معينة حضرتك؟

موظف المطعم (بشخط واضح): ازاي تقولى كده وانتى في جزر المالديف؟

أنا: يعني بالراحة شوية بس عليا.. انت ايه مشكلتك؟ أنا مسلمة وعاوزة  
أكل على الطريقة الإسلامية.. ايه الغلط في كده؟

موظف المطعم: ما هي دي المصيبة؟ إحنا تعدادنا كله 100% مسلم  
وأكلنا ودبحنا حلال على الطريقة الإسلامية ومع ذلك في ناس لسه ما  
تعرفش ده؟! زى حضرتك كده؟

أنا: احم...أسفة جدًّا.. أنا فعلاً مكنتش أعرف والا ماكنتش هريت نفسى  
مكرونة وبيتزا من أول ما جيت؟ ثم انى نسيت السمك تماما ومحدث  
عرضه عليا منكم! أنا كنت تعبانة جدًّا ومش مركزة.

موظف المطعم: الناس هنا كانت فاكرة حضرتك نباتية..

أنا: حصل خير.. السفرية الجاية كلها لحوم.. مبسوط؟

موظف المطعم: هو حضرتك منين؟

انجعت قوووى لورا وحتيت رجل على رجل...

أنا (بالأطلة): من مصر.

موظف المطعم: ممممممممم... فين مصر دي؟

أنا (رجعت تاني لقدام بسرعة): نعم!!

موظف المطعم (ببراءة): فين مصر دي؟

أنا (مع قليل من تشويح الايدين): ممممصر... مصر الى فيها الأهرامات  
وأبو الهول؟

موظف المطعم: أهرامات؟؟ لا ماعرفهاش دي.. ومين أبو الهول ده؟

أنا: البرج؟

موظف المطعم: برج ايقل؟

أنا: لا يا عم ده في فرنسا... ركز معايا شوية كده وحياة خالتك..

موظف المطعم: نعم؟

أنا: لا مالکش دعوة انت باللغه بتاعتي... أفهمه ازاي؟ أفهمه ازاي؟؟ أيوة..  
هي دي.. مصر اللى فيها نهر النيل؟

الراجل رجع لورا وقعد يخبط بالورقة والقلم اللى في ايده على ايده  
التانية خبطات منتظمة وقفل عين وفتح التانية وشعلق حواجه لفوق..

موظف المطعم: انتى بتستهزئى بيا يا فندم؟

أنا: أستهزئى ببيك ليه؟

موظف المطعم (بفتاكة): نهر النيل ده في أثيوبيا... ها.. أنا عارف كويس.

أنا: يا نهار أبوك مدوحس.. أيوه المنابع في أثيوبيا صحيح بس بيعدي على  
مصر، يعني مصر كمان عندها نهر النيل، وعاملى مثقف وبتاع؟ مش  
كفاية انى ساكتالك من الصبح انك مش عارف مصر دي فين؟

موظف المطعم: صحيح يعني بجد ولا بتهزى؟

أنا: ماتعصبنيش بقى.. لما تروح ابقى امسك خريطة العالم.

موظف المطعم: الشغل واخذ كل وقتي والله يا فندم، مش بالحق أعمل حاجة تانية، باصلى بالعافية، أصلى باشتغل ورديتين عشان أحوش.

أنا: عشان تتجوز؟

موظف الاستقبال: لأ عشان أروح الأزهر.

أنا: أزهر!

موظف الاستقبال: أيوة.. عشان أروح هناك أدرس.

أنا: انت يا سيدي الفاضل الله يهديك ناوى تشلنى؟

موظف المطعم: ليه يا فندم؟

أنا: ما هو الأزهر اللي انت بتحوش عشان تروحه ده في مصر؟!

موظف المطعم: بجد؟ مش دي بلد اسمها الأزهر؟

أنا: لأ طبعًا . الأزهر ده مؤسسة إسلامية تقع داخل جمهورية مصر العربية وتحديدا القاهرة العاصمة.

موظف المطعم: ممممم.. أنا هاراجع وراكى المعلومات دي لما أروح، أحسن تودينى بلد تانية..

أنا: .....!!!

موظف المطعم: مالك يا فندم؟ هاااا

أنا: أنا باقول أتغدي أحسن.. هاتلى سمك لوطازه

موظف المطعم: مدبوح على الطريقة الإسلامية؟

أنا: .....

موظف المطعم: هاهاهاها.. بهزر، أنا عشت طول عمري أنا وناس تانية  
كثير فاكرين الأزهر ده بلد لوحده، تيجي انتى النهاردة تقوليلي ده بلد جوه  
بلد!! بصراحة متلخبط شوية؟

أنا: يا سيدي الأزهر مش بلد وان كان في قيمة البلد، لكن هو مؤسسة  
إسلامية داخل مصر..

ييجي مديره عشان الراجل اتأخر قوى معايا.. وقعد يوشوشه والراجل  
التاني يبصلى ويبرق، وبعدين قاله..

مدير موظف المطعم: طب روح انت جيبيلها الأكل.. تلاقها جاعت؟

أنا: أه والله.. شكراً..

المدير: احم...

أنا: في حاجة؟

المدير: بصراحة أه.. أصلى محرج..

أنا: ايه ده هو أنا نسيت أدفع امبارح ولا ايه؟

المدير: لا لا يا فندم.. واعتبرى غدا النهاردة على حساب المطعم.. بس عايز  
أعرف حاجة؟

أنا: خيران شاء الله!

المدير: هو صحيح الأزهر مش بلد لوحده؟ وانه جوه بلد كده...  
اسمهاaaaaaaaa... اسمهاaaaaaaaa... اسمها أثيوبيا!؟

صوتي العميق: يا ريتنى ما كنت سمعت تانى!

أنا: م ص ر .. مصر... الأزهر مصر ومصر الأزهر... هات القلم والورقة اللى  
في ايدك كده..

كتبتها بخط كبير تحته خط عربى وانجليزى.. "الأزهر في مصر"

المدير: خلاص حفظتها.. مصر... مصر.. "الأزهر في مصر".

أنا: الحمد لله.

المدير: الله ده القروش جت أهى.. تعالى اتفرجى عليهم شكلهم حلوقوى..

أنا: هاهاها.. ماشى انت تفرجنى هنا على القروش وأنا هافررك على الأزهر  
لما تيجى مصر.. بلدى.



أنا: ههههه ... آه.

المدير الحليوة (بابتسامة وغمزة خفيفة): ان شاء الله متكونش آخر مرة.

غمزتلى المضيفة الكورية وهى لامة كم من البطاطين يوزنوها مرتين.

المضيفة الكورية: أيييوه يا عم..

أنا: قروا بقى! حتى في الكيني بتقروا؟ ما هو مش جايبنى ورا الا القرده.

المضيفة الكورية: هاهاهاهاه... لايقين لبعض.. هاهاهاهاه

أنا(باستهزاء): لايقين لبعض هاهاهاه! طب آه لايقين لبعض لعلمك بقى؟

تن تن.. تن تن..

المضيفة الكورية: 17 D عايزك.

أنا: ده الرجل بتاع البيضة.

المضيف الكوري: بيضة!

أنا: استنى أروح أديله أمها وأرجع.

المضيفة الكورية: أمها؟ ها ها ها ..

أنا (للمسافر): اتفضل يا فندم أم البيضة.. معلش اتأخرت لأنها كانت

بتتخاق مع أبو البيضة ويدوب فضيت الخناقة.. بالهنا والشفا.

المسافر: ها ها .. أوك المرة الجاية ابقى اندهيلى أنا خير في فض  
الخناقات دي.

أنا: حااااضر.. بس كده..

وأنا راجعة حسيت انى في فيلم "إسماعيل ياسين في مستشفى المجانين"

المضيف الكوي: كيى بس أمور والله..

أنا: انت هتقطع عليا ولا ايه؟

المضيفة الكورية: هاهاها..

أنا: يا ربى كل ما اطلع رحلة تطلعى لى واحدة هبلة تضحك على الفاضية  
والمليانة؟

المضيفة الكورية: هاهاهاها

المضيف الكوي: باقولك ايه؟ هو عاجبك؟

أنا: تصدق مش عارفه؟ أصل أنا مش متعودة على الحاجات الطيارى  
دي؟ لو مش جد أوجع قلبى ليه؟

المضيف الكوي: ما أنا مش باقولك طيارى، صاحبيه واعرفيه كويس.

أنا: أنا مش عارفه أصلا هو عاجبى ولا لأ؟ أنا بهزر والله بس.

المضيف الكوي: أصلا؟

أنا: أه..

المضيف الكوبي: طيب ربنا يقومك بالسلامة... شدي حيلك.

أنا: الشده على الله يا خويا!

صوتي العميق: أنا عارف انك مش معجبة به الاعجاب اللى يقصدهه!  
انتى عجبتك قصة كفاحه اللى حكاها لك فى أول الرحلة؟ يكونشى ده  
طعم يا منيلة على عينك؟ قالك دي سكتها؟ بس الواد وسيم وسيم يعنى.

أنا: مش عارفة ليه فكرنى بجدي! أه والله، مع فرق الأطوال والألوان.

صوتي العميق: مفيش فايده!

شوية والمدير الحليوة ماسك ورقة عبيطة وجايلى يتحجج بها، وراح  
مسبلى التسبيلة إياها دي...

المدير الحليوة: انتى مسلمة؟

أنا: أه وربنا..

المدير الحليوة: طيب كده سهلتى عليا كتير قوى.

أنا: جدد؟ قصدي... سهلت ايه بقى؟

المدير الحليوة (يغمز بعنيه): على العشا هقولك!

ابتسم المدير الحليوة قوى ابتسامه طلعت غمازات مستخبية حلوة قوى  
قوى كانت حرام تستخى بصراحة، بعد ما غمزلى ومشى حسيت إحساس  
حححلحو. يا اه وكنت شايل فى قلبك كل ده وساكت يا راجل؟



المضيف الكوبي: أصل حبيها مصري، قبل ما تلبسى هنجيلك عشان نشوف هتلبسى ايه في أول معاد.. ياسلام على فستان أسود.. كعب على طبعًا .. شعرك ملموم وحلق طويل، مكياج يركز على العينين ويكبر الشفايف كمان ..

أنا: حيلك حيلك.. في ايه؟ ايه كل ده؟ هو أنا هتجوز النهاردة ولا ايه؟ الرجل مقالش حاجة خالص؟ كل اللي عمله انه غمز وقالى هاقولك على العشا.. هيقول ايه بقى الله أعلم؟

المضيف الكوبي: أو مال كان بيسألك عن ديانتك ليه؟

أنا: عادي.. من باب التعصب يمكن؟

المضيف الكوبي: تعصب! انتي مفيش مخ خالص؟ يعني الرجل مديرنا وانتم الاتنين مسلمين وهيتعصب؟ كان أولى يتعصب على حد فينا؟ على فكرة الواد سمعته حلوة قوى بين ال crew.. انتي عارفه مفيش حاجة بتستخبي، صحيح إحنا 7000 واحد وواحدة بس كله على الهوا 7-24 يا باشا.

أنا: انتو منين أصلا يا جدعان؟

المضيف الكوري: هاهاها.. خليكي هادية انتي بس ومركزة وسيبي الباقي علينا..

أنا: برضه مش هاللبس فستان اسود والجوده...

المضيقة الكورية: يعنى كلنا هنلبس فساتين على العشا وانتي هاتعرينا  
وتتزلى بالجيزز؟

أنا: وانتو هتلبسوا فساتين ليه ان شاء الله؟

المضيف الكوي: عشان الجو كده في الفندق انهارة، الخميس سهرة  
أسباني.. أولهمهههههه..

أنا: ماشى ياخويا.. بس أنا مش معايا فستان أصلا؟ أنا عاملة حسابي على  
غابات وحيوانات.

المضيقة الكورية: أنا معايا 3 فساتين!! اختارى واحد منهم..

أنا: طيب لما نروح أبقي أشوفهم.. ومش معايا جزمة؟

المضيف الكوي: دي نجيبها من الفندق.. قوليلي على مقاسك وأنا هانزل  
أجيبها لك أنا خبير في الجزم.

أنا: فكرتني بفيلم قديم عندنا.. "مدام.. بوز جزمك بيدل على أنوثة  
طاغية".. ها ها ها ها ..

المضيف الكوي: مش فاهم حاجة.

المضيقة الكورية: بووووووووز جز... جز

أنا: اشمعنى دي ماعرفتوهاش؟ خلاص مش مهم.. المهم ان ده لو كان  
فرحى مش هالاقى ناس حلوين زيكوا كده.. انا حبتكوا قوى والله.. كل

التعب ده وممكن جدًا جدًا الموضوع يطلع فاكس كالعادة!! ياللا ما علينا.. أنا باكسب أصحاب.

المضيفة الكورية مدت بوزها وهاتك يا بوس وعنيها مدمعة، وهى شغالة بوس كده جه علينا المدير الحليوة بالقوى..

المدير الحليوة: ايه ده بتيوسك؟ لأ أنا أغير كده؟

المضيفة الكورية: تغير؟

المدير الحلو (بتسبيلة): طبعًا أغير..

المضيفة الكورية والمضيف الكوبى ابتسموا وغمزولى كالعادة ومشيووا وسابونا!! وأنا ازهلليت، يعني أنا سبت رجالة مصر كلهم يا ربي وجاية كينيا أتجوز! طب أقول لأهلى ايه دلوقتي؟ وأبويا اللى كان حابب آخر عريس جدًا لمجرد أنه يتيم الأب والأم واخواته متجوزين ومش هابضايقونى! أقوله نسايبك في كينيا؟

أنا: الا قولى.. هى مامتك وباباك عايشين؟

المدير الحليوة: أيوة ربنا يبارك فيهم... بتسألئى ليه؟

أنا: لا باظمن بس.

المدير الحليوة: دول طيبين قوى، لما تعرفهم هتحبهم جدًا وأنا متأكد انهم كمان هيجبوكى..

صوتي العميق: الله.. ده يظهر كلام العيال جد ولا ايه؟

المدير الحليوة: بتقولى حاجة؟

أنا: لا أبدًا.. بص انت متركزش معايا كتير.. أصل باحب أكلم نفسى ساعات كده ماتخدش في بالك..

المدير الحليوة: هاهاها.. تعرفى ان دمك خفيف ...

صوتي العميق: دي مش متعودة على الكلام ده يا خوانا.. بتبقى حالتها صعبة.. حد بيعى يشيلها أو يشيله من هنا.

باضرب بعينى فوق لقيته لسه مسيل ومبتسسسم و... "تن.... تن....تن....تن"

أنا: احم.. الحمد لله.. في حد عاوزنى، بعد اذنك كده شوية أشوف المسافر بتاع البيضة عاوز ايه..

المدير الحليوة: اتفضلى... اوعى تتأخرى على العشا النهاردة؟ عاوز أقضى معاكى أطول وقت ممكن..

أنا: ههههه... أه... ان شاء الله.. أكيد طبعًا .. حاضر

مشيت رجلى الاتنين بيتلولوا فوق بعض ومش فاهمة كل العرق ده جه منين يعنى كأتى لسه داخلة ثانوى جديد! ايه ده هو أنا معجبة ومعرفش ولا ايه؟ يكونش العيال شايفنى صح وأنا اللي بعند وخلص؟ بس هاعجب بيه امتى بس؟ ده أنا لسه شايفاه من كام ساعة.. عادة أنا بيحصل لى موضوع الاعجاب ده بعد شهر....



المضيف الكوري: قلنا نلحقك قبل أي حاجة.. قيسى بسرعة الفساتين  
عشان أعرف هجيبك جزمة شكلها ايه وقولى لى على مقاسك.

أنا: هو انتم ازاي حلوين كده؟

المضيفة الكورية: ياللا قيسى بسرعة..

بعد ما قيست استقرينا بالاجماع على الأسود على غرار "الأسود يليق  
بك"، نزل بسرعة المضيف الكوي يجيبلى جزمة سوداء، ورجعت  
المضيفة الكورية على أوضتها، أخذت الدوش المتين..

طلق طلق طق..

موظف من الفندق: الأستاذ اللى فى أوضة 383 بعثلك الشنطة دي..

أنا: شكراً..

يا حبيبي يا كوي دي الجزمة، الله ومقاسى كمان وزوقها يجنن.. لما أقعد  
أعيط شوية بقى من التأثر اللى انا فيه..

طلق طلق طق..

موظف الفندق (مبتسم ابتسامة غريبة): أوضة 326 بعثالك الشنطة  
دي.

أنا: شكراً.. يا ترى ايه ده كمان؟

هدية! ملفوفة لفة حمرا! مين يعني؟



طق طق طق.. أنا لسه ماسكه العقد ببחلقه والمضيفة الكورية قامت  
تفتح الباب...

المضيف الكوي: انتى لسه مالبستيش؟ هنتأخر.. ياللا.. ياللا..

المضيفة الكورية: ده بعتهلها يطلب ايدها؟

المضيف الكوي: بجد؟

أنا: لا هي أصلا مش متأكده.. ده بعته عقد بس.

المضيف الكوي: عقد؟ أدور على الانترنت أشوف كده؟ بس مفيش وقت  
يا جماعة قومي اجهزى انتى الأول وبعدين نشوف موضوع العقد ده.

قمت جهزت وقعدت المضيفة الكورية الله يسترها تظبط الأداء معايا لأنى  
مش مركزة خالص..

المضيفة الكورية: أووه.. شكلك زى نجوم السيماء..

المضيف الكوي: باقولك ايه.. هو الولد ده تحديدا كويس أنا أعرفه من  
فترة.. هو محترم، بس أنا ماضمنش حد خالص بصراحة، وموضوع  
السحر منتشر في أفريقيا جدًا، ممكن يكون العقد ده مسحور..  
ماتلبسهوش أحسنلك، ولو كان علامة رفض أو قبول ابقى اتحججى انك  
ماتعرفيش عاداتهم، وخلي بالك.

المضيفة الكورية: سحر!!

أنا: سحر! هي متعقدة معايا خلفة.. مش حمل سحر كمان.

نزلنا في الأسانسير وشوية سلالم على رجلنا، مع الفساتين والكعب العالي والبدلة كنا زى نجوم هوليوود في المهرجانات، أول ما شافنى الحليوة من بعيد راح عامل حته سيما برضه وقيام من مكانه "Slow Motion" وجاى لحد عندي ماسك ايد واحدة لفوق كده ماعرفش ليه؟ وشد الكرسي وقعدنى، هنا بقى حسيت أنى أصلا أميرة وباشتغل مضيفة جوية من ورا أهلى والواد ده سويسرى من أصل كينى!

قعدت جنبه والمضيفة الكورية والمضيف الكوبى قعدوا جنب بعض قدامى، وال crew الولاد والطيار ومساعدينه طالع عنهم على زمايلهم البنات وعنهم بتقول هما دول البنات اللى كانوا معانا على الطائرة؟ هما نضفوا ازاي كده؟ المزيكا المنعشة في الخلفية، قام الحلو موطى عليا بشياكة كده وقال لى " لما البوفيه يجهز ماتقوميش الا وأنا معاكى!"

صوتي العميق: يا سلااااااا.. يا سلام، قول.. قول ومزجنى يا منجبة قول..

أنا: كنت عايزنى في ايه بقى على العشا؟

الحليوة الكينى: بتعرفى ترقصى تانجو؟

أنا: تانجو! أبقي أرقصه مع جوزى التانجو ده... صعب دلوقتى.

الحليوة الكينى: صعب ليه؟.

أنا: كنت عايزنى في ايه بقى على العشا.

الحليوة الكينى: لما البوفيه يجهز هقولك، الله ده بابا وماما وصلوا أهم.

قام الحليوة يسلم عليهم ويستقبلهم..

أنا: بابا وماما!! هما فين؟

أهله أو حماى وحمايا في المستقبل أفارقة بحق وحقيق شكلا وموضوعا،  
أنا أصلى مش متخيلة قوى عشان الواد شكله مش أفريقى زيهم كده.

المضيفة الكورية: اهله جم؟

المضيف الكوبى: قومى سلمى عليهم..

أنا: يا سلام؟ بمناسبة ايه يعني؟ لسه ماكلمنيش في حاجة.. هو تلاقيح  
جنت؟

الحليوة بالقوى: أعرفكو .. ماما.. بابا... المضيفة المصرية.. الكورية  
وصديقى الكوبى.. ودول باقى المجموعة.

أم الحليوة بصتلى من تحت لفوق بمنتهى العجرفة ومردتش! أبو الحليوة  
بقى أحلى من أمه بكثير من بره ومن جوه!

أبو الحليوة: أهلا وسهلا بيكم.. شرفتونا في بلدنا.

إحنا: شكراً يا أونكل.

المضيف الكوبى: أهله شكلهم من عليا القوم هنا على فكرة!

المضيفة الكورية: الولية أمه شكلها حرباية؟

أنا: انجزى وقولى انتى منين؟

المضيضة الكورية: هاهاها، اسمعى.. لو أمه مش كويسة انظرهم كلهم، أحسن الأمهات اللى من النوعية دي بيبقوا عقارب، وإحنا لسه مانعرفش هو ابن أمه ولا لأ.

أنا: أنا كنت فاكراكى شبراوية.. طلعتى من حكر أبو دومة؟

المضيضة الكورية: أبوووووو دووووووومة... أبوووووووو... يعنى ايه دي؟

أنا: يبقى كريم لسه موصلش للمرحلة دي؟ عموما ده مكان شيك قوى عندنا في مصر، لما تيجى هبقى أوديكي نسهر هناك..

المضيضة الكورية: أبوووو دووووووومة...

الحليوة الكيى: اتفضلوا البوفيه جاهز..

أول ما وصلنا عند البوفيه... محصلش هجوم على الأكل! نظام على البوفيه.. الناس واقفة تختار الأول، في أكل كتير مش مفهوم، وقفت أنا وهو وورانا الكوبى والكورية.. غالبًا بيتصنتوا علينا.

أنا (للحليوة): ايه بقى اللى كنت عاوز تقوله؟

الحليوة: قوليلى بصراحة.. انتى مسلمة متدينة ولا مش قوى؟

أنا: بمعنى؟

الحليوة: يعنى ممكن تاكلى أي لحم مش مدبوح حلال؟

أنا: لأ مش ممكن.

الحليوة: طب خلى بالك بقى..

أنا: أخلى بالى من ايه مش فاهمة؟

الحليوة: لأن البوفيه عليه أى حاجة بتمشى على الأرض أو الحيط أو بتطير أو بتزحف حتى... أنا لاحظت اخلاقك على الطيارة وحسيت انك زبي ملتزمة فقلت واجب عليا أنهمك على العشا لأن زمايلنا هنا بيعحبوا يجربوا أي حاجة على سبيل الهزار.. خفت يضحكوا عليكى وانتى بصراحة بينضحك عليكى بسهولة.. ها ها ها.

الحليوة قال الكلمتين دول وفتح بقه على الآخر والغمازات طلعا.. وكل الى قاله كوم والجملة الأخيرة كوم لوحدها!

أنا: هو ده اللى كنت عاوز تقولهولى من الصبح؟

الحليوة: أه.. فى حاجة؟

أنا: وفستان اسوود.. وجزمة جديدة.. وكالونيا... وماكياج كامل... وأمى وأبويا جاينين.. وانتى مسلمة ولا لأ؟ واونى تروحي البوفيه الا وانا معاكى..

الحليوة: مالك فى ايه بس؟

أنا: لكن الحق مش عليك.. الحق على ال...

المضيفة الكورية والمضيف الكوبى اللى كانوا ورانا بيتصنتوا طلعا يجروا! لكن هيروحوا منى فىين؟

كينيا مش كبيرة قوى يعنى...

## الى قاهرة المعز

"القاهرة العاصمة- مصر حبيبتى"

جبت التفاح.. يدوب آخذ دوش وأراجع المانيوال، فتحت باب الأوضة  
ودخلت...

أنا: الله... هما موزبوش الشنطة ليه؟ يمكن مش فى الموود ولا مش  
موجودين النهاردة؟

دولا: مين حبيبتى؟

أنا: ههههه.. لا ولا حاجة.. انتى هنا؟

دولا: مثل ما عيونك مكحلة بطلعتى النيهة...

صوتي العميق: ممكن عشان دولا هنا.

دولا: شوبك؟؟

أنا: بيى دولا... بحبك أنا والله...مووووه

دولا: خير يا رب... أنا كمان كتير بحبك... أعملك نسكافيه؟

أنا: ياللا ريت.. أنا تقريبا جهزت بس هاراجع المانيوال سريعا كدا.. انتى  
قاعدة النهاردة؟

دولا: رايحة على برلين المسا... حالا بيكون النسكافيه جاهز.

أنا: يخليكي ليا يا دندون.

دولا: على وين اليوم؟

أنا: بلدي المحبوبة.. قاهرة المعز.

دولا: القاهرة تقهر.. يا الله شو عصبين!!

أنا: إحنا؟ لا يا شيخة! ده إحنا ملايكة ماشية على الأرض!

دولا: وحياء الله ناطرتك بعد الرحلة لتحكى شو عملتى.. الله معك عن جد.

أنا: ما انا سافرت قبل كده قبل ما أشتغل مضيضة.. عادي يعني؟

دولا: وانتي مسافرة غير شى... فهمتى على؟

أنا: لأ!!

دولا: معاكى دوا للصداع!

أنا: ممممم...ليه بقى؟

دولا: هاتحسى حالك بدك تصرخى فيهم... يا الله...

قعدت أفكر في كلامها الى أن فاجأتني بمشروبي المفضل ..

دولا: النسكافيه حبيبتي... صحتين.

شربت النسكافيه وراجعت المانيوال.. عربية الشركة تحت.. اتكلت على

الله.. الى بلدي حبيبتي..

أنا: باى داندون.

دولا: الله معك.

في ال Briefing أو الاجتماع الذى يسبق الرحلة على طول، أكد علينا الطيار والسيد المدير "اللبناني" 700 مرة نفضل هاديين مهما حصل! هو للدرجة دي المصريين عصبين؟ ولا مستفزين؟ لا دي ولا دي؟ وعلى فكرة بقى العصبية والاستفزاز صفات بنى آدمين مش شعوب.

طلعنا الطائرة، كله تمام...

السيد المدير: اتأكدتم ورا إن الأكل زيادة؟

أنا: أيوة... زى ما بنعمل في كل رحلة!

السيد المدير: انتى المصرية.. ها؟

أخذتها على صدرى قوى وخطيت ايدي في وسطى كأنى باستعرض في ديفيليه..

أنا: وأفتخر.

السيد المدير (يضحك): بلاش تبلى حساسية... إذا بنطلع على لبنان بتشوفي هيك مشاكل.. الشعوب العربية بتشارك مع بعض في حاجات مثل الشعوب الآسيوية والأوروبية تمام.. بلاش تبقى عنصرية وخليكى منصفة حبيبتى.

صوتي العميق وهو يبتسم: حبك برص أجرب.

أنا (مبتسمة على الآخر): "أهلا وسهلا يا فندم" .. "أساعد حضرتك؟" هنا الكرسى بتاع حضرتك" ..

أنا (لمسافرة مسنة): عنك الشنطة يا أمى .. (أى هي ثقيلة كده ليه؟!)  
المسافرة المسنة: أصلى حاشية حمام لابنى.

أنا: حمام!

الناس كلها طلعت .. وتقريبا أغلهم قعدوا .. وكل ما العدد كان يكثر الدوشة تكثر! ماشى ماهوده طبيعى؟

صوتي العميق اللئيم: ايه ده بقى؟ ايه الدوشة دي؟ هي دولا عندها حق ولا ايه؟

مسافر: لو سمحتى... هو مفيش حاجة أكلها؟ أصلى معايا دواء لازم أخده دلوقتى!

أنا: بعد الإقلاع هانجيب الأكل على طول يا فندم .. للأسف لو جيت لحضرتك لوحدك الناس كلها هاتقولى اشمعنى إحنا .

مسافر: خلاص ولا يهملك.

أنا: شكراً لذوقك.

صوتي العميق المتفائل: طب ما الناس زى الفل أهى؟ الله يسامحك يا دولا ..

مسافر: اتلمى يا ولية لأسفحك جلم يجيبك على هيئتك الأولانية؟

مسافرة: انت راجل عديم الرباية.. أنا تسفخى قلم؟ طيببيبيبي... يا عادل.. يا عاااااادل..

وهنا قام "هرقل" من مقعده الذى يقع بعدها بصفين في منتصف الطائرة...

عادل: أيوة يا ماما...

صوتي اللئيم: ماما؟!!!!

الماما: الحق أمك يا حبيبي واحد جريان عاوز يسفخها قلم؟

عادل: بتقولى ايه؟؟ عدينى كده يا أخينا منك ليه لما أشوف ايه الحكاية؟

المسافر (يصلى): بتجول جريان؟ اتلمى يا ولية بجولك؟

عادل: هي مين دي اللى تتلم يا عين أمك؟

الناس كلها قامت تتفرج على الخناقة! مفيش حد حاول يحل ولا يهدي.. المضيفات كلهم بيعملوا اللى لازم يعملوه كل رحلة.. ماحدش فاضى.. جريت من ورا لقدام..

السيد المدير: سيداتي سادتي، معكم كبير طاقم الضيافة زين، نيابة عن الكابتن وطاقم الضيافة أرحب بكم على متن خطوطنا الجوية رحلة رقم 505 ، خدمة بدون توقف الى العاصمة القاهرة، زمن الرحلة 3 ساعات و30 دقيقة، سوف نظير على ارتفاع 36000 قدم بسرعة 108 ميلا في الساعة، الساعة الآن ....

أنا: لو سمحت... بعد اذنك أعدي... يا جماعة ما يصحش كده... الناس بتتفرج عليكم.. يا أستاذ عادل حقك عليا أنا.

عادل: انتى مش شايقة الجلفن ده بيشتتم أمى... ده أنا أجيب راسك على صدرك.

الجلفن قصدي المسافر: وعزة جلال الله ما هي جاعدة هنا ووريتى يا حيلتها هاتعمل ايه؟

عادل: لا ده انت عايز تعرف مقامك شكلك كده؟

المايك (بصوت فيروز): شط اسكندرية يا شط الهوى.. رحنا اسكندرية رمانا الهوا...

وهنا لمحت السيد المدير الخبيث يتحدث وبيتسم الى أحد المسافرين ال cute في ال Business class ..

أنا: يا سيادة المدير.. الحقنى هنا لو تسمع..

السيد المدير (بيتسم لى بخبيث وهو جاى يجرى من قدام لورا): في ايه يا جماعة؟ كده الطيارة هتتأخر؟

مسافر تاني: تتأخر.. لا والنبي عايزين نلحق مصالحنا الله يخليكوا؟

السيد المدير: الطيارة مش هاتطلع الا لما يكون كله قاعد مكانه؟

الماما: أنا مكاني هنا عند الشباك Window Seat (الكرسى اللى جنب الشباك) باقوله ده مكاني قالى أنا اللى جيت الأول!

المسافر: أيوة أنا اللي جيت الأول... الست اللي بتجطعلى في المطار جالتلى كده.. أكديها وأصدجك انتى؟

أنا (في وذن عادل): يا أستاذ عادل ده راجل عقله على قده... متاخذش على كلامه معلش، أنا هخليه يمشى.. دقيقة واحدة بس.  
عادل: عشان خاطرک انتى بس.

المسافر: (مشعلق حواجبه وباصص بعند)

عادل: يا راجل يا متخلف.. هو أتوبيس؟ رقم الكرسي مكتوب على الورقة اللي في ايدك.. هو ده اللي انت قاعد عليه؟  
المسافر: مالکش دعوة انت يا حيلتها.

عادل: اللهم طولك يا روح...

الكابتن: طاقم الطائرة يرجى الاستعداد لمغادرة البوابة.

أنا (في وذن المسافر): يا فندم مايصحش كده.. الطائرة لازم تطلع دلوقتى والا هايدفعوك غرامة كبيرة!

المسافر: ههههه.. ازاي الكلام ده؟ وأنا مالى؟ طب ما تخلى السواج بيعى يشوف بنفسه؟

أنا: السواق مش هايبيى يا حاج.. بيه قصدي الطيار، وراه حاجات كتير يظبتها دي طيارة مش أتوبيس، أنا باقولك كده عشان مصلحتك عشان

في ركاب قاعدين قدموا فيك بلاغ للطيار انك معطل الإقلاع.. دلوقتي ينده على الولد اللي واقف جنبى ده ويعمله إيصال بالغرامة يدفعهولك؟

المسافر: يعني تشورى عليا بايه؟

أنا: سييلها الكرسي وانت الكسبان.. وبينى وبينك هو أصلا بتاعها وانت شكلك راجل محترم ماتعرفش العيبة ومهما كان دي واحدة ست والستات ناقصات عقل ودين.. ماتدققش معاهم.

المسافر(بصوت واطى في ودنى): عندك حج والله يا بنتى.. بنت أبوكى والله.

أنا: الله يكرمك يا حاج.

المسافر (بصوت عالى): اشبعى بالكرسى يا ولية وخلى حيلتها جنبك بالمرّة.. رجالة عايزة الحرج.

حيلتها قصدي عادل: راجل لسانه زفر صحيح.

مشى الرجل ورجع ورا في النص مكان عادل وهكذا قعدت الأم والأبن جنب بعض في window seat والحمد لله.

أنا: أووووووووووف.. والله تعبت ولسه قبل الإقلاع! معاك حاجة للصداع؟

السيد المدير: هاهاها... معايا؟ طبعا.. أنا دايمًا عامل احتياطي... بس انت قلتي للراجل ايه في ودنه خلتيه يسيب الكرسي؟

أنا: لااااا .. دي أسرار مصرية أصيلة.. فهمت ليه بيحطوا في كل رحلة واحد من أهل بلدها.. عشان يعرف يتفاهم مع ناسه.

السيد المدير: بس بنت أبوكي دي كنت هنفجر من الضحك.. ها ها ها  
أنا: أه شفت؟ وصلت لبنت أبوكي كمان؟ أو مال بنت مين؟ ياللا ما علينا.  
السيد المدير: اتفاهمى لآخر الرحلة و حياة أبوكي... ماشى.

أنا: ماشى.. بس فين دوا الصداع يا سيدي؟

السيد المدير: اتفضللى.

مشى السيد المدير وسابنى لقدرى..

مضيفة يونانية: الرجل ده هضربه فوق دماغه بأله حادة؟

أنا: مين؟

المضيفة اليونانية: بيقولى ماتيجيلى النهاردة الأوضة!!

أنا: يا لهوى؟ طيب معلش حقك عليا.. ماتتعاملش معاه تاني.. سيهولى  
أنا.

صوتي العميق: الله يخرب بيت السينما الأى كلام، بوظت عقول أجيال.

تن.. تن

المضيفة اليونانية: أهو.. أهو بيرن تاني.. روحى له انتى وأنا هجهز مكانك.



أنا: لو كان محترم هكلمه ليه كده؟

السيد المدير: ممكن تصديه وانتي هادية ومبتسمة.

بدأنا في توزيع الأكل والشرب والهدوء يعم الكابينة الا من أصوات الأكل فقط...

مسافر 1: لو سمحتي.. ممكن مشروب؟

أنا: طبعاً يا فندم.

المسافر الى جنبه: مش قلتك؟

مسافر 1: ببلاش؟

أنا: أيوة!

مسافر 1 : طيب ممكن أخذها مقفولة؟

أنا: يعني هو المفروض تتفتح هنا .. بس... مفيش مشكلة اتفضل.

المسافر الى جنبه (يغمز له): مش قلتك؟

مسافر 1: طب ممكن واحدة كمان؟

أنا: أسفة مش ممكن.. حضرتك عاوز حاجة تانية؟

مسافر 1: شكراً

مسافر 2: لو سمحتي... ممكن أخذ وجبة تانية؟

أنا: تحت أمرك يا فندم.. اتفضل.

مسافر 2: شكراً.

المسافر الى جنبه: مش قلتك؟

صوتي العميق اللئيم: لا هو انت برضه يا منيل على عينك؟ قاعد في النص وعمال يوشوش ده ويوشوش ده!

مسافرة 3: يا لهوى .. المحفظة؟ المحفظة فين.. المحفظة اتسرقت!

صوتي المنبوح: لأ يا جماعة كده Over قوى بصراحة ماتوصلش للمحفظة! دي قلبت أتوبيس بجد؟

مسافر 4: دورى عليها تحت الكرسي.

مسافرة 3: مش لاقياها!

أنا: لو سمحتى دورى كويس..

مسافرة 3: هيبيبه.. هات يا واد المحفظة.. يا واد هات يا واد.. والله لما أشوف أبوك بس لأخليه يرناك علقه.

أنا: لقيتى المحفظة؟

مسافرة 3: معلش بقى العيال أشقيا قوى..

أنا (جزيت على سناني): حصل خير.. الأطفال أحباب الله.

يا نهارى.. مين اللى بيشد الجيبة من تحت.. هاتقع يا ولاد ال..

طفل مسافر: طنط .. طنط..

أنا: سيب الجيبة يا حبيبي.. عايز ايه؟

الطفل: عايز أتصور مع عمو الطيار.

أنا (مسكت الولد من كتفه): يا سيدي يا مدير.. تعالى هنا والنبي.

السيد المدير: شكلك معصب؟

أنا: لا أبدًا.. دول لطاف خالص... بس ممكن تتصور مع الطفل الأمور ده؟

(وتقريبا حذفت الولد عليه)

الطفل (رجع لست الحيايب وبصلى شذرا): انتى بتضحكى عليا.. ده مضيف مش طيار.. يا كدابة.. ربنا هايوديكي النار.

أم الطفل: عيب كده يا قليل الأدب.. معلى متأسفة قوى.

أنا: لا ولا يهكم.. أصل مينفعش أدخله عند الطيار دلوقتى.. حضرتك فاهمة؟

أم الطفل: لما يخلص يا حبيبتى.. خدوا راحتكوا خالص.

أنا: خلاص يا حبيبي أول ما الطيارة تقف هاقول للطيار يتصور معاك

الطفل: يا كدابة!!!

السيد المدير: هاهاها.. حبيبتى الأجيال دي خلاص ما فيكى تضحكى عليهم، بيعرفوا أكثر منى ومنك.

أنا: ان شاء الله.

السيد المدير: شكلك معصب؟

أنا: أكيد لأ.

السيد المدير: شفتك رميتي الولد بعنف!

أنا: لأ طبعًا .. دنا كنت بادلعه!

السيد المدير: مثل ما بدك ... ديرى بالك على حالك وإذا احتجتى شى أنا

بال Business Class

ومشى وسابنى وانا مش طايقة نموسة تعدي من قدامى.. الى أن قابلت

شخصية سياسية مهمة جدًا واندهشت انه مسافر في الدرجة

الاقتصادية economy class

أنا: أهلا وسهلا يا فندم..

المسافر المهم: أهلا بك.

أنا: تخيلت حضرتك بالدرجة الأولى مش هنا!

المسافر المهم: أنا بسافر على أي درجة متاحة.

أنا: مبسوفة جدًا انى قابلت حضرتك.. أول مرة شفتك كنا في عيادة

دكتور.

المسافر المهم: أهلا وسهلا.. انتى بقالك قد ايه بتشتغلى هنا؟

أنا: أقل من سنة دلوقتي.

المسافر المهمم: بس شكلك لسه ناقصك تدريب.

أنا: ليه يا فندم؟

المسافر المهمم: شفتك في الأول ماشية مضبوط وبعدين أعصابك فلتت ودول مهمما كان اهل بلدك ولا ايه؟

أنا: عندك حق بس الدوشة والتصرفات...

المسافر المهمم: شوفي يا بنتي.. كل البلاد والشعوب فيها الحلو والوجش .. خليكي محايدة ودايمًا حاولي تقلى أي موقف لصالحك، والشعب ده غلبان وطيب والاحتلال اللي عاشوه أجدًا دنا وأجدًا دنا أجدًا دنا أخرنا كثير، متستهونيش بيه وتقولى ده من زمان، وكويس قوى اللي إحنا فيه رغم كل الظروف.

أنا: وظيفة المضيفة الجوية دي مش سهلة أبدًا، تعب ذهني ونفسي وبدني.

المسافر المهمم: أنا عارف وأقدر أتخيل، لكن حبيت أحنن قلبك شوية على ناس تعبانة وشقيانة زيك بالضبط، الحاجة الوحيدة اللي مش بلومك فيها معاملتك للمسافر المتحرش.

أنا: أنا استفدت من حضرتك كثير والله.

المسافر المهم: خليكي فاكرة دايمًا اننا فراعنة مهما حصل إحنا أصحاب حضارة كبيرة بيحاولوا يدمروها وينسوننا إحنا مين، لكن مش لازم أبدًا نتجرف ورا الاسفاف في حياتنا، لازم نتمسك بالرقى حتى في طريقة تعاملنا مع بعض واحترامنا لاختلافاتنا.. لو كل واحد بدأ بنفسه ساعتها بس هانرتقى ونرتقى بعضنا، فاهمة يا بنتى؟

أنا: أنا محظوظة علشان قابلت حضرتك مرتين في حياتى، فاهمة واعدك هعمل كده.

في رحلة زى دي كنت تأثرت مسبقا بكلام دولا، الحقيقة ان كل شعوب العالم فيها الوحش والكويس بنسب مختلفة. والمسافر المهم ده كان رسالة تذكير من عند الله... شكرًا يا رب.

# إلى بكين

"عاصمة جمهورية الصين الشعبية"

في وسط كابينة الطائرة ...

صوتي العميق: بجد تعبت.. كده عدينا 12 ساعة طيران مش قادر..

السيد المدير: خمس دقائق وابدئوا اجهزوا بالوجبة الأخيرة.

صوتي العميق: يا عم روح كده بالروح اللي حاططهولنا ده..

السيد المدير: OK Honey??

أنا (ابتسامة صفراء مرهقة): حاضر هبلغ زمايلي.

رجعت متجهة الى ال Galley وزمايلي المفرهدين ..

أنا: السيد المدير بيقولنا 5 دقائق ونبدأ نجهز للوجبة الأخيرة.

المضيف الايراني: يعني هو كده لغى العصاير؟

أنا: أه صح.. المفروض في عصاير قبل الوجبة الأخيرة .. هارجع أسأله.

السيد المدير في ال Business Class كان واقف بيتزين، ماسكرا، بلاشر،

روح والكالونيا الحريمى.

السيد المدير: Yes Darling

أنا: احم.. أنا نسيت أسألك على العصاير هانلغها ولا ايه؟

السيدة المدير: أتأخرتوا قوى الوجبة الى فاتت، مضطر ألقى العصاير.

أنا: مصلحة.

السيدة المدير: Pardon?

أنا: لا يا روى خليكى انتى فى اللى بتعملية ولا تشيلى أى هم خالص.

السيدة المدير: Oh... You are so sweet

صوتي العميق: وماله يا خويا قصدي ياختى، مش قلقانة منك.. قول اللى انت عاوزه.. ربنا ينجينا بس ويطلعنا منها على خير.

أنا: you too

فى طريقى لزمابلى ورا كانت ايدي اليمين معلقة فى الهوا والشمال بتمررج ومشيتى باظت خالص، افكرتتى المضيضة المغربية بقلد السيد المدير.

المضيضة المغربية (بضحك): لغاه؟

أنا: أيوة.

المضيضة المغربية: أحسن، رحلة طويلة ومتعبة، بلاش تقليديه تانى أحسن يشوفك.

أنا: والله ما بقلده يمكن عقلى الباطن؟ أنا بصراحة استويت، عايزين ننجز بقى واحدة توزع الوجبات والتانية المياه والمشروبات.

بعد توزيع الوجبات بشوية صوت المايك يعلى كعادته في الصعود والهبوط وعند اللزوم "Cabin Crew ..Take your seats" على طقم الضيافة الالتزام بأماكنهم، كان كرسى المضيفة المغربية جنبي..

أنا: أنا أول مرة أروح بكين، أكيد روحتها قبل كده؟

المضيفة المغربية: زهقت من كل البلاد.

أنا: أنا فاكرة كلام الست السنيورة لما قالت لنا "ها.. متحمسين؟" قلنا لها يومها بعلو صوتنا "YESSSS" قالت بمنتهى الثقة "أشوفكم بعد سنة وانتوا أقصى أمنياكم تشوفوا السرير وتاخدوه بالحضن لمدة 6 ساعات متواصلة مرة كل أسبوع!!"

المضيفة المغربية: حقيقة أختي، أول ما بنتعود على الشئ مهما كان جميل بنفقد الإحساس بحلاوته ونمله!

أنا: طيب بما انى أول مرة بالصين، هاخرج وبالمرة أشتري حاجات، ما تيجي معايا؟

المضيفة المغربية: سامحيني نفسى أنام، خلى بالك بكين أعلى من شنغهاى، ماتشترش كثير وفاصلى زى أي بلد، بس بيشوفوا انك أجنبية بيرفعوا السعر أضعاف.

سواق الميكروباص بتاعنا الصغرن جداً والمؤدب جداً كان بيساعدنا كلنا لوحده في شيل الشنط للميكروباص والنزول منه الى الفندق بمنتهى الأدب والشياكة والنضافة. طلعت أوضتى في الفندق ال 7 نجوم الفخم جداً، من كتر الفخامة مقدرتش أستعمله...

أنا: مساء الخير.. ممكن كارت للفندق؟

موظف الاستقبال: اتفضلى يا فندم.

طلعت بره الفندق، مشكلة الصينين انهم بيتكلموا صيني بس، لعبتهم كل الألعاب مفيش فايدة ماحدش فاهم حاجة، كله بيتسم ويلبسك في واحد تاني شبيه مش فاهم وبعدين يقعدوا يتكلموا مع بعض وأنا مش فاهمة والآخر يشاورولك انهم مش فاهمينك ويتسموا تاني بأدب ويمشوا! طيب أنا عاوزة أروح أي مول تجارى؟ استنيت أي أتوبيس أو تاكسى مفيش! يظهر أنى واقفة في المكان الغلط، أول ميكروباص ماشى شاورت له "Auto Stop" (وأنا مش خايقة على فكرة!) وقف الميكروباص، بصيت عليهم كلمهم بنظرة شاملة فاحصة زى المخبرين، كله رجاله؟ وايه يعني، الراجل اللى جنبى ابتسم قوى وشاورلى بإيده على طول! قال أنا كده بقى فهمت هو رايح فين؟

صوتي العميق: يا نهار شبه بعضه، وانى هتقضيها إشارات وابتسامات ولا وايه؟ مش هتستخدمى لسانك خالص؟

شاورت للراجل إشارات متخلفة ومثلت له كأنى داخله محل وعجبنى حاجة فسألت عليها واشتريتها! الغريبة ان الراجل فهم! وقعد يتكلم مع

السواق كثير وكل الميكروباص اشترك في الحديث الا أنا، وأخيرا الراجل رفع لى اصبع الاتهام انه كل شيء تمام.

صوتي العميق: يكونش دول عصابة؟ وهيخطفوكي ويطلبوا فدية؟ بس يطلبوها من مين؟ الطريق شكله طريق سفر، ده مفيش قطة عدت!  
أنا: قطة ايه يا متخلف؟

الراجل اللي جنبى كل ما أبصله بيتسم قوى لدرجة مابقتش شايفه فيها عينه خالص، كل شوية يشاورلى بصباعه ان كل شيء تمام! مشكلتى مع العينين الضيقة انى مش باعرف أقرا اللى قدامى مبسوط ولا مضايق؟ كداب ولا صادق؟ أنا أصلا مش شايفة عينه نفسها؟  
وأخيرا وقف الميكروباص في وسط حته غريبة..

صوتي العميق: دلوقتى يقولوك طلعى كل اللى معاكى من سكات وانزلى هنا، واحمدي ربنا اننا مش هانعمل فيكى حاجة!  
أنا: ايه وقفتموا ليه؟ صلوا على النبى، دنا بنت ناس والله، اهئ اهئ..

الراجل اللي جنبى ابتسم وشاورلى الناحية الثانية..  
أنا: الحمد لله.. مركز تجارى، ربنا يخليك.. ربنا يكرمك.. ربنا يسعدك..

الراجل بصلى بذهول وفتح باب الميكروباص وشاور لى أنزل، مديت ايدي في جيبي وطلعت فلوس، الراجل اللي جنبى مسك ايدي وشاور لى انه لأ!

الراجل الصيئى: No No No



نزلت من المركز التجارى شايلة حاجات كتير ملهاش لازمة، ايه اللى خلانى  
أتهبل في نافوخي وأعمل كده في نفسى ده الفندق بعيد وبعدين لا فاصلت  
ولا حاجة! فجأة لقيت البياع بتاع المحل بيشاور عليا لواحد والواحد ده  
بيجرى ناحيتي، الصراحة أنا خفت وجريت! واحدة بتجرى وشايلة حاجات  
وصاحب محل بيجرى وراها، تبقى الواحدة دي ايبيببيبيبييه؟

وبعدين استوعبت الموقف، هو أنا باجرى ليه؟ وقفت، الراجل بيقترب  
منى ولما وصلنى وقف وابتسم وادانى شنطة ايدي اللى كان ماسكها.

أنا: يا لهوى.. هو أنا نسيت شنطتى اللى فيها الباسبور ورخص الطيران؟!

الراجل الشهم: هزراسه وابتسم وشاور باى ومشى.

أنا: روح يا شيخ الهى ينور طريقك دنا كنت هاتنفخ نفخة كبيرة قوى  
والله.

تاني يوم في الفندق.. "ترن ترن ترن"

أنا: أيوة؟

موظف الاستقبال: في واحد هنا عايزك ضرورى، بيقول انه من طرف  
البياع اللى في المركز التجارى.

صوتي العميق: أكيد من المركز التجارى اللى رحته ماهو الراجل العجوز  
ده شاف العنوان في الكارت، بس عاوز ايه تاني؟ يمكن الفلوس اللى  
ادبتهاه ماقضيتش وعاوز الباقي.

نزلت الاستقبال لقيته فعلاً البياع الى كان بيجرى ورايا واقف مع موظف الاستقبال بيتكلموا، أول ماشافنى وقف وابتسملى بأدب.

أنا: أهلا ازيك.. الفلوس العربية مكفيتش؟ للأسف لو كده أنا معايا كل الحاجة فوق ممكن تاخذ منهم الى انت عاوزه ونخصم المبلغ.

موظف الاستقبال: هو بيقول ان العملة العربية دي تعبتم عشان يغيروها بس لما غيروها طلع ان فى باقى لحضرتك وهو جايبهولك من عند البياع الى اشترى من عنده، بس هيخصم منهم حق مواصلاته.

أنا: باقى!

موظف الاستقبال: حوالي 40 دولار.

أنا: وجه كل المشوار ده عشان يدينى الباقي بعد ماتعبتم العملة عشان يغيروها؟ قول له انى مش عاوزه المبلغ وياريت يقبله منى هدية.

اتكلموا مع بعض شوية..

موظف الاستقبال: هو بيقول انه مش محتاج لكن المركز التجارى الى بيشتغل فيه محتاج وهما عاملين صندوق تبرعات لتجديد المحلات والمركز، فهو هايحطه فى صندوق التبرعات ده.

أنا: أشكره لو سمحت كثير وقول له انى مقدرة تعبته وأمانته، بس معلش هو عرف اسمى ازاي؟

موظف الاستقبال: هو مايعرفش اسمك، هو قال لى انك بتشتغلى  
مضيضة وقالى اسم الشركة ووصفك فأنا عرفتك على طول عشان  
حضرتك أقصر واحدة في طقم الضيافة... ها ها ها

صوتي العميق: لا والنبي حوش الطول اللى مغرق البلد يا حلو انت منك  
ليه! باقى... بس حلو موضوع الباقي ده والله.

## على هامش الضيافة الجوية

في أغلب المواقف الى فاتت يمكن تقول ان حياة المضيفة واصلة لحالة من الرفاهية المستعصية والتي لا يمكن أن تقابلها أي عرض من أعراض النفسنة والاكنتاب، أو ممكن تشوف من بين السطور حاجات إنسانية كثيرة تخليك تعيد حساباتك كلها او على الأقل جزء منها.

في يوم من الأيام كنت راجعة من الهند حرانة وتعبانة ومرهقة، البوليس موجود، الضابط وقف أتوبس الشركة بره المدينة السكنية اللي قبلنا أو بمعنى أصح اللي جنبنا وأخذ أسمائنا وبياناتنا وجاين منين وقالنا اتفضلوا انزلوا هنا مفيش عربيات هتدخل ولا تطلع من المدينة السكنية الا باذن لحد ما نسمح لها، ناس معرفهاش شكلها مهم من الشركة، عربية اسعاف وبوليس وبنات أعرفهم ومعرفهمش واقفين بيعيطوا! كانت "هيبى يونج" بتعيط بشكل هستيرى... وبنات كتير بيضطبطبوا عليها.. البنات في العمارات كانوا واقفين بيتفرجوا على وشهم صدمة وكلهم حاطين ايدهم على وشهم أو بقهم! كده في مصيبة، قريت أكثر، شفت دايرة أو كوردون! ده مسرح جريمة!!

ضابط: لو سمحتى باسبورك.

أنا: اتفضل..

الضابط: تعرفى البنات الميتة؟

أنا: ميتة!

الضابط: اتفضلى معايا شوفها...

قربت من مسرح الجريمة لقيت ذراع مفرودة على الأرض ودم كثير..  
شعرها مغطى وشها ودم أكثر..باقي البنت في مشهد لا ينسى.. جسد بلا  
روح .. دم أكثر مغطيا ومغطى الأرض.. واحساس بالبرودة رهيب.

الضابط: تعرفها؟

أنا: أول مرة أشوفها أنا مش ساكنة في عمارتها ولا كانت معايا في نفس  
دفعة التخرج..

الضابط: اتفضلى الباسبور وممنوع الوقوف هنا.. من فضلكم يا بنات  
عشان نقدر نشوف شغلنا.

أنا: هو ايه اللى حصل؟

بنت معرفهاش: بيقلوا انتحرت بس البوليس لازم يتأكد ان مفيش شمه  
جنائية.

أنا: انتحرت!

البنت: البنات قالت ان كان عندها اكتاب.

أنا: انتى تعرفها؟

البنت: لأ.. بس زميلتها في السكن بتقول ان بقالها فترة مكتنبة.

أنا: هي كورية؟

البننت: أيوة.

كنت مصدومة بشكل غريب لأول مرة في حياتي أشوف حد ميت بالطريقة دي أو ممكن تكون مقتولة! تماسكت وشديت الشنط وحاولت أسيطر على رجلى ودخلت العمارة، طلعت الدور الثاني لكن بدل ما أفتح شقتنا خبطت على "يونج" اللى جنبنا، فتحت الباب "بو يونج" وكان آثار العياط على عيها..

أنا: انتى تعرفى البننت اللى ماتت؟

بو: أيوة.. مش أصدقاء بس أعرفها.

أنا: هي فعلاً انتحرت؟

بو: بيقولوا كده.

أنا: تفكرى حد قتلها؟

بو: معرفش.. "هيى" المفروض تيجى دلوقتى اسألها.

أنا: أنا هادخل أغير ولما تيجى "هيى" هسألها.

كنت بتصرف وقتها زى الروبوت، مجرد حركات بأديها لكن منظر البننت كان مسيطر على كل تفكيرى، بعد شوية سمعت صوت عياط وبنات على السلم، فتحت الباب كانت "هيى" وفي بنات معاها بيواسوها.

أنا: "هيى" أنا أسفة عشان صاحبتك.. هي كانت صاحبتك قوى؟

هيبي: أعرفها كويس من كوريا وأعرف اخواتها.

أنا: ممممم

هيبي: أنا داخلة ... "بو" لوحدها..

أنا: "بو" خرجت.. أنا أصلى كنت مستنياكى بصراحة، عاوزة أعرف قصة البننت دي ايه.

هيبي: طيب أنا هاخد دوش واجيلك.. اعملى لى أي أعشاب تهدينى.

أنا: حاضر هستناكى..

بعد ربع ساعة الباب خبطت هيبي وفتحت من بره كالعادة...

أنا: "هيبي" تعالى.. عملتلك ينسون عشان تهدي.

هيبي: شكرًا.

بعد فترة صمت...

هيبي: ياسمين... البننت أثرت فيا جدًا.. أنا عيطت ساعتين متواصلين.

أنا: هو ايه اللى حصلها؟

هيبي: أنا بفكر جديا أستقيل.. اوعى تقولى لحد من البنات.

أنا: متخافيش.. بس تستقيلى ليه؟

هيبي: الشغلانة دي عايزة ناس عندها إمكانيات غيرى.

أنا: مش فاهمة حاجة.. انتى عديتى كل الامتحانات وشغالة كويس. ثم ايه علاقة الاستقالة بالبنت؟

هيى: الاكتئاب يا بنتى.. انتى مش عارفة ان معظم المضيفات عندهم اكتئاب ... Homesickness (الحنين للأسرة)

أنا: هيى. إحنا كلنا عندنا ده.

هيى: عندك ده بس فى حاجات تانية بتعوضك، المشكلة لو كل حاجة فى حياتك باظت، انتى عارفة البنت دي كانت مخطوبة وكانت بتحوش وكانت بتساعد أهلها وخطيبها كمان. فى واحدة صاحبته كانت فى كوريا أجازة ولما رجعت قالتها ان حبيبها ده اتجوز واحدة تانية خلاص وانه بياخد فلوسها وبيستغلها وبس، هي اتأكدت ولقت الكلام صح، حتى انها واجهته، غير ان أهلها كمان مبقوش عايزنها ترجع وهى كانت حاسة بده، هي بالنسبة لهم بقت مورد أساسى للفلوس وبس، كفاية تيجى كل فترة يومين.. هيستفيدوا ايه لو قاعدة معاهم ومفيش فلوس؟ هي عيشتهم فى مستوى أعلى مش هينفع يستغنوا عنه خلاص، وانتى عارفة ان هنا ظروف الشغل صعبة ازاي ومفيش أصحاب، حتى البنات اللى معاكى فى الشقة بتشوقهم وانتى راجعة أو رايحة رحلة ونادرا لو اخدتم أجازة مع بعض، ازاي هنعرف حد نتجوزه؟ ازاي قولى؟ ازاي هتخلفى وانتى ممنوعة من الخلفة طول ما انتى طيارة؟ هتعملنا ايه الفلوس لما عمرك يضيع؟ أنا بشوف بنات بتشتغل فى الأربعينات يا ياسمين! صحيح اترقوا مديرين وصحيح مش باين عليهم سنهم لكن لسه معندهم مش حياة.. هتفيدهم بايه الفلوس؟ دول حتى مش عارفين يتمتعوا بحياتهم، أسأل واحد منهم كده

كانت ايه خطتك من الأول هتقولك سنتين تلاتة بس، بس الحقيقة ان السنين بتجرى والعمر معاها والفلوس بتغرى وبتخلى الناس في بلدك تحترمك للأسف، الفلوس بتغير شكلك عند الناس وبتدي قوة وثقة في النفس وهو ده اللى بيخلى البنات متفكرش ترجع، الناس بتطمع في الأكثر بس شوفي ايه اللى حصل "سو" مقدرتش تستحمل وانتحرت.

أنا: فاكرة أول ما جينا وبدأنا ناخذ على بعض يا هيبى؟ أغلب البنات جاية عشان ظروفهم في بلادهم وحشه أو عشان تحسن مستواها، أنا فاكرة شيناز كانت عايزة تجيب لأهلها بيت عشان بيتهم صفيح مش بيحمهم من المطر، تسيجيه اللى باباها طفش وساهم.

هيبى: عارفة.. وكاليانى عندها مأساة وهى اللى بتصرف على عيلتها، في كثير كده وفي ظروفهم كويسة وأنا ظروفى كويسة ومش محتاجة حاجة يبقى ليه أحرم نفسى من حاجة عايزاها؟ عارفة يا ياسمين أنا قرانى انى آجى هنا كان غلط، والبنات اللى انتحرت دي خلتنى أعيد حساباتى.

أنا: يعني انتحرت محدش قتلها؟

هيبى: معتقدش حد يعمل فيها كده لان كل البنات بتحمها، كانت أخلاقها كويسة وكريمة وطيبة جداً مع كل البنات.

أنا: وانتى بجد ناوية تستقبلى؟

هيبى: بفكر بجد.. أنا بحب وعاويزة أتجوز وأخلف.

أنا: مش هتستنى حتى شوية؟

هبي: لو استنيت هخسره عشان البعد، هو في كوريا وأنا هنا.. مش هينفع، وكمان لو استنيت ممكن أفضل الفلوس عليه ومع الوقت هفضل أعيش لوحدي أو هكون اتعودت على كده وأنا مش عاوزه أكتئب ولا أموت لوحدي.

أنا: أووووف... انتي سرحتي جامد كده خليك متفائلة شوية واعملى اللى انتي شايفاه في مصلحتك.

هبي: شكراً على الأعشاب وعلى الكلام، أنا لما اتكلمت بقيت أحسن، أعتقد انى طلعت اللى جوايا معاكى.

أنا: أي وقت محتاجة تتكلمى تعالى على طول.

هبي: المشكلة ممكن تكونى طيارة أو أنا طيارة!

أنا: ممممم

هبي (بضحك): شفتى بقى.

أنا: لو كنت عايشة على الأرض في أي مكان أوعدك هتلاقينى.

هبي: باى حبيبتي.

أنا: باى 😊

## إلى الصومال

"شرق أفريقيا.. تحيطها جيبوتي وكينيا وأثيوبيا"

في آخر دقائق من الاجتماع الذى يسبق الصعود على متن الطائرة ...

الطيار المصرى: خلوا بالكوا.. 3 مرضى، واحدة مترحلة، وفي نعش واحد، كده الأماكن اتوزعت وعرفنا كل حاجة عن الرحلة.. حد عنده سؤال؟  
الأصوات: لأ.. شكرًا.

الطيار المصرى: بقولك ايه؟

أنا: أنا؟

الطيار المصرى: أيوة انتى.. تبع توزيع أدواركم عرفتى انك عندك واحدة  
Deported (مترحلة).. صح؟  
صوتي العميق: اهئ اهئ اهئ..

أنا: أيوة عرفت.

الطيار المصرى: ومالك وطيتى راسك لتحت كده؟ لأ باقولك ايه.. دي ست  
قتالة قتلة ومرحليها.. لازم تشوفك قوية كده ورافعة راسك فوق.

أنا: انت مصري..

الطيار المصري: مش وقت قلش ، لو ماكنتيش مصرية مكنتش هاقولك الكلام ده.

أنا: ربنا يعمر بيتك..

الطيار المصري: يا ستى ركزى.. انتى شعلقيها حواجبك فوق وازغريلها وكمان.. احم... ما تخافيش من حجمها.

أنا: آه يا حوستى السوداء يا انا ياما، هو كمان فيها فرق أحجام؟ مش بتقول صومالية؟ أخبار المجاعة ايه هناك ولا ماوصلتلهاش؟

الطيار المصري: مش شرط.. دي كانت عايشة في أمريكا وبعدين جت على هنا.

أنا: خليط أمريكا وبلد عربي؟ يعني كمال أجسام؟

الطيار المصري: اسم الله عليكى، أنا شفت ورقها وصورتها، ماخبيش عليكى أنا شخصيا خفتلك منها وهى فى الصورة.

أنا: هي قتالة قتلة بجد؟

الطيار المصري: قتلت صاحبته!

أنا: يا لهوى..

الطيار المصري: وطى صوتك، طقم الضيافة هيكتشفوا العنصرية اللى بنمارسها دلوقتى، أنا حبيت أنيهك عشان ما تتخضيش وتعملى حسابك.

أنا: طيب ما تخلوا الكلابشات فى ادبها الله يخليك؟

الطيار المصري: مينفعش ما انتى عارفة، بنشيل الكلابشات على باب الطائرة وهى داخلة وبتلبسهم وهى خارجة، جوه الطائرة هي حرة طليقة.

أنا: انا لله وانا اليه راجعون، بص أنا رقمى الوظيفى 1234567890.. أمانة عليك تبقى تسأل على أهلى..

الطيار المصري: هاهاها.. ياللا روحى ركزى وسببىنى أشوف شغلى..

أنا: الله يكرمك ويكرمى.. قول آمين.. اهئ اهئ اهئ.

طلعنا الطائرة وخلصنا كل اللى بيخلص زى أى رحلة عادية جدًّا وبدأنا نستعد عشان نستقبل المسافرين، والمترجلين والأموات والمرضى..

صوتي العميق: مالك مدهولة كده ليه.. محدش عارف هيموت امتى ويمكن يجيبوكى فى نعش من بلد تانية؟ أو يمكن يحصلك ظروف مش ولا بد ويرحلوكى على بلدك أو ممكن..

أنا: كفاية كده وحياة والدك.

الست المديرة الجزائرية: هنتفتح الأبواب بعد 5 دقائق.. جهزتوا؟

المضيفة الأردنية: كله جاهز.

بدأ خيالى المريض يتخيل شكل الست، سمرة؟ أكيد سمرة يعني ايه النباهة دي، طويلة؟ طبعًا.. الكابتن قالى ضخمة، يا لهوى، الست سوبر.

صوتي العميق: كفاية تخيلات، الباب قرب يتفتح وكده كده هاتشوفها هاتروحي منها فين يعني؟ وبعدين المترجلين والمرضى يببقوا أول ناس

يطلعوا الطائرة وآخر ناس ينزلوا منها... بس ايه الرحلة السقع دي؟  
مرضى واموات ومجرمين.. ماحرموكيش من حاجة.. هي هي هي

أنا: بس بقى يا حقنة مش ناقصاك... اهئ اهئ اهئ

وفجأة اتفتح الباب ودقائق قصيرة ولقيت المارد واقف، قصدي المسافرة  
المترحلة الضخمة واقفة على الباب ومعها واحد من الشرطة بيحك  
الكلابشات، الست المديرية بتستلمها والمسافرة بتبصلها هاتكلها أكل  
ونادت عليا..

الست المديرية: فين المضيفة المسئولة عن المسافرة المترحلة...

أنا: يا لهوى.. مش أنا.. مش أنا .. احم...أنا.. اهئ اهئ

الست المديرية (بزغرة): استلمى.. (وجزت على سنانها) وخلي بالك كويس.

أنا: أه ونعم بالله.. ان شاء الله ربنا كريم.

المسافرة المترحلة الكبارة شغالة زغر.. وراحت نقلت رقبته ناحيتي وبصالى  
بصة عميقة من فوق طبعاً لأن أنا موقعى تحت خالص وقالتى..

المسافرة المترحلة: فين الكرسى بتاعى؟

أنا: اتفضلى حضرتك.. اتفضلى.. يعنى ممكن تختارى أي مكان يعجبك..  
كلنا هنا تحت أمرك؟

المسافرة المترحلة: انتى هاتهرى معايا ولا ايه؟

أنا: أنا أطول أهزر معاكى..



أخذت الكوباية من ايدي ورميتها ومسكت في رقبتي وأنا بكح ومبرقة!!!  
المسافرة المترحلة: هو أنا كل يوم أموتلى واحدة بقى ولا ايه.. جاتكم  
القرف... عالم أغبية..

أنا: أبوس ايدك.. أبوس ايدك... اهئ اهئ اهئ...!!!

الست المديرية: ايه اللى انتى بتعمله ده؟

أنا (كح كح): معلش والنبي يا ست المديرية أصلى تخيلت حاجات كده مش  
ولابد يعني...

الست المديرية: طيب فوقى شوية.. المسافرين طالعين اهو..

أنا: حاضر..

فتحنا أبواب الطائرة.. واستقبلنا المرضى.. النعش أكيد مالناش دعوة بيه  
والحمد لله... فاضل المسافرة المترحلة... اهئ اهئ..

تك تك تك ..

صوتي العميق: أكيد هي اللى طالعة دي، ماعطلكيش أنا بقى.. بالشفأ يا  
قطة..

أنا: الواطى هايفضل واطى...

وفجأة اتفتح الباب ودقائق قصيرة وشففت المارد قصدي المسافرة المترحلة  
واقفة على الباب ومعها واحد من الشرطة بيفك الكلابشات، الست  
المديرية بتستلمها والمسافرة بتبصلها هاتكلها أكل ونادت عليها..

الست المديرية: فين المضيفة المسئولة عن المسافرة المترحلة...

أنا: نعم.

الست المديرية (بزغرة): استلمى.. (وجزت على سنانها) وخلي بالك كويس.

استلمت أمانة الزغرة والجزة وزغرت وجزيت بدورى للمسافرة المترحلة  
لعلها ترتجع.. وتفوق لروحها.. ده إحنا مصريين وحلوين قوى ..

أنا (بحسم): تعالى معايا لو سمحتى من هنا.

المسافرة المترحلة حواجبها مترحلة هي كمان لفوق خالص مالص وشغالة  
زغروجز!! وماشية بتاني وبمنتهى الثقة كمان وايد ورا وايد قدام.. ايد ورا  
وايد قدام!! برود أعصاب وثقة في النفس!

أنا: ده الكرسي بتاعك... اتفضلى..

صوتي العميق: يا واد يا جامد بالقوى.

أنا: انت جيت يا جبان؟ ياللا روح من هنا ورايا شغل.

بصت لى من غير أى اهتمام واضح وقعدت بمنتهى البرود وبصت من  
الشباك، مشيت أنا كمان بمنتهى الثقة الى ممكن تتخيلوها، بس أول ما  
عديت صف الكراسى بتاعها بصيت عليها وجريت زى العيال للست  
المديرية الى كانت لسه واقفة على الباب بتستقبل المسافرين...

أنا: والنبي يا ست المديرية خلى حد معايا...

الست المديرية: بتنهجي كده ليه؟ وبعدين سايبه المسافرة المترحلة لوحدها؟  
عينك عليها طول الرحلة.. اتفضلى روحى ياللا..

أنا: شكلها مخيف والنبى حد ييجى معايا، لما بتبصلى باقى هعملها على روى..

الست المديرية زغرتلى زغرة شبيهة بزغرة المسافرة المترحلة!

أنا: طيب.. أنا راجعة عشان أخلى بالى من المسافرة المترحلة.. أنا بقيت ملطشة؟

الست المديرية (بابتسامه صفرا): برافو عليكى.. عايزة لما أرمش بعينى ماشوفكيش قدامى.

لميت بعضى وجريت تاني عند المسافرة المترحلة. دب دب دب وأول ما قربت لصف الكراسى بتاعها مشيت بمنتهى الثقة، الحقيقة لما رجعت لقيت كل الصفوف اللى أنا مسؤولة عنها أو بلغة الطيران ال Zone بتاعتى مليانة مسافرين، قاعدين ومبتسمين وهادين والحمد لله، لكن للأسف الكرسى اللى جنب المسافرة المترحلة فضل فاضى!

الأبواب اتقفلت وكالعادة قعدنا نعمل شوية الحركات بتوعنا فى الكابينة عن إجراءات الأمن والسلامة، بنشرح للمسافرين الكارت اللى مليون صور قدامهم لو الطائرة وقعت فى المياه يعملوا ايه؟ قال فيه "جاكت نجاهة" قال! ولو وقعت على الأرض؟ طب والنبى لو رشقت فى جبل زى ما كان ممكن يحصلنا فى نيبال كده أو لا قدر الله حصل عطل فى مفاحى، كنا هانعمل ايه؟ كله هتس فى هتس.. ياللا ما علينا.

صوتي العميق: على فكرة...

أنا: زعبلة القلة رجع تاني؟ عاوز ايه منى؟ مش خلعت وقت الجدد؟

صوتي العميق: يا ستي استنى عليا بس دنا بوعيكي، أصل بصراحة  
باشوفك ساعات بتستغبي شوية، دلوقتي انتي خايفة من ايه؟ الأبواب  
واتقفلت خلاص، الست مش هاتهرب، لكن واضح ان السينما الأمريكاني  
أثرت على المخيخ عندك يا مسكينة!

أنا: تصدق أول مرة من زمان تقول كلام معقول، عندك حق هايحصل  
ايه يعني؟ وبعدين حتى لو حاولت تموتني الطيارة مليانة ناس تحوشها...  
آه هيحوشوها.. تفتكر هايحوشوها؟

صوتي العميق: مش باقولك مسكينة! روحى شوفي شغلك يمكن تفلحى.

أنا: لو سمحت ممكن الكرسي لقدام؟ أربط الحزام من فضلك.. شكرًا.

لحد ما جيت عندها.... اللهم احفظنا..

أنا: احم.. لو سمحتى.. ممكن تربطى الحزام؟

الست المترحلة: زغرة مرعبة مع سابق الإصرار والترصد.

صوى العميق: مش مهم تربطه مش هاتطير.. وماتبصيش في عنيا كتير  
عشان متخافيش منها يا عبيطة..

أنا: الله يكرمك..

الست المترحلة: نعم؟

أنا (بحزم): الحزام لو سمحتى؟

تخيلوا بقى حصل ايه؟ المسافرة المترحلة سمعت كلامى وربطت الحزام...  
يا حلوى.. شغلونى في البوليس يا جدعان.

صوتي العميق: بوليس كمان؟ هي كده هربت منك خلاص.

المضيفة الأثيوبية: ياللا يا شباب ... الوجبات جاهزة.. عاوزين بسرعة  
بسرعة نجهز..

كان توزيع الوجبات سريع، الست المترحلة أخذت الأكل لكن ماكلتش،  
شربت قهوة بس وهى بتتفرج على الدنيا من الشباك وعلامات حزن على  
وشها وزى ما يكون كده والله أعلم مية نزلت من عينيها.. دموع؟!

الست المديرة (لست المترحلة): انتى كويسة؟

المسافرة المترحلة: أه كويسة..

الست المديرة: مالك؟

المسافرة المترحلة: اهئ اهئ اهئ..

المضيفة الأسبانية: الحقوا دي المسافرة المترحلة بتعيط!

أنا: بتعيط؟!

المضيفة الأثيوبية: أكيد ضميرها بيفوق أو ممكن خايفة على نفسها.

أنا: بتعيط زى ماحنا بنعيط كده؟

المضيفة الروسية: ضميرها ايه انتى كمان.. دي لازم تمثيلية، أنا هاروح  
أبلغهم قدام وانتوهنا استعدوا لأى حركة مفاجأة من الست دي.

أنا (للمضيفة الأثيوبية): مش عارفة ليه أنا مصدقة استنتاجك انتى! رغم  
ان شكلها مربع؟

المضيقة الأثيوبية: فى أشكال بريئة والشيطان ساكنها. اوعى تحكى بالشكل على حد.. هتخسرى كثير.

أنا: عندك حق... بس بتعيط دموع وكده يعنى زينا؟

الست المديرة طلعت من جيها منديل واديته للمسافرة المترحلة وطبقت عليها ومشيت!

صوتي العميق: أراك قد تأثرتى أيتها الحمقاء؟

أنا: وانت مالك انت.. أنا قررت أتعاطف معاها!

أنا (للمسافرة المترحلة): بقيتى أحسن؟

المسافرة المترحلة: الحمد لله.

أنا: الحمد لله؟! ماكلتيش وجبتك، تحى اجيبك قهوة تانى؟

كانت دي أول وآخر مرة أشوف البصة دي فى عين حد! مش هعرف أوصفها عشان يمكن أقلل كثير من قيمتها، كانت عنما بتقول شكرًا بعمق، نظرة حد ما تعاملش بانسانية بقاله كثير فندسى انه بنى آدم.

المسافرة المترحلة: متشكرة.

أنا: قبل الهبوط هاخذ الأكل فأحسنلك كلي اللى تقدرى عليه.

صوتي العميق: يا حنينة؟

أنا: هو أنا ممكن أسألك سؤال شخصى؟

المسافرة المترحلة: قتلت أعز أصحابي عن عمد! حكيت لزميلتك، كنت قاعدة في أمريكا سنة عند قرابىي على امل أجيب جوزى والولاد وكنت باشتغل وبابعتلهم فلوس، وقتها هو كان في الصومال وكنت بوصى صاحبتى تزورهم وتشوف طلباتهم.

أنا: وبعدين؟

المسافرة المترحلة: جاله شغل في البلد العربي.. قلت ملهاش لازمة أنا في بلد وهو في بلد، سبت أمريكا وكل فلوسى اللى حوشتها ونزلت عليه وشوية ولقيت شغل، لكنه اتغير معايا وكنت بحس انه عايش معايا بس عشان الولاد.

المضيفة الأثيوبية: لو الست المديرية شافتك وانتى بتتسايرى كده مع المسافرة المترحلة هاترحلك معاها؟

أنا: ما هي كمان كانت بتتسايراشمعنى انا؟

المضيفة الأثيوبية: هي مديرتك.. انجزى عشان محدش يفتن.

المسافرة المترحلة: لما رحنا زيارة لأهلنا آخر مرة شفتهم بعينى مع بعض، عارفة يعني ايه تشوفي الرجل اللى حبتيه واتجوزتيه بيخونك مع صاحبتك؟ مصدقتش اللى قرابىي قالوه عليهم لما كنت مسافرة، لما واجهته قالى انه خلاص مبقاش يحبني وانه هيطلقني وياخد الولاد مني، واجهتها ما انكرتش، وقالتي انهم بيحبوا بعض من قبل ما أتجوزه وانه هيرجعنى الصومال وياخدها مكانى في البلد العربي! ضربتها علقة سخنة وخبطتها على راسها بجديدة ماتت، كان بالصدفة ميعاد سفرى أنا والأولاد بعدها بساعتين فسافرت على البلد العربي، لكن هو كان ميعاد

سفره بعدنا ب 3 أيام.. طبعًا عشان يقعد معاها براحته بعد ما نساfer،  
لما مالحقهاش وماتت في المستشفى راح للشرطة وحكالهم قصتنا، سهل  
عليهم كتير وجابوني طبعًا بعد ما طابقوا البصمات.. لكن أنا مش  
هاسيبه ومفيش حد هاياخد منى ولادي.

الست المديرية: واقفة عندك بتعملى ايه؟

أنا: ال..

الست المديرية: روى شوفي شغلك بسرعة قربنا نعمل Landing ..

أنا: حاضر.

صوتي العميق: تخيلي ان المضيفة الأثيوبية كان عندها حق! الشكل مش  
مقياس.. الست صحيح قتلت وبقى جواها غل وجروح لكن هي أصلا مش  
كده.. تصرفنا في مواقف مؤثرة ممكن يهد حياتنا أو بينها...

كان الهبوط سلس الى أقصى درجة أو يمكن كنت شاردة بفكر في الدنيا،  
كانت هي مسئوليتى وكان هو ده الجزء الأصعب.. انها ماتهرش أثناء نزول  
المسافرين من الطائرة في الزحمة، مش يمكن حكيتلى حكاية مزيفة  
عشان تكسب تعاطف وتقلسع هي وأطير فيها أنا، لكنها كانت عكس  
التوقعات للمرة الثانية على التوالي وماتحركتش من مكانها ولا حتى بصت  
لأى حد، لما جت الشرطة بصت لى بعمق شديد وقالت لى "اوعى تثقى في  
أى حد في العالم!" وسابتنى ومشيت ☹️.

## إلى برلين

"عاصمة ألمانيا - وسط أوروبا"

في غرفة من غرف الاجتماعات في المطار قبل الرحلة..

أنا: صباح الخير.

الطيار: صباح النور انتى ال Stand By؟

أنا: أيوة أنا.

الطيار: ليه متأخرة؟

أنا: كلمونى متأخر.

الطيار: طيب هعيد اللى قولته باختصار علشان لازم نطلع على الطائرة على طول، لو في سؤال بعد كده عندك الست المديرية.

أنا: تمام.

الطيار:..... وفى أربع مسافرين Stretchers و..... (Stretchers يعني مرضى نايمين مش قاعدين، المريض بيتحجزله 6 كراسى لوحده علشان بيتفردوا ببقوا زى السرير والسرير ده بيتحوط بستارة وغالبًا بتكون حالات حرجة وبيكون معاهم الدكتور المعالج).

أول ماسمعت Stretchers... الدنيا اسودت في عنيا، هو أنا كل ما أطلع رحلة لازم يبقى فيها حاجة صعبة؟ مفيش مرة تفك ☹️

بعد توزيع أدوار المضيفات على الطيارة...

صوتي العميق: احمدي ربنا ان الأربعة جنب بعض ومش في ال Zone بتاعتك.

أنا: الحمد لله فعلاً .

المضيفة السيشلية (من جزر سيشل): مش معقول زميلتنا النمساوية بتعيط!

أنا: على ايه؟

المضيفة السيشلية: على ال Stretchers !

أنا: عادي دي مشاعر.

المضيفة السيشلية: مشاعر ايه يا ستي هو ده وقته؟

أنا: عندك حق بس يعني في الآخر إحنا بنى آدمين برضه.

المضيفة السيشلية: وجهات نظر.

المضيفة النمساوية: انتى مكانك النهاردة صعب على فكرة.. ال Galley (المطبخ) بتكون مهمته صعبة لو موجود حالات زى دي مسافرين عشان طلبات الدكاترة بتبقى كتير.. ربنا معاكى.

أنا: ربنا يستر.. أنا جهزت حاجات كتير وهسخن الوجبات ببقى فاضل تحضير عربيات الوجبات بعد الإقلاع على طول ان شاء الله.

المضيفة النمساوية: كده تمام قوى.

أنا: هو ازاي أربعة Stretchers مرة واحدة؟ حادثة دي؟

المضيفة النمساوية: أه حادثة واللى عرفته انهم أربع بنات اخوات أكبرهم 34 سنة وأصغرهم 18 سنة وأحسن حالة فيهم بتعرف ترمش بعينها! كلهم في غيبوبة كاملة وحالتهم خطيرة. أهلهم مسافرينهم برلين يتعالجوا.

صوتي العميق: عارفة لو كنتي في مصر دلوقتى.. كان طلعلك واحد ساب كل ده وقالك... آآه طالما أهلهم مسافرينهم يتعالجوا في برلين؟ يبقى معاهم فلوس.. وطالما الفلوس حاضرة بكرة يخفوا..

أنا: يا أخى مش للدرجة دي؟ على فكرة كل الجنسيات في العالم لهم ما لهم وعليهم ما عليهم.. إحنا في الآخر بشر متنساش دي.

صوتي العميق: ايه انتى نسيتى ولا أفكرك.. ده مفيش أكثر من المواقف دي، وفي حاجات حصلتلك أنتى شخصيا.. لو كنتى ناسية أفكرك؟ طب فاكره لما..

أنا: لا شكرًا.. الله يهديك مش وقته.

المضيفة النمساوية: بتقولى حاجة؟

أنا: لا أبدًا.. الله يكون في عون أهلهم، ولادهم كلهم مرة واحدة كده.

المضيفة النمساوية: أنا عيظت لما شفت أبوهم وأمهم.. شكلهم صعب جدًّا ويقولوا ان فرص نجاتهم قليلة.



الست المديرية (الكورية): ايه ده مالها؟

أنا: كان عندي مغص شنيع، دلوقتي أحسن الحمد لله.

الست المديرية: ال Galley النهاردة أهم مكان عندي هو ال Zone اللى فيها المسافرين المرضى، أسفة ماقدرش أعتد عليكي هنا، بدلى مع المضيضة السيشلية أو النمساوية.

أنا: لأ أنا هنا كويسة ومش هقصر ان شاء الله.

الست المديرية: انتى حرة، على مسئوليتك، لو لقيت أي تقصير هكتب فيكى تقرير.

صوتي العميق: يا ساتر... ماتبدلى يا بنتى وتخلصى.

أنا: اسكت انت.. أرمى بلايا على المضيضات ليه؟ أغلبهم مش بيحب المكان ده.

صوتي العميق: دور الفدائية قدم على فكرة، لو واحدة فيهم مكانك ماكنتش هاتردد ترميه عليكي.

المضيضة النمساوية: ما تقلقيش من أي حاجة خالص، هبقى معاكي على طول وهساعدك.

المضيضة السيشلية: وأنا كمان.

أنا: لو حد شافكم هاتنفخ برضه.

المضيضة النمساوية: متخافيش محدش هيشوفنا.

المضيفة الرومانية: عاملة ايه؟ أنا سمعت انك كنتى تعبانة؟

أنا: أحسن الحمد لله.

المضيفة الرومانية: بقولك ايه.. في واحد بيسأل عليكي.

أنا: عليا أنا؟

المضيفة الرومانية: هيتجنن ويتكلم معاكي.

أنا: ايه الجوده من أولها؟ قوليله عندها مغص.

المضيفة السيشلية: هاهاها.. هو فين ده؟ قاعد فين؟

المضيفة الرومانية: في ال zone عندي.. أهو.. أهو.. شايفة اللي شعره أبيض ده ولا بس نضارة؟ أيوه هو ده.

أنا: شعره أبيض ولا بس نضارة!! طيب ياللا من هنا عايزة أرش مياه وأستفتح..

المضيفة الرومانية: هاهاهاها.. لأ فهمتية غلط، ده بيقول انك شبه بنته جداً وبقاله كتير ماشافهاش ونفسه يتكلم معاكي يا حرام.

المضيفة السيشلية: تلاقيه بيحاول يجرجلها بس.

أنا: جنسيته ايه ده كمان.

المضيفة الرومانية: من رومانيا.. بلدياتي.

أنا: قوليله بعد توزيع الوجبات هروح له.

المضيضة الرومانية: ماشى.

بعد توزيع الوجبات قعدت أتاامل حال الأربع اخوات وهما ممدين على الكراسى الى بقت سراير وسرحت في الدنيا..

المضيضة النمساوية: عرفتلك الحادثة حصلت ازاي، أبوهم قالى انهم كانوا كلهم في عربية واحدة وكانت سايقة أختهم الى عندها 28 سنة وكانوا تقريبا في سباق مع قرايهم في عربية تانية فاتقلبت بهم كذا قلبه وبعدين دخلت في سور!

أنا: يا ساتريا رب.

المضيضة النمساوية: صعب جداً.

المضيضة الرومانية: انت مش هتروحي للمسافر؟ مش قلتيله بعد توزيع الوجبات بشوية؟

مشيت لحد الرجل أبو شعر أبيض ونضارة، الرجل وشه سمح وشكله مش بتاع لف ودوران ولا حاجة، ابتسمت له كأنه أبويا فعلاً.

أنا: حضرتك قلت لزميلتى انك عاوز تتكلم معايا؟

المسافر: (متنح)

أنا: حضرتك قلت انى شبه بنتك؟

المسافر: انتى هي تقريبا ماعدا حاجات بسيطة في الوش وكمان هي أطول منك شوية، ازاي فيه شبه كده؟!

أنا: بنقول عندنا في مصر "يخلق من الشبهه 40".

المسافر: انتى مصرية، أنا بنتى زارت شرم الشيخ مرة قبل كده وحببتها جداً، انا كمان نفسى أروح معها شرم، هى دلوقتى بتدرس رسم في فرنسا.  
أنا: جميل جداً.

المسافر: هي بنتى الوحيدة، كان نفسى أشوفها جداً بقالى فترة وهى مش عارفة تنزل، بس أنتى هدية من عند ربنا.. كأنى شفتها بالطبط، انتى روحك كمان فيها منها.

أتأثرت جداً وبدأت عيني خلاص تدمع، الغربية دي قد ايه قاسية؟ بالذات الناس الكبيرة اللى عاشت طول عمرها تدي لأولادها من غير ماتنتظر مقابل، الآباء والأمهات اللى من النوع ده بيفضلوا يدوا لحد آخر لحظة في حياتهم.

أنا: الحمد لله انك شفت البديلة النهاردة وان شاء الله تشوفها قريب.

المسافر: هشوفها الأسبوع الجاي.

أنا: طيب أنا لازم أرجع مكانى تاني.

المسافر: ممكن تبقى تعدي عليا؟

أنا: طبعاً .

وأنا ماشية كانت دموى نزلت، أكثر حاجة بتأثر فيا بعد الموت الناس الكبيرة مش عارفه ليه.

المضيضة السيشلية: هو كل شوية واحدة تعيط؟ ايه الرحلة النكد دي؟  
المضيضة الرومانية: يا جماعة النهاردة 25 ديسمبر.. وقت الأعياد  
والاحتفالات، بلاش نكد الله يخليكم.

أنا: مفيش نكد، عادي يعني اتأثرت بالرجل ده كان بيصلى بطريقة غريبة  
عشان شبه بنته وصعب عليا.

المضيضة السيشلية: والله يا بنتى تلاقيه بيجر رجلك، الرجالة الكبار في  
السن دول أخطر وأمكر من الصغيرين.

المضيضة الرومانية: خبرة برضه.. هاهاهاهاه..

أنا: لا يا بنات والله الرجل ده فعلاً مش بيكذب، أنا حسيته.

المضيضة السيشلية: ماشى يا ست الحساسة، ياللا خلصى بقى عشان  
إحنا هانلم دلوقتي الوجبات.

صوتي العميق: يعني لأول مرة أبقي محتاريس أنا كمان مصدقه للأسف.

بعد لم الوجبات والذي منه، المضيضات ساعدوني بحماسة أول مرة  
أشوفها من أي جنسية بصراحة، خلصنا بدرى كل حاجة وحسيت انى  
عاوذة أتكلم مع المسافر تاني..

أنا: أنا رايحة للمسافر تاني.. غطوني على بال ما أرجع، 5 دقائق بس.

المضيضة السيشلية: الله.. دي لعبت بقى.. أيوة يا سيدي...

المضيضة النمساوية: بسرعة طيب.

أنا: حضرتك عامل ايه؟ تحب أجيبك قهوة؟

المسافر: أهلا.. ازيك يا بنتي؟ أنا شايفك ورا مشغوله، شغله مرهقة؟

أنا: جدًّا.

المسافر: انتي وزمايلك مأخدوتش راحة خالص تقريبا.

أنا: كل حاجة لهما ميزة وعيب.

المسافر: ميزتها انك بتلغى البلاد.

أنا: كانت ميزة في الأول طبعًا ، ميزة ماهرة كمان.. يعني مين في مستوايا  
المادي يقدر يلف العالم الا لو اشتغل في الضيافة؟ لكن بعد كده بتظهر  
عيوب المهنة زى أي مهنة تانية.

المسافر: ربنا معاكى يا بنتي، المهم تبقى عارفة انتي عاوزه ايه وعارفه  
توصليله ازاي؟ خدي بالك ده مهم جدًّا عشان متوهيش في النص.

أنا: بس ساعات بنفتكر اننا عاوزين حاجة معينة وفي الاخر بنكتشف ان  
مش هي دي وبنغيرها ونبدأ المشوار من الأول تاني.

المسافر: بتضيعي وقت كتير كده، ركزي.

أنا: ازاي؟

المسافر: ادخلي جوه نفسك الأول وافهميها كويس وماتتكسفيش من اللي  
هي عوزاه، يمكن تكون مادية مثلاً وانتي مكسوفة تعترفي أو العكس  
مممكن تكون عاطفية وانتي برضه مش عاوزه تواجبي؟ عشان كده مش

بتعريفى تشبى رغباتها كويس. اعرفى نفسك كويس الأول واختبرها وساعديها تبقى صريحة معاكى عشان هي في الأول مش هاتكون صريحة معاكى الا لو وثقت فيكى، ساعتها هاتقدرى تحددى اتجاهك في الدنيا وترسمى خط تمشى عليه، تقى مرة وتقومى تاني تكملى، بس اوعى تقى وما تقوميش أو تتأخرى، الناس هاتسبقك.

أنا: النصيحة دي جاتلى في وقتها، وأنا حاسة نفسى أحسن دلوقتى من جوايا، حضرتك انسان جميل جدًا وأنا متشكرة جدًا على النصيحة.

المسافر (بابتسامه): على ايه؟ انتى بنتى.

أنا: وأنا كمان حسيتك زى بابا.

الست المديره بمنتهى الود قربت على ودنى وعلى وشها ابتسامه خبيثة.

الست المديره: مش نرجع مكانا بقى وكفاية ضحك ورغى مع المسافرين؟

أنا (بابتسامه ودوده): مضطرة أرجع مكانى دلوقتى، أشوف حضرتك بعد الهبوط ان شاء الله.

المسافر: هبقى أديكى رقمى نطمئن على بعض، خلى بالك على نفسك.

رجعت ال Galley المرة دي وأنا بافكر في كلامه، أكيد دي رساله.

المضيفه النمساوية: شكله طيب قوى المسافر ده.

المضيفه السيشلية: يا حبيبى، كان بيقولك خلى بالك على نفسك؟

أنا: وايه يعني؟

المضيضة السيشلية: طب خلى بالك بقى، ده انت اللى طيبة قوى.

بعد الهبوط.. المسافرين كلهم نزلوا وبعدين نزلوا ال Stretchers مع  
أهلهم والدكتور بتاعهم والمضيضات عملوا كل التفتيش والحركات وفجأة  
سمعنا المضيضة الرومانية بتنادي وهى بتبصلى ..

المضيضة الرومانية: الحقى صاحبك مش عارفة أصحيه..

أنا: صاحى مين؟

المضيضة الرومانية: تعالوا بسرعة.

جريت مع باقى المضيضات عندها لقينا المسافر نايم فى هدوء وشكله كان  
مبتسم شوية بس يظهر انه نومه ثقيل حبتين.

أنا: يا فندم... يا فندم اصحى.. إحنا وصلنا خلاص.

المسافر: .....

أنا: حضرتك إحنا وصلنا، يا فندم؟

وفجأة لقيت المسافر الجميل راسه وقعت ومال كله ناحية الكرسي اللى  
جنبه!

المضيضة النمساوية: ده شكله كده ميت؟

أنا: مات؟ ازاي ده كان لسه من دقائق بيتكلم معايا وكان كويس جداً!

المضيضة الرومانية: عادي. بابا مات وهو بيتعشى معانا على السفرة.

أنا: يا فنديم.. لو سمحت اصحى.. انت كويس.. صح؟ يا فنديم؟؟

الست المديرية: ايه اللى بيحصل؟

المضيفة السيشلية: عندنا حالة وفاة.

الست المديرية: وسعولى كده... يا فنديم.. عاوزه Perfum .. ملاحظتيش عليه أي علامات غير عادية؟

المضيفة الرومانية: خالص، ده حتى كان بيتكلم معاها وكان كويس.

الست المديرية: مش هو ده اللى كنتى بتضحكى معاها؟

أنا: أيوة كان كويس جداً وكان بيقولى انى أشبه بنته عشان كده كان عاوز يتكلم معايا.

بعد محاولات الافاقه من الست المديرية أقرت واعترفت انه غالباً كده مات..

الست المديرية (ببرود): هاروح أبلغ الكابتن ونعمل اللازم.. خلاص كده ماحدش يقربله تاني لو سمحتم.

المضيفة السيشلية: هي الرحلة دي باينة من أولها.

لما البوليس ودكتور الطب الشرعى شافوه لقوا في جيبه كارت لدكتور قلب في برلين وصورة لبنته اللى هى شبيهى وكانوا بدأو يشكوا فيا أو الصورة جنتهم تقريبا فهورنى أسئلة، أنا قررت انى أبص على الجانب المشرق من الصورة، الرجل ده ربنا أكرمه انه شاف بنت شبه بنته اللى

ماشفهاش بقاله فترة وأنا ربنا بعثلى رسالة معاه كنت يمكن مستنياها  
بقالى فترة أنا كمان.

قررت كمان أنبسبب بكل لحظة معدية لأن الحياة قصيرة جدًا جدًا  
وبتنهى في لحظة واحدة من غير استئذان ولا احم ولا دستور حتى مش  
بتخيرك فين ومع مين تفارق دنيتك اللى قعدت تبني فيها بقالك سنين  
وتحور على نفسك وانت فاهم ان انت لسه قاعد كمان شوية!

الحقيقة كان إحساس عميق جدًا مش هاقدر أوصفه، زى عود بيعزف  
بسرعة وببطء في مقطوعة موسيقية جميلة مبهجة وحزينة في نفس  
الوقت!

## إلى فيينا

"عاصمة النمسا – عند جبال الألب"

المضييفة الفانزويلية: مش مصدقة ان في حد ينام بدرى ليلة رأس السنة؟  
وكمان وانتي واقفة!

أنا: أنا بكره الرحلات الليلية.. بكرها من معاميقى... حد شافتي؟

المضييفة الفانزويلية: أنا.

أنا: لا سليمة... ولا ايه؟

المضييفة الفانزويلية: بشرط.. نخرج مع بعض أول ما نوصل.

أنا: أول ما نوصل.. أول ما نوصل؟؟

المضييفة الفانزويلية (بحسم): أيوة.

أنا: اتفقنا، سبيني أنام بقى شوية والنبي حتى لو وأنا واقفة أنا راضية.

المضييفة الفانزويلية: دلوقتى انتى مش باينة عشان إحنا مطفيين النور،  
لما نصحى المسافرين كمان شوية يعني هاتتفضحى، أحسنلك فوقى.

أنا: خمس دقائق بس الله يكرمك يا شيخة... يخربيت اللى اخترع الرحلات  
الليلية! لازم الطمع وتشقونا ليل وصبح وصبح وليل؟!!

المضييفة التركية: ايد ده انتى نايمة؟

المضيضة الفانزويلية: كده مبقاش سر، احتمال تكتب فيكى تقرير.

أنا: أووووووووووف.. عايزة حاجة؟

المضيضة التركية بصيتلى من تحت لفوق باحتقار شديد ومشيت، بنسبة 90% أنا لبست خازوق دلوقتى، ياللا مش مهم، المهم انى من ساعة ما اشتغلت مضيضة جوية مابتهناش على 4 أو 5 ساعات نوم متصلة!

المضيضة الفانزويلية: فتحوا أنوار الكابينة والمضيضة اللى فى ال Galley بتحضر الوجبات، يعنى فوق بقى ده انتى فظيعة.

أنا: هعيط والله، نفسى أنا... نفسى أنا!!!!!!!!!!!!!!!!!!!!!!.. أمنية حياتى.

المضيضة الفانزويلية: طب تختارى بين النوم ولا واد موز؟

أنا: دلوقتى؟ النوم طبعًا .

المضيضة الفانزويلية: طيب النوم ولا الفلوس؟

أنا: مفيش بينا اتفاق على فكرة المضيضة التركية شافتنى خلاص وهتنفخ كمان شوية يعنى محدش ماسك عليا زلة، غورى بقى من وشى.

المضيضة الفانزويلية: أنتى شكلك تعبان ، مش هأخذ على كلامك الا لما تنامى كويس.

الست المديرية (الفرنسية): يا للا عشان ميعاد الفطار، كله جاهز؟ انتى نايمة؟ دي أول ساعات فى السنة الجديدة، مش عايزة حد يشوفك كده، ادخلى الحمام ظبطى شكلك ده.



المضيفة الفانزويلية: البسى هدمك هخدك عند صاحبي اللى هنا، عنده بيت يجنن في الجبل وعاملين حفلة عشان السنة الجديدة، بس هو في مدينة تانية، هو جاى ياخذنا بالعربية... ابقى نامى فيها.

أنا: بصى.. أنا مش عايزة أموت حد دلوقتي، اتفضلى قومي اجرى من باب الأوضة على عربية صاحبك عدل.

المضيفة الفانزويلية: هاهاهاها.. ماتقدرش تموتيني.

أنا: وبعدين ايه صاحبي اللى هنا دي؟ هما كام واحد؟

المضيفة الفانزويلية: ما هو أنا عندي صاحب في شوية بلاد كده، علشان أوفريا عبيطة، بس أنا عندي مبدأ، عمري ما قلت لحد "بحبك".

أنا: شوية بلاد! لأ عداكى العيب، وبعدين توفرى ايه يعني؟

المضيفة الفانزويلية: يعني لما أنزل كل بلد هو يفسحني ويأكلني ويسهرني وأنا أخرى هدية بشوية فكة وخلص، أصلى عاوزة أشتري بيت في بلدي لما أرجع، جنينة وحمام وسباحة وكده، هحوش ازاي يعني؟

أنا: طيب استمرى، بس سيبينى أنام وأدي بوسة كبيرة أهى، وابقى سلميلي على صاحبك النمساوى والباقي لما تروحيلهم كمان.

المضيفة الفانزويلية: خلاص براحتك كنت هعرفك على صاحبه.. ده غنى جداً بس انتى شكلك مغفلة؟

أنا: الباب في ايدك يا عروسة.



أنا: دي حقيقة، الطاقة الإيجابية بالنسبة لنا اختراع، في عز فرحنا لازم نفتكر حاجة تزعلنا أو حاجة خافين تحصل.

المضييفة السودانية: مضبوط، إحنا في السودان أوضاعنا كثير وحشة وفي تفرقة وعنصرية بينا وبين بعض! لكن دايمًا باقول لنفسى إحنا مش لوحدنا في العالم اللى بنعانى من ده وان شاء الله هيبقى يوم والناس تفهم وتميز، مش كفاية العنصرية اللى بتتمارس علينا من الشعوب الثانية؟ إحنا كمان بنضرب في بعض؟ قعدت أفكر ازاى أنا كفرد أقدر أنغلب على ظروفى الشخصية، أخذت خطوة إيجابية وقدمت في كذا شركة طيران وجيت اشتغلت هنا، وده كان حلم واثققتى..مش المفروض أفرح؟ لأ.. نكدية برضه، أقعد أفكر في كل حاجة مريت بيها وضايقتى أو جرحتنى، لما شفتهم امبارح الساعة 12 في الطائرة وكل طقم الضيافة بيحتفل بالسنة الجديدة ويعتبروا الحاجات الوحشة اللى مرت بيهم دروس استفادوا منها ويقولوا كل واحد أمنياته للسنة الجديدة لاحظت أنى معنديش أمنيات محددة أسعى لها! وعشان مش راضية باللى عندي مش عارفة أفرح به.

أنا: انتوا احتفلتوا من غيرى كمان؟

المضييفة السودانية: انتى غريبة جدًا، صحيناكى كثير وانتى كنتى نايمة وانتى واقفة وصوروكى وضحكوا عليكى والست المديرية قالت بلاش تنفخك في يوم زى ده حرام.

أنا: كتر خيرها والله.. أميرة وبننت حلال.

المضيضة السودانية: بس أنا أخذت قرار وعهد على نفسى انى أنبسط بكل لحظة وأبعد أي نكد وخوف على قد ماقدر، الفرح بييجيب فرح والنكد بييجيب نكد، أي نجاح صغير أحققه لازم أكافئ نفسى عليه وأديها حقها، كفاية كده أنا قسيت على نفسى كتير وكنت بلومها حتى على خداع الناس لها.

أنا: كلنا هذه المرأة والله.

المضيضة السودانية: لحد امتى؟

أنا: خلاص أنا كمان هاخذ نفس العهد معاكى، فعلاً مش مستاهلة.

المضيضة السودانية سابت مج النسكافيه وقامت من غير تفاهم حضنانى ومعبطة وأنا عمالة أكح لأنى لسه مابلعتش النسكافيه.

أنا: خلاص خلاص فهمت انك فرحانة والله، انتم كلكم كده.. مفيش حاجة من بعيد يا بوس يا أحضان؟ عموماً أنا معاكى وهبقى أفكر كل شوية بالعهد ده وانتى كمان ابقى فكرينى.

هييييييييه الله يمسكى بالخير يا "ست الكل"... اسم المضيضة السودانية "ست الكل" وهى كانت فعلاً ست الكل بفكرها وحيا للحياة وتسامحها مع الناس والظروف.

# إلى روما

"عاصمة إيطاليا"

المضيضة التركية: شفقتى المسافر المجرم الى نايم ده؟

أنا: يا بنات مش كده! حتى النايم مش عاتقينه؟

المضيضة التركية: مالك معقدة الدنيا ليه؟

أنا: انتو كمان بقيتوا تعاكسوا المسافرين علنا كده! يعني الرجل مسلمش منكم لا صاحى ولا نايم؟

المضيضة التركية: هاهاهاهاه.. أصله فظيع بصراحة.. شفقتى عنيه؟ ولا شعره؟ فيه كتير من "آل باتشينو" وهو صغير بس ده طويل.

أنا: مفيش حد زى "آل باتشينو" معلش بقى يعني.. صغير كبير.. انسى.

المضيضة التركية: طيب ابقى بصيله وتمعنى فيه كده وشوفي؟

أنا: مفيش زى "آل باتشينو" ..

المضيضة التركية: عزومة بيتزا لو ماطلعش شهه؟ المضيفات كلها هتموت عليه، انتى ايه.. ما عندكيش إحساس؟

أنا: عندى طبعًا بس أنا أحب أبص فى المضمون، الموضوع عندنا فى مصر مش سهل كده، ده لو من نفس البلد والديانة بيوقفوا المراكب السائرة.

المضيضة التركية: يعني انى لازم تتجوزى مسلم؟

أنا: طبعاً وأنا شخصيا أفضل يكون مصري أصيل، ذكر يعنى.

المضيضة التركية: "دكررررر"؟

أنا: قصدي رجل حمش وليه هيبه، بنسميه "دكر" مش واد مسبسب.

المضيضة التركية: "دكررررر"، المكان اللى أنا فيه فى تركيا مش بنهتيم بموضوع الدكر ولا الأديان، أنا أختى مسلمة ومتجوزة مسيحي.. عادي.

أنا: وعادي كده مفيش مشاكل ولا حاجة؟ والأهل أخبارهم ايه؟

المضيضة التركية: الاتنين اللى يقرروا يكملوا حياتهم مع بعض مش المفروض يخلوا أى حاجة تتدخل بينهم، لا أهل ولا عرف ولا حتى دين.

أنا: وجهات نظر أحترمها، لكن موضوع الدين ده أختلف فيه وعلى العموم مصر مش تركيا 😊.

المضيضة التركية: الحمد لله أنى تركية.

أنا: والحمد لله انى مصرية.

كنت ماشية فى الكابينة بزهو وفخر وافتخار من غير سبب واضح! قربنا على الهبوط والرحلة كانت تمام والحمد لله، يمكن هو ده سبب الإحساس بالزهو؟ رحلة بلا مشاكل... الله.

أنا: لو سمحت الحزأأأأأأأأأأأ.....





الكابتن: سيداتي وسادتي مرحبا بكم في مطار "ليوناردو دافينشي" والوقت المحلى الواحدة مساء ودرجة الحرارة 19 درجة مئوية، للسلامة والراحة الخاصة بكم يرجى البقاء في مقاعكم وتثبيت المقاعد مع إبقاء ربط الأحزمة في وضع رأسى حتى إيقاف علامة ربط حزام الأمان، يرجى مراجعة متعلقاتكم الشخصية حول المقعد وتوخ الحذر عند فتح الصناديق العلوية، إذا كنت تحتاج الى المساعدة للنزول من الطائرة، يرجى البقاء في مقعدك حتى نزول جميع الركاب، وحتى مجئ احدي مضيفات الرحلة للمساعدة، نيابة عن الطاقم بأكمله أود أن أشكركم على اختياركم خطوطنا الجوية ونحن نتطلع الى رؤيتكم على متن الطائرة في القريب العاجل، نتمنى لكم وقت طيب.

اترصينا على باب الطائرة الرصة إياها عشان نودع المسافرين مع ابتسامة مرسومة مرهقة مزيفة كالعادة أو صادقة عشان الرحلة خلصت وهنرتاح، وإحنا في سرنا بنقول ياللا بقى انجزوا تعبتوا اللي خلفونا.. عايزين نروح الفندق ننام، في حين اترص المسافرين في طابور مكون من صف واحد مستنيين الباب يفتح للنزول من الطائرة.

المضيضة التركية: الأول... الثاني.. الثالث... قرب أهو.. ياخى عليه وعلى جماله.

أنا: لا حول ولا قوة الا بالله... حمد الله على السلامة..

أنا: حمد الله على ال.....

آل باتشينو: متشكر جداً على خدمتك ليا طول الرحلة.

كان "آل باتشينو" على صغير وطويل كما قالت الأخت المضيفة التركية سديدة الرأي ببصلى في عيني، آه والله وأنا كان هيغمن عليا، مش عشان هو حلو؟ لأ، عشان افتكرت البييتزا اللي هدفع تمها وافتكرت كمان الأخ "آل باتشينو" الحقيقى في The Godfather و Scarface وغيرهم وفي ثوانى تخيلته "آل باتشينو" بجد وعاوز يعرفنى! نظرات حقد وغل وزغر من المضيفات، رميت نظرة سريعة على الست المديرية لقيتها بتبصلى بصة مختلفة، بصة واحدة فرحانة لواحدة! البنات بتحس ببعضها، للدرجة دي بقوا شاحين؟ لكنى استعدت ذاكرتى في ثوانى وافتكرت انه خليفة "آل باتشينو" بس مش "آل باتشينو" الحقيقى!

أنا: العفويا فندم، خدمتك وخدمت مسافرين كثير على الرحلة.

الست المديرية انتقلت من مكانها بجانب باب الطائرة مباشرة الى جانبي أنا وقرصتى في دراعى من ورا!

أنا: أي!

الست المديرية: العفويا فندم.. إحنا كلنا اتشرفنا بخدمتك النهاردة.

"آل باتشينو" (بثقة وتسبيلة): متشكر..

بصلى تاني بتركيز ومد ايده الكريمة ليا..

"آل باتشينو": الكارت بتاعى، هبقى مبسوط جدًا لو اتعرفنا ببعض أكثر.

أنا: أنا؟

"آل باتشينو": أيوه انتى..

المسافر اللى وراه فى الدور: مش ياللا عشان عاوزين ننزل؟

"آل باتشينو": اتفضل حضرتك.. أنا آسف جدًّا..

عدي المسافر اللى وراه ونزل لكن واضح ان المشهد عجب بقية المسافرين وكانوا واقفين مبسوطين قوى وسناهم كلها باينة من فرط السعادة، اتهمىلى ان أول ما أخذ الكارت هيسقفوا زى الأفلام.

الست المديرية (فى ودنى): يا هبله خدي منه الكارت ولا أخده أنا؟

أنا: خديه انتى أنا خايقة.

"آل باتشينو": ممكن تاخدي الكارت أنا مادد ايدي بقالى كتير!

أنا: أنا آسفة.

"آل باتشينو" كان خلاص هيعيط، واضح ان عمره ما حصل معاه كده قبل النهاردة!

المضيفة التركية: يخربيت فقرك.. يا ريت كان اختارنى أنا.

أنا: خديه يا ستى وخلصينى.

المسافر اللى كان ورا اللى وراه قعد يغمز لى بعينه بتشجيع حماسى رهيب، يغمز ويعوج راسه على الكارت عشان أخده..

المضيفة التركية: أنا مش هكسفك وهاخذ الكارت وهخلها تكلمك.

في ثانية خطفت الكارت من ايده وهو ايده لسه متعلقة في الهوا..

"آل باتشينو": أنا قاعد في روما 5 أيام.. هستناكي تكلمينى ضرورى.

هنا تأفف السادة المسافرين عشان المشهد باظ! مش دي النهاية اللى كانو  
مستنيينها والسقفة الشهيرة باظت كمان.

المسافر اللى وراه: مش ياللا بقى ولا ايه؟

"آل باتشينو": باى.

المضييفة التركية والست المديرية: مع السلامة يا فندم.

الست المديرية: يا خيبتك.

مسافرة عجوزة وهى نازلة: كسفتيه ليه؟ مش كنتى تاخدي الكارت  
وتفكرى؟ ده زى القمر.

المضييفة التركية: أنا هاكلمه...

أنا: حلال عليكى.

مسافرة شابة بصت لى باحتقار صريح وهى نازلة من الطائرة!

أنا: الله الله الله.. هو "آل باتشينو" بجد ولا ايه يا كتاكييت؟ كل شوية  
واحد وواحدة نازلين لى بص من فوق لتحت وعوج شفايف!

صوتي العميق: خايبة.. هاتعيش وتموتى خايبة، فاكرة صاحبك اللى  
اتجوزت الواد الفرنساوى وغير ديانتته عشانها؟

أنا: يا عم روح بقى... لسه هغير..

صوتي العميق: بس "آل باتشينو" بجد، لأ وهيموت ويعرفك.

أنا: يا بنى ده اللى من بلدي وعایشين في نفس الظروف ماتقدرش تعرف بيفكروا ازاي، إحكي لى على الأجانب بقى وبعدين مابيعجبونيش بصراحة، أنا باشجع الصناعة المحلية مش زى القرع؟

صوتي العميق: انتى هاتجيني بقى ولا ايه؟ مش كانوا المصريين مش عاجبينك؟

أنا: في حاجات معينة لكن برضه المصرى مصري يا باشا مش تقولى واد خواجه، مش واكل؟

وإحنا في طريقنا للفندق قعد جنى مضيف أسباني حليوة..

المضيف الأسباني: على فكرة.. عجبتي قوى لما مرضيتش تاخدي الكارت، يا بخت صاحبك، تلاقيه واثق فيكى ومش بيفكر في حاجة...

أنا: أنا مش مصاحبة على فكرة.

المضيف الأسباني: أومال ليه مأخديش الكارت!؟

أنا: عشان أنا أحب اللى أعرفه أحبه وأتجوزه ويكون من نفس ديانتي؟

المضيف الأسباني: فهمت.. اختلاف الثقافات ده بيعلم حاجات كتير برضه.. وصلنا الفندق أهو.. أشوفك على العشا.

في الفندق كانت الدنيا هادية وظريفة بس زهق، أنا هنزل العشا أرغى شوية مع المضيف الأسباني الحليوة، لكن فجأة سمعت ضرب نار! كانت صدمة بالنسبة لي، ضرب نار ده ولا حاجة وقعت ولا فرقعت؟ بس ده ضرب نار بجد، أنا سمعته في لبنان قبل كده عن قرب، بعدت عن الباب وقعدت في ركن من أركان الأوضة على الأرض عشان ماتوصلنيش طلاقة متأثرة بأفلام الأكشن اللي هريت مخي بيها! الصوت وقف! ومعاه كل الأصوات! الله.. ايه اللي حصل؟ كل اللي في الفندق ماتوا ولا ايه؟ وفجأة سمعت صوت رجلين بتجري، رجلين كثير تقريبا في اتجاه واحد وبعد دقائق نفس الرجلين دي بس ماشية بخطوات سريعة برضه في اتجاه واحد! هافطس وأعرف ايه اللي بيحصل بره؟ هي المافيا أكيد، الله يخربيتك يا خليفة "آل باتشينو" خليت خيالي يسرح في The Godfather.

طق طق طق... عيني راحت يمين وشمال ونفسي اتكتم... طق طق طق.

أنا: صمتتنتنتت.

طق طق طق طق..

أنا: مين؟

المضيف الأسباني: انتي كويسة؟

أنا: انت مين؟

المضيف الأسباني: افتحي يا بنتي أنا زميلك.

أنا: كلمة السر؟

المضيف الأسباني: نعم؟

أنا: قصدي بأمانة ايه يعني؟ اديني أمانة حصلت النهاردة؟

المضيف الأسباني: المسافر اللى كان عايز يديكى الكارت بتاعه.

أنا: يا حلاوة ده الواد صيتنى.

المضيف الأسباني: نعم؟

أنا: لا مفيش...أمان... استنى ثوانى.

فتحت الباب متمصبة شخصية Sandra Buluk في احدي أفلامها الأكشن...

المضيف الأسباني: أهم حاجة انك كويسة.

أنا: الحمد لله... هو ايه اللى بيحصل؟ هو ده كان ضرب نار بجد؟

المضيف الأسباني: ده انتى بقيتى حدوتة طقم الضيافة انتى والمضيفة التركية.

أنا: مش فاهمة.

المضيف الأسباني: الواد إياه اللى عمل فيها حبيب؟

أنا: "آل باشينو"... ماله؟

المضيف الأسباني: طلع في تنظيم متطرف كبير ومطلوب دوليا.

أنا: احلف؟

المضيف الأسباني: انتى واحدة مبروكة. كان في ناس مراقبينه على الطيارة  
لو كنتى أخذتى الكارت كان زمانك اتأخذتى زى المضيفة التركية كده..  
بيحققوا معاها دلوقتى والمديرة بعثت للشركة وبقت فضيحة.

أنا: يا لهوى أخذوها ليه؟

المضيف الأسباني: أصل لقوه في أوضتها! أتاربه كان متخفى وحالق دقنه  
وكده.. الواد طلع أصلا ايرانى!

أنا: ايراناانى!

المضيف الأسباني: وبيتكلم بلكنة إيطالية زى الطلاينة بالظبط! كان  
عندك حق مش أي حد عايز يتعرف نعرفه كده على طول.

أنا: طب وهتسيبوا البننت كده؟

المضيف الأسباني: طبعاً لأ.. هم بلغوا الشركة ولما نشوف هيعموا ايه بس  
البننت أكيد هايسيبيوها لما يتأكدوا انها ماتعرفوش.

أنا: الحمد لله.. الحمد لله... يا بركة دعا الوالدين يا شيخ.

المضيف الأسباني: نعم؟

أنا: لا مالکش فيه.. أبقى أعلمها لك الرحلة الجاية.

المضيف الأسباني: طب ياللا كلهم مستنينك على العشا تحت.

أنا: لما أصلى ركعتين شكر الأول.

صوتي العميق: في الأول والآخر... استفتى قلبك وان أفتاك الناس.

## هبوط تدريجى / Descent

بعد عدد لا بأس به من ساعات الطيران في بلاد كثيرة معرفتني إحكي  
عليها كلها، قررت أرجع بلدي الحبيبة "مصر"، اشتقت لكل حاجة فيها،  
بكل عيوبها لسه شايفة مميزاتها، لما رجعت كانت "أسطورة الضيافة  
الجوية" برضه قدامى بكل عيوبها ومميزاتها، شفت عيوبها وحببت  
مميزاتها، كان نفسى ألف على كل اللي نصحونى أسافر لأنى هلف العالم  
ببلاش وأخد فلوس واللى نصحونى مروحش لأن المضيضة منحلة  
ومعندهاش مبادئ.. كان نفسى أقولهم: المضيضة الجوية انسانة مظلومة  
في كثير من جوانب حياتها وأكثر خبرة ونضوج من ناس كثير.

في يوم من الأيام الى منمتش فيهم.. صحيت دولا من النوم بتتاوب  
شافتني قاعدة مربعة على الكنبه لوحدي، مفيش تليفزيون.. مفيش لاب  
توب.. مفيش كتاب!

دولا: فايقة بكير؟

أنا: أنا منمتش..

دولا: خير حبيبتي.. على وين اليوم؟

أنا: أجازة.

قربت منى وحضنتني لأنها قلقت من شكلي..

دولا: شوبك حبيبتي؟

أنا: دولا.. أنا هستقيل.

دولا: شو؟

أنا: مش قادرة أكمل.. أهلى وحشونى ومصر وحشتنى وجسمى تعبى.. نفسى أعيش حياة طبيعية، أنا بالليل وأصحنى الصبح وأروح الشغل من غير ما أراجع المانيوال وأتعامل مع ناس معينة وأعرفهم مش كل يوم وشوش معرفهاش ولما آخذ عليهم مشقهمش تانى... انتى وماريانا ودعاء أهلى هنا لكن حتى انتم مش بشوفكم الا نادرا، أنا جاية وانتى ماشية ودعاء نايمة وماريانا طايرة.. فاهمانى؟

دولا: ايه.. أكيد.

صحيت ماريانا ودعاء...

ماريانا: صباح الخير...

دعاء: يا حلولى كلنا هنا؟ نفطر بقى..

قامت دولا مبوزة تحضر الفطار وماريانا ودعاء بيشاورولى عليها "مالها؟"..  
عملت نفسى مش واحدة بالى لأنى أنا كمان كنت مبوزة أكثر منها..

على الفطار دعاء وماريانا بيحكوا على الرحلة الأخيرة

دعاء: مالكوا يا بنات عاملين كده ليه؟

أنا: أنا هستقيل.

دعاء: ليه؟

أنا: مش قادرة أكمل.. بقالى شهر ونص مش بنام عشان أخد القرار ده..  
وخلص عرفت أنا عاوزه ايه.

دعاء: اللى انتى عاوزه اعمله بس فكرى تاني.. فكرى كويس.

أنا: فكرت وقررت.. أنا أكثر حاجة مضيقانى دلوقتى انتم... مش عارفة  
أسيبكم.

ماريانا: ما فيكى تقعدى حبيبتي؟ تعبت؟

أنا: جدًّا.

دعاء: انا فاهمة والله بس افتكرى إحنا ازاي تعبنا لحد ما اشتغلنا.. مش  
سهل. وبعدين دي شغلانة بنا كثير تتمناها. في العالم كله مش في مصر  
بس. عشان خاطر فكرى تاني.

ماريانا: ليكى.. فكرى تاني مثل ما دعاء قالت.

دولا: اتركوها للبنت.. هي واخدة قرار خلاص، يا الله شو بعتل همكم  
كلكن.. الله يريحنى من عنده.

دعاء: الله الله الله.. انتى قلبتي ولا ايه ..

ماريانا: انتى قلبتي ولا ايه؟ ياسمين... شفتى على الأخير كيف بحكى مصري؟

أنا: (بعيط وبضحك)..

ماريانا: شو يعني قلبت؟؟؟ هااا... (كانت بتقلب على ضهرها)... عن جد شو يعني قلبت... كده... كده؟؟

دعاء: هي كده كده دي اللي انتي فاهماها..

القعدة "قلبت" مسخرة كده على رأى ماريانا، كلنا زعلانين من جوه لكن بنتظاهر اننا أقويا وعمليين، غصب عننا بنضحك ونعيط، إحساس متناقض جداً، لكن الأكيد اننا بنحب بصدق الخير لبعض أيا كانت فين أراضينا.

بعدها بأيام كل البنات الى على الأرض عملوى حفلة وداع وانتهت في المطار بعياط وابتسامات وآمال ووعود نكون أصحاب الى ما شاء الله.

## الهبوط / Landing

قبل تجربة "المضيفة الجوية" كانت نظرتى لكثير من المواضيع والأمور متخلفة عن العالم، كمان نظرتى للاختلاف كانت مختلفة! باختصار نظرتى للعالم كانت محدودة، لكنها اتغيرت واختلفت وأبعادها اتسعت بعد تجربة الطيران، واتعلمت ان الاختلاف في حد ذاته نعمة كبيرة وسنة من سنن الله على أرضه، للتعلم والتدبر والتفكير والتأمل والتعمق ولو شاء القدير لخلقنا نسخة واحدة لكن للاختلاف حكمة، اختلاف الأجناس والألوان والثقافات والأديان والحريات والمعتقدات والطرق والمذاهب والتفكير والملابس والعادات والمقدسات والحياة بكل أركانها بتفتح العقل وطرق ادراكه، لكن أحيانا كل الاختلافات دي بتكون سبب تحجر عقول تانية مش قادرة تتقبل وتتعلم، رجعت بنفس الاسم والشكل لكن شخصيتي اختلفت أكيد للأحسن.

الحياة مراحل والطيران كمان مراحل، الاتنين زى بعض بالضبط: مرحلة ما قبل الإقلاع شبه أي جنين في بطن أمه.. بداية الإقلاع هي الولادة، كل ما تعلق بالطيارة كل ما يكبر الانسان، أول ما تكون الطيارة فوق يكون الشباب وكل المطبات الهوائية والضباب والمواقف الكوميديا والصعبة جوه الطيارة بيواجهها الانسان في مراحل العمر المختلفة اللى متقدر له يعيشها، تبدأ الطيارة في الهبوط التدريجي ويبدأ تقدم السن، لأنها مهما طارت لازم تبتدي مراحل الهبوط وتبدي مشاكل الانسان الصحية، أخيرا الهبوط لحد ما يقف كل عجل الطيارة وهي لحظة خروج الروح من الجسد اللى تعبها أو ربحها، أو ممكن يحصل هبوط اضطرارى لأى عطل

وتنتهى حياتنا فجأة... أي رحلة لها بداية ونهاية، هو ده الطيران وهي دي الحياة.

بعد انتهاء التجربة بيكون في حالة ارتباك رهيبة، هل كانت سوداء وأنا مشفتش بياضها ولا بيضاء وأنا مشفتش سوادها؟ في النهاية مفيش تجربة على الأرض سودا خالص أو بيضا خالص، تجاربنا كلها أبيض وأسود شئنا أم أيينا، المضيفة الجوية مهنة مليانة إيجابيات وسلبيات وكل ميزة وعيب نسبية باختلاف البنى آدمين في الدنيا، حاولت سرد الحقيقة بكل صراحة من وجهة نظري كمضيفة سابقة ووجهة نظر مضيفات لسه بيطيروا ومضيفات استقالوا من جنسيات مختلفة.

التجربة بكل خطواتها ومراحلها، بحلوها ومرها، بكل رحلاتها ومطاراتها وبلادها وكل أطقم الضيافة اللي اشتغلت معهم سواء كان لوزهم من جوه أبيض أو أسود.. مشيت بسببها في أماكن جوايا عمرى ماعرفتها واعتبرت نهاية كل شيء بداية شيء جديد مستنى.

اكتشفت ان الضيافة الجوية اثاره وخطر وتغيير وملل ورفاهية وشقا واسترخاء وارهاق واعياء وأخبار ومرض وصحة وعاهات ومذاكرة ومذاكرة ومذاكرة ومتابعة وأصحاب جدد كثير مش دايمين، وأصحاب مختلفين مقربين رغم بعد الأميال، مفاجآت وتوقعات وتعليمات وتأملات واحباطات وانجازات وأحلام،الضيافة الجوية حياة كاملة متكاملة مضغوطة في كبسولة بتأخذها كل يوم على الريق أو قبل ما تنامى أيا كان الوقت، فوق في السما أو تحت على الأرض، الضيافة الجوية مسئولية ووعي وادراك وحذر وأمل..

obeikandi.com

سيداتى سادتى..

فى نهاية الرحلة بالنيابة عن كل مضيفات ومضيفين العالم  
أستغل وبشدة الفرصة الفريدة دي وأشكركم على اختياركم  
الطيران معنا طوال فترة القراءة وأتمنى لكم إقامة سعيدة على أي  
أرض فى العالم.

"رحلتك على الأرض أكيد لسبب.. خليها رحلة جميلة".

obeikandi.com

## الفهرس

- 5..... الإهداء
- 7..... الحقيقة
- 8..... الحلم
- 11..... كيف تصبحين مضيضة جوية
- 21..... السفر
- 27..... السنيورة
- 36..... الأمن والسلامة
- 43..... الإسعافات الأولية
- 55..... علاقات العملاء و الخدمة
- 59..... "Grooming" / بالعربي "تبرج"!
- 66..... مين أهم واحد على الطيارة ؟
- 68..... وأخيرا بقيت مضيضة جوية !
- 70..... الاقلاع الى كولومبو
- 80..... فندق كولومبو
- 86..... الى كراتشي
- 98..... الى مانىلا
- 106..... الى كاتماندو
- 122..... الى صنعاء
- 135..... الى كوالالمبور
- 150..... الى جزر المالديف
- 165..... الى نيروبي

182.....	إلى قاهرة المعز
198.....	إلى بكين
207.....	على هامش الضيافة
214.....	إلى الصومال
227.....	إلى برلين
241.....	إلى فيينا
248.....	إلى روما
260.....	هبوط تدريجي
264.....	الهبوط

obeikandi.com

جميع حقوق الطبع والتوزيع محفوظة للناشر



Noon\_publishing@yahoo.com

ت - 011-27772007 - 02 35860372